

**Bádha Ngaligba Yesu Kilisito maka li  
Luka aye lie ko**

© 2016 Wycliffe Bible Translators, Inc.

Licence - Creative Commons CC:BY-NC-ND

## *Bádha Ngaligba Yesu Kilisito maka lí*

### **Luka**

#### *aye lie ko*

#### **Eli na kalanu**

Bádha Ngali gba Yesu Kilisito maka lí Luka aye lie ngasuno Yesu maka Mükobho inde lí Ebhe apa nani me ni aha e pí piga gba omaɓsalaele la di ne pí ndu opiga na píla doto hana. Luka ngakpokpo me Bu Bhobua gba Ngámá-a a'í nani Yesu ngubula nakpokpo Bádha Ngali pí obhulu ndibhili (4:18). La, Bádha Ngali ango-o abedhe ne ndjinga bhú e pí okpála inde bhú o ne omalopolo gba o hana. Engú na ndjili abhú bhuku gba Luka ngbéngbé ane la mane bhú oalo na kalanu inde ngakpokpo 'ngú nago gba Yesu. Engú na djali ango-o ane matá mane bhú 'so 'kpí nedhinga na'u ka Yesu abhúla. A ko bha Luka bini inde akpokpo 'ngú bhú bhuku na Kulu gba obhulu titima gba Yesu píndji nabhele a la di-e nayangba ka nabhuka bhú Kilisito píta na'u ka Yesu abhúla-o.

Bhú Bádha Ngali inde-e, u ngagama 'ngú naali píndji mayo, ne píndji Bu Bhobua, ne píndji kulu gba olisi bhú kulu gba Yesu, di ne lele maka lí Ebhe ngambu lí sisiti 'ngú gba okpála lie-o.

#### **Ongbengbe ongú inde bhú bhuku inde-e ngae inde:**

Eli na kalanu 1:1-4

Nazu lie ne nadu bhú ndili lie gba Djaa bhulu nabatisa okpála di ne Yesu 1:5 – 2:52

Kulu gba Djaa bhulu nabatisa okpála 3:1-20

Batisimo di ne nale inde lí Djabulu ale Yesu ne e-o 3:21 – 4:13

Kulu inde lí Yesu amene e bhú ká okpála bhú Galilaya 4:14 – 9:50

Dhuku gba Yesu nayie bhú Galilaya ngú nanu abhú Yelusalema 9:51 –

19:27

Oekpí nasoso gba Yesu abhú Yelusalema 19:28 – 23:56

Nazuku gba Yesu, ne nakoto ka ani li okpála, a la di-e na'ụ ka ani abhúlá-o  
24:1-53

# 1

## Lita 'ngú-o

<sup>1</sup> Ndai ma na mụkụnda Tiofile,

Okpála bhelé ale naye todụ na ongú inde akodho 'kpí bhú ká ya-o. <sup>2</sup> U aye ongú ango-o maka li okpála inde au nayie li lilita-a, akpokpo pi ya lie ko. A ko okpála inde adụ nakpokpo eli gba Ebhe-o. <sup>3</sup> Kaka-a, ngama di-e, pita nagili 'ngú tété má bhotobhoto nayie li dudu-o, ma au ndjindji me, ma kpokpo kúkú pi mụ li lelele, bhele kpála Tiofile, maka li ongú ango-o akodho 'kpí lie ko. <sup>4</sup> Ma kpokpo kúkú pi mụ, amba mụ mbila kụkụlụ 'ngú na ongú inde u asuno e pi mụ ko.

## Andjelu apa me u azú Djaa bhụlụ nabatisa okpála

<sup>5</sup> Bhú nedhinga li Elode adụ lie 'ngbé ngámá na ndu doto na Yudaya-a, dimandè bini gba Ebhe-e adụ oo. A adụ 'li ani me Djakalia, ani adụ bhú libi odimandè gba Abia. A adụ 'li wala ani me Alidjabheti, ani adụ bhú piga gba 'ngbé dimandè Alona. <sup>6</sup> Ndụ uo bhisi hana adụ bhú djila Ebhe ngbingbili. U atsia adụ amene ndụ líli gba Ngámá Ebhe-e hana. <sup>7</sup> Engú bini, ndili dụ ka uo de, anga Alidjabheti adụ ne izude. La di-e, u adụ ndụ o bhisi hana me u nde agbegbe.

<sup>8</sup> Ekpí bini, Djakalia adụ amene kulu na dimandè gba e kala Ebhe, anga adụ ekpí na libi gba uo-o ngú namemene. <sup>9</sup> Maka li odimandè adụ amemene lie, Djakalia atsia asia ngasa ngú nanụ natsulu mụngotsi pi Ebhe abhú 'ngbé 'ti gba Ngámá Ebhe, bhú titina na bubu-o. <sup>10</sup> Nedhinga ani adụ atsutsulu lie, ndụ okpála hana adụ ayo Ebhe akilidjo.

<sup>11</sup> Abhomụ-o, kolo má gala me-e, andjelu gba Ngámá Ebhe-e akoto li ani. Ani alụ de bili natsulu mụngotsi-e ne li pápá na kokpa. <sup>12</sup> Li Djakalia au ani lie me-e, tsulụ aholo amene ani, mabhundja gba ani-e atsia angbingi. <sup>13</sup> Engú bini, andjelu-o

apa pi ani me: «Djakalia, mo odjé tsulɛ de, anga Ebhe adje nayo gba mɛ-o adje. Wala mɛ Alidjabheti azú pi mɛ ndili na bhobhoko. Mo ogísila 'li ani me Djaa .<sup>14</sup> Mo odú ne djali naali, li okpála bhelé tsia kpí di djali ka nazu ani-o. <sup>15</sup> Ani adú 'ngbé kpála bhú djila Ebhe. Ani ndjí vino de, ani ndjí di pandi na kpekpeke de. Ani abédhe ne Bu Bhobua me ani nde nga bha bhú 'bu 'hi e. <sup>16</sup> Ani agié ongisi na Isalaele bhelé li pápá gba Ebhe, Ngámá gba o-o. <sup>17</sup> Ani adú amene kulu kala Ebhe bhú dabili bini ne bua di ne angu maka Polofeta Eliya. Ani aléke engú sɛnda odyi ongisi ne ongisi gba o-o. Ani adjí mabhundja gba okpála na kpekpeke 'ndji, u tsia kólo ngbingbili,<sup>†</sup> ngɛbula naleke okpála inde bedhe pi Ebhe Ngámá.»

<sup>18</sup> Abhomɛ-o, Djakalia ayi andjelu-o me: «Ma ambíla la lele pi me a ko kɛkɛlɛ 'ngú-o? Padhá de, anga ma agbe, wala ma akolo la di ne kalanga bhelé.»

<sup>19</sup> Andjelu-o atsia agie pi ani me: «Ngama-a, ma ne Gabiele, ndɛ 'kpí hana ma dɛdɛ de Ebhe. Ani atima ma me ma go kpokpo bádha ngali inde-e pi mɛ. <sup>20</sup> Engú bini, li mɛ bhuka engú ma apa e pi mɛ-o lie de-e, kaka-a, 'bhɛ mɛ aní, mɛ tí da nagama 'ngú belegɛ de bini akólo li 'kpí li ongú ang-o améne lie lie ko. Engú inde améne lie na paká li nedhinga li Ebhe a'o e-o.»

<sup>21</sup> Li nedhinga bhomɛ-o, okpála adɛ adjeke Djakalia, u adɛ angamba ka ani adɛ abhue lie bhú 'ti Ebhe oo naali-o. <sup>22</sup> Ani akoto lie, ani ale nagama 'ngú pi uo pima. Abhomɛ-o, u atsia ambíla me oo, ani au engú na ngangamba gba Ebhe-e au. Ani adɛ asuno 'ngú pi uo ne 'kpa e, ani ti da nagagama ne 'bhɛ e de.

<sup>23</sup> Li nedhinga na kulu gba ani andjia lie, ani atsia agie lie agba e. <sup>24</sup> Pita nedhinga bhomɛ-o, wala ani Alidjabheti atsia abi 'bhi. Ani awo nga bha lie ngɛbula epe bhuluvue libhomu. Ani adɛ apa me: <sup>25</sup> «Tsia nga engú inde li Ngámá Ebhe amene e mɛma-o. Ani abhundja ma. Mbia inde-e, ani a'e ehe inde nako adɛ aha nɛmɛ mɛma bhú ká djila okpála a'e.»

### Andjelu akpo 'ngú pindji nazu Yesu

<sup>26</sup> Li ebhi gba Alidjabheti akolo lie ne epe madhia-a, Ebhe atima andjelu Gabiele

---

<sup>†</sup>1:17 Tsia bhú Mal. 3:23-24.

bhú kúti bini na ndu doto na Galilaya, inde 'li e me Nadjaleta.<sup>a 27</sup> Aní atima aní gba tsangba bini inde adu adjeke naha lie ne bhoko bini. A adu 'li bhoko ango-o me Djodjefu , aní adu bhú piga gba 'ngbé ngámá Davidi. Tsangba ango-o, a adu 'li aní me Malia .<sup>28</sup> Andjelu-o alí agba aní, aní atsia ayi aní me: «Mú oo! Ngamú inde asia bádha bhú 'bu gba Ebhe-e , Ngámá Ebhe bhú dabili bini ne mú.»<sup>29</sup> Malia angamba ka eli bhomu-o naali. Aní adu ayi bua e me: «Ta nayi inde-e pí?»<sup>30</sup> Abhomu-o, andjelu-o atsia apa pí aní me: «Malia, mo odjé tsalu de, anga mo osia bádha bhú 'bu gba Ebhe-e asia.<sup>31</sup> Tsia nga, mo obí 'bhi, mú zú ndili na bhobhoko, mú tsia gísila 'li aní me Yesu.<sup>32</sup> Aní adu 'ngbé kpála, u tsia dú a'í aní me, Ndili gba Apí 'Kpí. Ebhe Ngámá a'ó me aní u maka ogbi e Davidi.<sup>33</sup> Aní aú duduama ne duduama pí piga gba omafosalaele. Naú gba aní-e ndjía de.»

<sup>34</sup> Malia atsia ayi andjelu-o me: «Engú ango-o améne lie lele pí? Padhá de, anga ma kúnda nga naama bhoko de!»<sup>35</sup> Andjelu-o agie pí aní me: «Bu Bhobua agó pí mú, lí angu gba Ebhe Apí 'Kpí búku mú maka kulu zini. Kaka-a, ndili inde mo ozú e adú bubu, u atsia dú a'í aní me, Ndili gba Ebhe.<sup>36</sup> Tsia nga okala mú Alidjabheti di ne ebhi. Aní azú ndili na bhobhoko, abana aní nde lie ne kalanga bhelé. Kpála nako u adu a'í e me izude-o. Mbia inde-e, ebhi gba aní-e ibili ne epe madhia,<sup>37</sup> anga kpéke da 'ngú pí Ebhe belegu ade bini.»<sup>38</sup> Abhomu-o, Malia atsia apa me: «Ma ne bali gba Ngámá. A ayo me ndu 'ngú mo opa e hana, a mene lie múma moko.» Pipita-a, andjelu-o atsia atapa.

### **Malia anu natsia Alidjabheti**

<sup>39</sup> Bha bhú oekpí bhomu-o, Malia ayie, aní anu má gala bhú kúti bini na ndu doto na ndu ká eta na Yudaya.<sup>40</sup> Aní akolo lie oo, aní alí bhú 'ti gba Djakalia, aní atsia ayi Alidjabheti.<sup>41</sup> Lí Alidjabheti adje maka lí Malia ayi aní lie me-e, ndili-e atsia atili bhú 'bu aní. Abhomu-o, Alidjabheti atsia abedhe ne Bu Bhobua.<sup>42</sup> Aní atsia asula kpekpeke me: «Ebhe aha bisagu pí mú ane ndu olisi hana, bisagu gba aní-e di pí ndili inde mo ozú e-o!»<sup>43</sup> Ma ne da me 'hi Ngámá gba ma-a go tsia

---

<sup>a</sup>1:26 *Nadjaleta*: Nayie bhú Yelusalema akólo bhú Nadjaleta-a, a ko kilometele kámá bini. Tsia bhú Luk. 1:19.

ma-a? <sup>44</sup> Tsia nga, li nedhinga inde ma adje maka mo oyi ma lie me-e, ndili inde bhú 'bu ma-a atili ne djali hana. <sup>45</sup> A ko djali pi m̄, ngam̄ ølø inde abhuka! Padhá de, anga engú inde li Ebhe apa e pi m̄-o, améne lie mamene.»

### Etsi gba Malia

<sup>46</sup> Abhom̄-o Malia atsia atoko Ebhe me:

«Bua ma ngadhøgø Ngámá,

<sup>47</sup> bua ma abedhe ne djali pi Ebhe M̄kobho gba ma-o,

<sup>48</sup> anga ani abhundja ma, bali gba e-e ko.

A moko, nayie pi mbia inde-e,

nd̄ opiga hana adú a'i ma me,

ma ne ølø inde asia bisagu ka Ebhe,

<sup>49</sup> anga Ebhe na Angu amene ongú na ngbengbengbe m̄ma.

A ko Ebhe na bubu,

<sup>50</sup> ndjinga gba ani-e ngad̄ d̄d̄ma ne d̄d̄ma pi okpála inde ngakpe ani ko.

<sup>51</sup> Ani amene ngbengbe 'ngú ne angu gba e-o.

Ani atsambala okpála na 'ngbé bua.

Ani atsia amene me mabhundja gba uo-o kolo padhá.

<sup>52</sup> Ani akø ongbengbe ongámási ne kuto,

ani atsia a'e'e okpála na padhá ne abhúlá.

<sup>53</sup> Ani aha ehe bhelé pi obhende ad̄ ne ḡm̄-o,

ani atsia agie obh̄l̄ tia ne 'kpa o padhá.

<sup>54</sup> Ani ateteke omaf̄salaee, obalise gba e-o.

Ani 'ili 'to e de li nasuno bádha 'ngú gba e nd̄ 'kpí hana,

<sup>55</sup> maka nani ani apa lie pi onguo ogbi ní Abalahama

ne opiga gba e-o.»

<sup>56</sup> Malia asi ne Alidjabheti masikpe de epe bata. Pipita-a, ani atsia agie lie agba e.

### Alidjabheti azu Djaa

<sup>57</sup> Li nedhinga nazu ka Alidjabheti akolo lie, ani atsia azu ndili na bhobhoko.

<sup>58</sup> Li okpála inde asili kúti deno ani-e, di ne obhe na piga gba ani-e adje lie me, Ebhe adje bha ndjũ ndjinga ani-e, u atsia adũ akpi djali bhũ dabilì bini ne ani.

<sup>59</sup> Pita poso bini-e, u ago ngũ nato ndìli-e bhũ gandja. U adũ akũnda nagisila 'li 'dyi ani Djakalia. <sup>60</sup> Abhomũ-o, 'hi ani atsia apa me: «A mo-o ade, adũ 'li ani me Djaa.» <sup>61</sup> U atsia apa pi ani me: «Bhũ piga gba mũ-o, kpála bini inde ne 'li bhomũ-o ade.» <sup>62</sup> Abhomũ-o, u atsia amene 'kpa o pi 'dyi ani ngũ nayi ani me ani akũnda me u gisila 'li ndìli-e pi. <sup>63</sup> Djakalia amene 'kpa e pi uo me u go pi ní ne pála ndula, ani atsia aye pépé me: «A 'li ani me Djaa.» Ndũ uo hana atsia angamba naali. <sup>64</sup> Bha li nedhinga bhomũ-o, 'bhe ani abhulu, ani aholo nagama 'ngũ, di ne nadhøgø Ebhe. <sup>65</sup> Abhomũ-o, ndũ okpála hana inde asili kúti lingo uo-o, aholo adje tsulũ. Ngali na engũ angø-o atsia aya bhũ ndu doto na ndũ ká eta na Yudaya libhomu. <sup>66</sup> Ndũ okpála hana inde adũ adjedje-e, adũ abhundja pépé, u atsia adũ apa me: «Mbo! Ndìli angø-o, adũ-e maka da?» Angu gba Ebhe-e adũ bha ndjũ bhũ dabilì bini ne ani.

### Djakalia akpokpo ngbengbe 'ngũ gba Ebhe

<sup>67</sup> Djakalia, 'dyi ndìli-e, abedhe ne Bu Bhobua. Abhomũ-o, ani atsia aholo nakpokpo 'ngũ maka polofeta me:

<sup>68</sup> «A ayo me, u dhøgø Ebhe,  
Ngámá gba omaĩsalaele-o,  
anga ani abhundja okpála gba e,  
ani atsia agbegbe uo bhũ bali.

<sup>69</sup> Ani atima kpála na angu bini  
bhũ piga gba Davidi, bali gba e, ngũ nakobho ya.

<sup>70</sup> A bhomũ-o engũ inde ani apa nani e didili bhũ 'li obubu opolofeta gba e-o.

<sup>71</sup> Ani apa nani me, ni akóbho ní sa 'kpa ndũ obhũlũ yala gba ní-e hana,  
di ne obhende ngakũnda amene ní sisiti-o.

<sup>72</sup> Ani adje ndjinga onguo ogbi ní,  
ani atsia abhundja di gandja na bubu gba e-o.

<sup>73</sup> Silika nani inde ani atũ e pi ogbi ní Abalahama-a,

ani améne pi ní mamene.

<sup>74</sup> Píta nakobho ní sa 'kpa obhɛɛ yala ngɛbula me ní améne kulu pi ni ne tsɛɛ de,

<sup>75</sup> amba ní dhɛgɛ ni ne bua ní hana.

Ní dɛ di bhú djila ni ngbingbili  
ndɛ 'kpí hana bhú makobho gba ní-o.

<sup>76</sup> Pi mɛ-o, ndika ma, u adú a'i mɛ me, polofeta gba Apí 'Kpí,  
anga mo onú kalanɛ  
ngú naleke kpadji gba Ebhe-o.

<sup>77</sup> Mo osúno pi okpála gba ani-e me, ani a'é siti 'ngú inde bhú uo-o ma'e,  
ani tsia kóbho di uo.

<sup>78</sup> A ko anga Ebhe gba ní-e abedhe ne ndjinga bedhe,  
kaka-a, ani atíma zi 'kpí pí ní maka zi 'ndji 'la na kɛkpí.

<sup>79</sup> Ani asúno lie pi obhende bhú biti di ne obhende ne tsɛɛ kuo,  
ngɛbula me ní dhɛkɛ li kpadji na guo 'ngú .»

<sup>80</sup> Ndili-e adɛ abhele, ani atsia adɛ asia kpéke bua. Ani adɛ nadɛ bhú omili bili akolo li 'kpí inde ani asuno lie lie mbámbá pi omaɛsalaele ko.

## 2

### Malia azu Yesu

*(Tsia bhú Mat. 1:18-25.)*

<sup>1</sup> Li nedhinga bhomɛ-o, Agosite, 'ngbé ngámá na Loma , aha líli me u ye 'li okpála hana inde píla doto gba ni-o. <sup>2</sup> Gina naye 'li okpála ango-o amene lie me Kiliniusi nde ne 'ngbé ngámá na Silia. <sup>3</sup> Ndu okpála hana adɛ anɛ me u ye 'li o. Abhomɛ-o, kpála ne kpála atsia anɛ bhú kɛti u azu ani bhú e ko.

<sup>4</sup> Djodjefɛ ayie bhú kɛti na Nadjaleta, bhú ndu doto na Galilaya, ngú nanɛ bhú ndu doto na Yudaya, bhú kɛti inde u a'i e me Beteleme. A ko bili inde u azu 'ngbé ngámá Davidi lie-o, anga ngaani makpe, ani dɛ nani bhú piga gba Davidi ko. <sup>5</sup> Ani anɛ oo me u ye 'li ni, bhú dabili bini ne Malia , ɛlɛ inde ani adɛ



adjeke naha e ko. Өlө angoo adu ne ebhi. <sup>6</sup> U adu lie abhu Beteleme-e, ekpi nazu ka ani atsia akolo. <sup>7</sup> Ani azu ndili na bhobhoko, gina ndili gba e ko. Ani agagala ani ne bongo , ani atsia aseke ani bhü ehe nazu 'he gba onu, anga dabili du pi uo bhü 'ti gba oomago-o de.

### **Andjelu akpokpo badha ngali pi omulila gba okandole**

<sup>8</sup> Bha bhü ndu doto bhomu-o, omulila gba okandole adu asili abhu 'gu ngü nalila onu gba o-o. <sup>9</sup> Andjelu gba Ebhe-e akoto li uo. Sangu gba Ebhe-e asa uo ngbalina maka zi 'kpi. Abhomu-o, u atsia adje tsulu naali. <sup>10</sup> Engü bini, andjelu-o apa pi uo me: «Yi adje tsulu de, anga ma ago akpokpo pi yi badha ngali inde ahä djali naali pi ndu okpala hana. <sup>11</sup> Naki bhü kuti gba Davidi-e, u azu Mukobho pi yi. A ko Kilisito , Ngama. <sup>12</sup> Yi tsia 'he inde yi ambila ani ka e ko: yi abhaka ndje ndili u agagala e ne bongo, u atsia aseke e bhü ehe nazu 'he gba onu.» <sup>13</sup> Kolo ma gala me-e, bhiti oandjelu ayie abhula, u ago abhaka andjelu bhomu, u atsia adu adhoge Ebhe me:

<sup>14</sup> «Sangu pi Ebhe inde abhula,  
guo 'ngü gba ani-e du pila doto pi okpala  
inde ani akunda o ko!»

### **Omulila anu abhu Beteleme**

<sup>15</sup> Li oandjelu-o agie lio lie abhula-a, omulila atsia apa sunda o me: «Ni nu kolo nga bha abhu Beteleme, amba ni u engü inde akolo oo, engü inde li Ebhe Ngama asuno e pi ni ko.» <sup>16</sup> U anu bhü holo, u abhaka Malia, Djodjefu ne mboye ndili-e me u nde aseke ani bhü ehe nazu 'he gba onu. <sup>17</sup> U au ani lie, u atsia akpokpo 'ngü inde li andjelu apa e pi uo pindji mboye ndili bhomu-o. <sup>18</sup> Ndu okpala hana inde adje engü li omulila adu apa e-e, angamba naali. <sup>19</sup> La-a, pi Malia, ani adu alila ndu 'ngü bhomu-o hana li bua e ndjindji. Ani atsia adu abhundja pepe. <sup>20</sup> Pipita-a, omulila aholo nagie lio. U adu aha sangu pi Ebhe, u atsia adu di adhoge ani ngubula ndu 'ngü inde u adje e ne bhende u au e hana, anga ndundu hana akodho 'kpi maka li andjelu-o akpokpo pi uo lie ko.

## U anu ne Yesu bhú 'ngbé 'ti Ebhe gba omaYuda

<sup>21</sup> Bhú ekpí na madjina pita nazu ani-e, li nedhinga nato ani bhú gandja akolo lie, u atsia agisila 'li ani me Yesu. A bhomu-o 'ili inde li andjelu asuno e kala me 'hi ani bi 'bhi ani-o.

<sup>22</sup> Li nedhinga navulu lie pita nazu ka Malia akolo lie, maka li líli gba Moidje apa lie, u atsia anu ne ndili-e bhú Yelusalema ngú na'o ani sa 'kpa Ngámá.

<sup>23</sup> Padhá de, anga u aye bhú líli gba Ngámá-a me: «Ndu ongisi na obhosibhosi na gigina hana, u a'ó uo kpí pi Ngámá.†» <sup>24</sup> U atsia aha di makiso maka li líli gba Ngámá-a apa lie me: «A ayo naha bebhe bhisi. I du mo-o de-e, mu de ha ongisi bebhe bhisi.»<sup>b</sup>

## Simeona agie heni pi Ebhe ngu Yesu

<sup>25</sup> Bhú nedhinga bhomu-o, kpála bini adu nani bhú Yelusalema, a adu 'li ani me Simeo. A ko nani kpála na ngbingbili , ani adu amanga Ebhe. Ani adu adjeke nedhinga li Ebhe a'é likabhu gba omafalaale lie ko. Bu Bhobua adu bhú dabili bini ne ani. <sup>26</sup> Abhomu-o, Bu Bhobua atsia apa nani pi ani me, kala nakpi ka ani-e, ani au ngaiza Masiya inde li Ngámá atima e-o. <sup>27</sup> Nedhinga li okpála inde azu Yesu ago ne ani lie ngu namene maka li líli apa lie li 'ngu gba ani-e, Bu Bhobua ato bhúla Simeo abhú 'ngbé 'ti Ebhe gba omaYuda. <sup>28</sup> Abhú 'ti Ebhe oo, ani aha ndili-o, ani abi ani sa 'kpa e, ani atsia agie heni pi Ebhe me:

<sup>29</sup> «Ngámá, mbia inde-e, maka mo opa lie,

mu ti da na'o ma, bali gba mu-o, me ma nu ne guo 'ngu,

<sup>30</sup> anga ma au mukobho gba mu-o ne djila ma au.

<sup>31</sup> Mukobho inde mo otime e kala ndu okpála hana-o.

<sup>32</sup> Ani adú eke pi omupagano.

---

†2:23 Tsia bhú Eki. 13:2, 12.

<sup>b</sup>2:22-24 Bhú líli gba omaYuda-a, i du nani me ele nde azu-o, a ayo me ani nu ngaiza bhú 'ngbé 'ti Ebhe gba omaYuda, ani vulu lie, amba ani kolo bubu kala Ebhe. Tsia bhú Lev. 12:8.

Ani tsia dú sangu gba omaɓsalaele, okpála gba mɛ-o.»

<sup>33</sup> 'Dyi Yesu ne 'hi Yesu angamba naali ka engú inde u adɛ apa e li ani-o.

<sup>34</sup> Simeo ayo me Ebhe tuko bisagu pí uo, ani atsia apa pí Malia, 'hi Yesu me: «Ebhe abhɛ ndili inde-e ngɛbula me okpála bhelé bhú ká omaɓsalaele li bhú mangimbo, amba Ebhe 'e'e matá okoko bhúlá. Ani adɛ ehe inde li Ebhe ngasuno e, li okpála bhelé tsia yála ani. <sup>35</sup> Kaka-a, ani agbé mabhundja inde awo lie li bua okpála bhelé-e bhú mbasɛ. La-a, pí mɛ makpe-e, likabhu adɛ bua mɛ maka ngise má pɛɛ!»

### **Ana, polofeta na ɔeɔ**

<sup>36</sup> Polofeta bini na ɔeɔ adɛ di nani oo. A adɛ 'li ani me Ana, ndili gba Fanɛele bhú piga gba Asela. Ani adɛ me ani nde agbe má dyuku! U amene nani ne bhoko gba e inde u aha lio ne e bhú ndili-e kalanga mananika. <sup>37</sup> Pita nakpi ka 'ko ani-e, ani atsia ato ɔkɔ. Li nedhinga bhomɛ-o, ani adɛ ibili ne kalanga ndjikpa madjina ne ká badha. Ani dɛ ayie bhú 'ngbé 'ti Ebhe gba omaYuda-a de. Ani adɛ amene kulu lie pí Ebhe sukpe ne ngbikpi. Ani adɛ atse ezɛ ngú nayo Ebhe. <sup>38</sup> Bha li nedhinga bhomɛ-o, ngaani di-e, ani ago, ani atsia aholo adhɔgɔ Ebhe. Ani aholo akpokpo 'ngú pindji ndili-e pí ndɛ okpála hana inde adɛ adjeke me Ebhe gbegbe okpála na Yelusalema bhú likabhu gba o ko.

### **U agie lio bhú Nadjaleta**

<sup>39</sup> Li 'dyi Yesu ne 'hi Yesu andjia namene ndɛ 'ngú hana inde li líli gba Ngámá apa e lie, u atsia agie lio bhú ndu doto na Galilaya, bhú kɛti gba o na Nadjaleta-o. <sup>40</sup> Ndili-e adɛ abhele, ani atsia adɛ abi angu. Imbilangɛ gba ani-e atsia adɛ di abhulu lie. Bádha bhú 'bu gba Ebhe-e atsia adɛ di bhú dabili bini ne ani.

### **Yesu bhú 'ngbé 'ti Ebhe gba omaYuda**

<sup>41</sup> Ndɛ kalanga hana, okpála inde azu ani-e adɛ anú bhú Yelusalema ngú namene anokomia na Pasika . <sup>42</sup> Li ani akolo lie ne kalanga ndjikpa ne ká bhisi-e, u atsia anɛ ne ani bhú dabili bini maka u amemene lie ko. <sup>43</sup> Li anokomia andjia lie, u aholo agie lio. Engú bini, ndili-e Yesu atigala naae bhú Yelusalema me 'dyi ani

ne 'hi ani nde mbila de. <sup>44</sup> U adu abhundja lie me ani bhú dabili bini ne obi o na kpadji-e, u atsia adhuku ekpí bini libhomu. Pipita-a, u aholo nagili ani bhú ká opiga gba o di ne bhú ká obi o-o. <sup>45</sup> U u la ani lie de-e, u atsia agie lio bhú Yelusalema ngú nagili ani.

<sup>46</sup> Bhú 'kpí na bata-a, u abhaka ani bhú 'ngbé 'ti Ebhe gba omaYuda me ani nde adu bhú ká omusuno. Ani adu adje uo di ne nayiyi uo. <sup>47</sup> Ndu okpála inde adu adje ani-e hana, adu angamba naali ka imbilangu inde ani adu agie engú ne e ko. <sup>48</sup> Li okpála inde azu ani au ani lie, u angamba naali. 'Hi ani atsia ayi ani me: «Ndika ma, mo omene ya mo-o ka ni? Tsia nga ya ne 'dyi ma-o, ya adu igini agili ma me bua ya nde alu bha ndju abhúla má gba!» <sup>49</sup> Engú bini, ani agie pi uo me: «Yi de ngagili ma ngú ni? Yi mbila igini de me, a ayo me ma du bhú 'ti gba 'dyi ma-a di?» <sup>50</sup> Engú bini, u mbila nani ta 'ngú inde ani adu apa e pi uo-o de.

<sup>51</sup> Pipita-a, ani atsia agie lie ne uo bhú Nadjaleta. Ani adu amene líli gba uo-o. 'Hi ani adu alila ndu 'ngú bhomu-o hana li bua e ndjindji. Ani atsia adu abhundja pépé. <sup>52</sup> Yesu adu abhele, imbilangu gba ani-e adu di abhulu lie. Engú inde ani adu amene e bhú bádha bhú 'bu gba Ebhe-e, a adu anga li Ebhe, di ne li okpála naali.

### 3

#### **Kulu gba Djaabhu nabatisa okpála**

*(Tsia bhú Mat. 3:1-12, ne bhú Mlk. 1:1-8, di ne bhú Dja. 1:19-28.)*

<sup>1-2</sup> Pipita-a, Tibeale akolo 'ngbé ngámá na Loma . Bhú kalanga na ndjikpa ne ká bhuluvue bhú nau gba ani-e, Djaabhu ndili gba Djakalia, inde adu nani adu abhu 'gu-o, asia eli gba Ebhe . Nedhinga ango-o, Pose Pilato adu alila ndu doto na Yudaya. Elode adu ngámá na ndu doto na Galilaya. Ndai ani Filipino atsia adu ngámá na ndu doto na Itule ne Talakonite. Lisiansi atsia adu naae ngámá na Abilene. Bhú nedhinga bhomu-o, Ana ne uo ne Kaifa atsia adu obhelesi okpála gba odimandé gba Ebhe . <sup>3</sup> Abhomu-o, Djaabhu aholo adhuku bhú 'gu lingo

ngade 'ngu na Djułudani, ani atsia adu atotobhila me: «Yi dji bua yi, yi sia batisimo, amba Ebhe 'e siti 'ngú gba yi ko.»<sup>4</sup> Maka li polofeta Isaya, aye lie bhú bhuku gba e me:

«A ko kpála bini inde ngatotobhila abhú 'gu me:

«Yi leke kpadji pi Ngámá,

yi li okpadji pi ani ngbingbili!

<sup>5</sup> Ndu tsutsukudhu bili sánda ongba 'ta hana abédhe lie.

Ndu oeta na ngbengbengbe ne obhe na djedjedje hana adjí lie,

i kólo má gbata gbata!

Ndu kpadji na gagala hana akólo ngbingbili.

Okpadji na sisiti akólo babadha.

<sup>6</sup> Li ndu okpála hana tsia ú maka li Ebhe ngakobho okpála lie ko!<sup>†</sup>»

<sup>7</sup> Abhomu-o, okpála bhelé adu ago abhaka Djaa ngubula nasia batisimo. Ani atsia adu ayi uo me: «Ngayi opiga kpulu inde-e! A asuno pi yi da me yi kpe mangimbo gba Ebhe inde ngago-o?»<sup>8</sup> I du mo-o, yi mene engú inde asúno me yi adji bua yi kakulu! Yi adú abhundja bha li bua yi de me, Abalahama ne ogbi yi. Padhá de, anga ma apa pi yi na paká me, teme yi ngau e inde-e, Ebhe tí da nadjidji, i tsia kólo odi Abalahama!<sup>9</sup> Maka ma ngapapa lie inde-e, u a'o ngbakpa bhú li ndula-a ngú nadede a'o. Ndu ndula hana inde i li lílí na babadha de-e, u adé, u tsia bhíke bhú djua.»

<sup>10</sup> Abhomu-o, okpála angoo atsia adu ayi ani me: «I du mo-o, a ayo me ya mene pi?»<sup>11</sup> Ani atsia adu agie pi uo me: «Kpála bhende li bongo na mbulu nde ka e bhisi-e, a ayo me ani ha bini pi kpála bhende li bongo na mbulu nde ka e ade ko. Kpála bhende li ezu nde ka e-e, a ayo me ani ha di mbo pi kpála bhende li ezu nde ka e ade ko.»<sup>12</sup> Ondembi na mandjandja ago di ngú nasia batisimo, u atsia ayi ani me: «Músuno, a ayo me ya mene pi?»<sup>13</sup> Ani atsia agie pi uo me: «Yi ayó tia ane bhende li lílí aziba e de.»<sup>14</sup> Osudha atsia ayi di ani me: «A la ya-a, a ayo me ya mene naaya pi?» Ani atsia agie pi uo me: «Yi agbúlu tia ka kpála bini ne

---

<sup>†</sup>3:4-6 Tsia bhú Isa. 40:3-5.

kpéke, di ne eu de. Engú bini, yi mbíla bha tia na kulu gba yi ko.»

<sup>15</sup> Maka li okpála adu adjeke nago ka Masiya lie, u atsia adu ayi lio li bua o pindji Djaa me: «A ko ndi-e Masiya inde li Ebhe atima e di?» <sup>16</sup> Djaa atsia agie pi ndu uo hana me: «Ngama-a, ma ngabatisa naama yi ne engu. Engú bini, a ngago pita ma ne kpála. Kpála ango-o ane ma ne angu. Ma belegu ne tetele kpála ade ngubula me ma bhulu ekpu na maloke gba ani-o.<sup>d</sup> Ani abátisa yi ne Bu Bhobua di ne djua. <sup>17</sup> Ani aholo kakpa gba e sa 'kpa e ngu nape nguwa gba e-o. Ani apó bhúla nguwa na babadha gba e bhú ngbokopi, engú la bini, ani tsia bú fufukudha-a bhú djua inde li kpála bini ti da nabulu e de.»

<sup>18</sup> Djaa aha nani líli koko bhelé pi okpála. Bhúbhú-o, ani atsia adu akpokpo Bádha Ngali gba Ebhe-e pi uo. <sup>19</sup> Ngámá Elode aha nani Elodiade, ele gba ndai e-o.<sup>e</sup> Ani amene nani matá di osisiti 'ngú koko bhelé. Kaka-a, Djaa atsia ambe bhú 'ndji ani. <sup>20</sup> Abhomu-o, Elode amene matá siti 'ngú koko pépé, ani aha Djaa, ani atsia abhike ani bhú tikpu.

### Djaa abatisa Yesu

*(Tsia bhú Mat. 3:13-17, di ne bhú Mk. 1:9-11.)*

<sup>21</sup> Kala me Djaa li bhú tikpu-o, ani abatisa ngaiza ndu okpála hana. Abhomu-o, Yesu atsia asia di batisimo. Nedhinga li Yesu adu akpokpo 'ngú ne Ebhe lie, kokpi abhulu lie, <sup>22</sup> u au Bu Bhobua ngaké pi ani maka bebhe. U atsia adje eli ayie abhúla apa me: «Mu ne ndili gba ma na mukunda. Djali li bua ma ngu mu naali.»

### Onguo ogbi Yesu

*(Tsia bhú Mat. 1:1-17.)*

<sup>23</sup> Yesu akpo nani lita kulu gba e me ani nde ne kalanga masikpe de ndjikpa bata.

---

<sup>d</sup>3:16 Nani agba omaYuda-a, kulu nagbe maloke bhú 'dhu ogomago ne navulu 'dhu uo-o, a ko nani kulu ka obalise di ne okpála na padhá.

<sup>e</sup>3:19 Filipino ne ndai Elode nani inde abhele Djaa bhulu nabatisa okpála ko. A adu nani me Filipino nde kpi nga de. Tsia bhú Lev. 20:21.

Okpála adu abhundja naao me, a ko ndili gba Djodjefu .

Djodjefu ndili gba Eli,

<sup>24</sup> Eli ndili gba Matati,

Matati ndili gba Levi,

Levi ndili gba Maleki,

Maleki ndili gba Djanai,

Djanai ndili gba Djodjefu ,

<sup>25</sup> Djodjefu ndili gba Matatiasi,

Matatiasi ndili gba Amosi,

Amosi ndili gba Nauma,

Nauma ndili gba Eseli,

Eseli ndili gba Nagai,

<sup>26</sup> Nagai ndili gba Mata,

Mata ndili gba Matatiasi,

Matatiasi ndili gba Semeini,

Semeini ndili gba Djoseke,

Djoseke ndili gba Djoda,

<sup>27</sup> Djoda ndili gba Yoanana,

Yoanana ndili gba Lesa,

Lesas ndili gba Djelubabela,

Djelubabela ndili gba Salatiele,

Salatiele ndili gba Neli,

<sup>28</sup> Neli ndili gba Maleki,

Maleki ndili gba Adi,

Adi ndili gba Kosama,

Kosama ndili gba Elemadama,

Elemadama ndili gba Ele,

<sup>29</sup> Ele ndili gba Yesu,

Yesu ndili gba Eliedjele,

Eliedjele ndili gba Djolime,

Djolime ndili gba Matati,  
Matati ndili gba Levi,  
<sup>30</sup> Levi ndili gba Simeo,  
Simeona ndili gba Yuda,  
Yuda ndili gba Djodjefu ,  
Djodjefu ndili gba Djonama,  
Djonama ndili gba Eliakime,  
<sup>31</sup> Eliakime ndili gba Melea,  
Melea ndili gba Mena,  
Mena ndili gba Matata,  
Matata ndili gba Natana,  
Natana ndili gba Davidi,  
<sup>32</sup> Davidi ndili gba Yese,  
Yese ndili gba Obede,  
Obede ndili gba Boadja,  
Boadja ndili gba Salamona,  
Salamona ndili gba Nasone,  
<sup>33</sup> Nasona ndili gba Aminadaba,  
Aminadaba ndili gba Adimina,  
Adimina ndili gba Aluni,  
Aluni ndili gba Edjelone,  
Edjelone ndili gba Peledje,  
Peledje ndili gba Yuda,  
<sup>34</sup> Yuda ndili gba Yakobho,  
Yakobho ndili gba Isaka,  
Isaka ndili gba Abalahama,  
Abalahama ndili gba Tela,  
Tela ndili gba Naola,  
<sup>35</sup> Naola ndili gba Seluga,  
Seluga ndili gba Lagau,



Lagau ndili gba Pelege,  
Pelege ndili gba Ebele,  
Ebele ndili gba Sela,  
<sup>36</sup> Sela ndili gba Kainame,  
Kainame ndili gba Alepakasada,  
Alepakasada ndili gba Seme,  
Seme ndili gba Nua,  
Nua ndili gba Lemeke,  
<sup>37</sup> Lemeke ndili gba Matusalema,  
Matusalema ndili gba Enoka,  
Enoka ndili gba Yelede,  
Yelede ndili gba Malalele,  
Malalele ndili gba Kenana,  
<sup>38</sup> Kenana ndili gba Enosa,  
Enosa ndili gba Sete,  
Sete ndili gba Adamu ,  
Adamu ndili gba Ebhe.

## 4

### Djabulu ale Yesu

*(Tsia bhú Mat. 4:1-11, di ne bhú Mlk. 1:12-13.)*

<sup>1</sup> Pita li Yesu abedhe lie ne Bu Bhobua-a , ani ayie lingo 'ngu na Djuladani, Bu Bhobua atsia amba bhula ani abhu mili bili. <sup>2</sup> Oo, Djabulu ale ani ngubula ekpi ndjikpa badha. Bhú oekpi bhomu-o, ani zu 'he de. Pipita-a, gumu aholo amene ani. <sup>3</sup> Abhomu-o, Djabulu atsia apa pi ani me: «I du me mu nde ne Ndili gba Ebhe-e, pa pi teme inde-e me a dji lie, amba a kolo ezu.» <sup>4</sup> Yesu agie pi ani me: «Eli gba Ebhe-e apa me: «Kpala kobho bha bini ka ezu de.†»»

---

†4:4 Tsia bhú Det. 8:3.

<sup>5</sup> Djabulɔ aha anɔ, anɔ ne anɔ apɔ 'ta. Anɔ asuno ndɔ ondende na doto pɔ anɔ hana, bhɔ nedhinga bedi bhomɔ. <sup>6-7</sup> Anɔ atsia apa pɔ anɔ me: «Ebhe aha ndɔ angu, ne otia na ondende bhomɔ-o hana mɔma. Ma ti da nahaha pɔ kpála inde ma akɔnda nahaha pɔ e. I dɔ me mɔ nde akikita lipɔkɔ mɔ kuto kala ma-a, ma ahá ndɔ angu ne otia na ondende bhomɔ-o hana pɔ mɔ.» <sup>8</sup> Yesu atsia agie pɔ anɔ me: «Eli gba Ebhe-e apa me:

«Dhɔgɔ Ebhe Ngámá gba mɔ,  
amba mɔ toko bha bini anɔ kpi e kpi.†»»

<sup>9</sup> Pɔpɔta-a, Djabulɔ aha anɔ, anɔ ne anɔ abhɔ Yelusalema. Anɔ a'o anɔ apɔ tulundji 'ngbé 'ti Ebhe gba omaYuda, anɔ atsia apa pɔ anɔ me: «I dɔ me mɔ nde bha ndjɔ ne Ndili gba Ebhe-e, 'ulu, mɔ kɔ kuto, <sup>10</sup> anga eli gba Ebhe-e apa me:

«Ebhe ahá líli pɔ oandjelu gba e me, u lila mɔ. †»

<sup>11</sup> La di matá:

«U abɔ mɔ sa 'kpa o, amba mo otá 'dhɔ mɔ li teme de.†»»

<sup>12</sup> Yesu atsia agie pɔ anɔ me: «Eli gba Ebhe-e apa la di me: «Mo olé Ebhe Ngámá gba mɔ-o de.†»»

<sup>13</sup> Pɔta li Djabulɔ andjia nale Yesu lie ne ndɔ kpadji hana-a, anɔ atsia a'o ka anɔ ngú nadjeke nedhinga koko.

### **Yesu agie lie bhɔ Galilaya**

*(Tsia bhɔ Mat. 4:12-17, di ne bhɔ Mlk. 1:14-15.)*

<sup>14</sup> Abhomɔ-o, Yesu atsia agie lie bhɔ ndu doto na Galilaya, bhɔ angu gba Bu Bhobua. Ndɔ okpála hana aholo nakpokpo 'ngú gba anɔ-e bhɔ ndu doto bhomɔ-o libhomu. <sup>15</sup> Anɔ adɔ asuno bhɔ oeti gba uo nadje líli gba Moidje-o . Ndɔ okpála hana atsia adɔ adhɔgɔ anɔ.

---

†4:8 Tsia bhɔ Det. 6:13.

†4:10 Tsia bhɔ Ets. 91:11.

†4:11 Tsia bhɔ Ets. 91:12.

†4:12 Tsia bhɔ Det. 6:16.

## Yesu anu bhú Nadjaleta

(Tsia bhú Mat. 13:53-58, di ne bhú Mlk. 6:1-6.)

<sup>16</sup> Pipita-a, ani atsia anu bhú Nadjaleta, kati inde ani abhele bhú e-o. Li 'kpí nago gba omaYuda-a , ani ali bhú 'ti naje líli gba Moidje maka ani adu amemene lie ko. Ani ayie bhú alá ngú natanga eli gba Ebhe-e pi okpála.

<sup>17</sup> Abhomu-o, u atsia aha bhuku gba polofeta Isaya pi ani. Ani abhulu bhuku-o, ani atsia agili bili u aye lie me:

<sup>18</sup> «Bua gba Ngamá-a bhú dabili bini ne ma.

Ani abhu ma ngú nanu nakpokpo Bádha Ngali pi obhulu ndibhili.

Ani atima ma ngú natobhila pi obalise me, u azé bhú bali gba o-o maze, pi okpála i u 'kpí de-e me, u aú matá 'kpí mau.

Ani atima ma di ngú napandja obhende bhú mbolo sa 'kpa obhende ngato mbolo li uo-o.

<sup>19</sup> Ngama-a, ma akpókpo pi okpála me nedhinga inde li Ebhe adjé ndjinga uo lie akolo.†»

<sup>20</sup> Pita li Yesu andjia natatanga lie, ani agagala bhuku-o, ani atsia agie pi kpála na kulu-o. Abhomu-o, ani aha lie adu kuto. Ndu okpála inde adu bhú 'ti oo hana abanga djila o li ani. <sup>21</sup> Ani atsia aholo napa pi uo me: «Engú inde yi adje e bhú Bhuku gba Ebhe-e li bili bhomu-o, amene lie naki amene.» <sup>22</sup> Ndu okpála hana adu angamba li Yesu naali. U atsia adu aziba eli na bádha bhú 'bu inde ani adu akpokpo e-o. Abhomu-o, u atsia adu apa me: «A inde-e ndili gba Djodjefu-o di?»

<sup>23</sup> Abhomu-o, ani atsia apa pi uo me: «Ma ambila na paká me yi apá muma gbitaku inde me: <Mútia, kobho limu ne titi mu.> Yi tsia pá di muma me: <Ya adje ndu 'ngú inde mo omene e bhú Kapitalanauma-a hana. Mene nga la di ngua 'ngú ango-o bhú kati mo obhele bhú e ko.»» <sup>24</sup> Ani atsia apa matá pipita-a me: «A moko, ma apa pi yi me, a ko kaku lu 'ngú, okpála ziziba polofeta bhú kati gba e belegu de bini.

<sup>25</sup> Ma apa pi yi na paká me, oekosi na olisilisi adu nani bhelé bhú ká

---

†4:18-19 Tsia bhú Isa. 61:1-2.

omaɪsalaele li nedhinga gba polofeta Eliya. Li nedhinga bhomɔ-o, ebha dhi nani-i de ngɔbula kalanga bata ne epe madhia. Kaka-a, adyindi na ngbéngbé atsia ali bhú doto ango-o libhomu. <sup>26</sup> Engú bini, Ebhe tima nani Eliya ngú nateteke sɔka oekesi bhomɔ-o bini de. Aní atima bha bini aní gba oko bini na gandji kɛti na Salepeta bhú ndu doto na Sidona. <sup>27</sup> Matá-a, okpála na kába adɔ di nani bhelé bhú ká omaɪsalaele li nedhinga gba polofeta Elisa. Engú bini, Ebhe kobho nani sɔka uo de, bha bini Namana, gandji kpála na Silia.»

<sup>28</sup> Li ndɔ okpála hana inde adɔ bhú 'ti oo adje 'ngú bhomɔ-o lie, u ake 'ngú lio naali. <sup>29</sup> U ayie bhúlá, u agbe aní bhú 'ti bhomɔ-o, u agbele aní apí 'ta inde u ayiki gɔdhɔ gba o pí e-o. U amene nani mo-o ngú nandjimba aní akuto. <sup>30</sup> Engú bini, aní akodho bha 'kpí bhú ká uo oo, aní atsia atapa.

### **Yesu akobho kpála li siti bua adɔ ato mbolo lie**

*(Tsia bhú Mat. 1:21-28.)*

<sup>31</sup> Abhomɔ-o, Yesu anɔ bhú Kapalanauma, kɛti bini na ndu doto na Galilaya. Aní atsia adɔ asuno pí okpála bhú 'kpí nago gba omaYuda-o. <sup>32</sup> U adɔ nangamba li ngua nasuno gba aní-o, anga aní adɔ nasuno ne angu gba Ebhe. <sup>33</sup> Bhú 'ti nadje líli gba Moidje oo, kpála bini li siti bua adɔ nato mbolo lie, aholo asusula kpekpeke me: <sup>34</sup> «Aa! Yesu, kpála na Nadjaleta, mo okɔnda namene ngú ya pí? Mo ogo ngú nabhili ya? Ma mbila mɔ hana, mɔ ne kpála na bubu inde li Ebhe atima e ko!» <sup>35</sup> Yesu atsia ambe bhú 'ndji aní me: «Gbite 'bhɔ mɔ, amba mɔ koto la di bhú kpála bhomɔ!» Siti bua-a agɔ 'i kpála ango-o kuto má gbwe, bhú ká djila ndɔ okpála inde adɔ oo hana. Aní akoto bhú aní, engú bini aní mene aní sisiti de. <sup>36</sup> Ndɔ okpála hana angamba, u atsia adɔ ayi lio sɔnda o me: «A inde-e mangua eli dho? Aní ngaha líli ne kpéke, di ne angu pí osisiti bua, uo ngaze bhú okpála!» <sup>37</sup> Okpála atsia adɔ apa 'ngú gba Yesu-o bhú ndɔ okɛti bhomɔ-o hana.

### **Yesu akobho okpála bhelé na kuo**

*(Tsia bhú Mat. 8:14-17, di ne bhú Mlk. 1:29-34.)*

<sup>38</sup> Li Yesu ayie lie bhú 'ti nadje líli gba Moidje-e, aní atsia anɔ ali bhú 'ti gba

Simo. A abhaka me a nde li 'hi wala Simo ne kpéke bandji. Abhomu-o, u atsia ayo ka Yesu me ani kobho ani. <sup>39</sup> Ani ago ala pi ani, ani ambe bhú 'ndji bandji-o. Abhomu-o, bandji-e atsia ayie li ani. Ani ayie bhúlá kolo má gala, ani atsia aholo nalá 'za pi uo.

<sup>40</sup> Li ela ati lie, ndu okpála hana inde adu ne okpála na kuo ngangá agba o-o, abha uo, u atsia ago ne uo pi Yesu. Ani a'o 'kpa e pí 'ndji uo bini ne bini, u atsia akobho ndu o hana. <sup>41</sup> Osisiti bua aze di bhú okpála na kuo bhelé. Osisiti bua ango-o atsia adu asusula me: «Mu ne Ndili gba Ebhe!» Engú bini, Yesu adu ambe bhú 'ndji uo. Ani atsia adu di agbite kpadji pi uo me u agama 'ngú de, anga u adu ambila hana me a ko Masiya inde li Ebhe atima e ko.

### **Yesu akpokpo Bádha Ngali bhú ndu doto na Yudaya**

*(Tsia bhú Mlk. 1:35-39.)*

<sup>42</sup> Li ekpí aseke lie, ani akoto bhú kuti bhomu, ani atsia atapa bhú mili bili. Bhiti okpála aholo nagili ani. U au ani lie, u aholo akikiliki lio pi ani me: «Mo o'ó ká ya de, ní tigala ne yi si-i.» <sup>43</sup> Engú bini, Yesu apa pi uo me: «A ayo me ma anu di nakpokpo Bádha Ngali Nau gba Ebhe-e bhú okuti koko, anga Ebhe atima ma ngánga.» <sup>44</sup> Abhomu-o, ani atsia adu akpokpo Bádha Ngali bhú oti nadjé líli gba Moidje na ndu doto na Yudaya-o.

## **5**

### **Yesu a'i omakpata na gigina**

*(Tsia bhú Mat. 4:18-22, di ne bhú Mlk. 1:16-20.)*

<sup>1</sup> A akolo ekpí bini, Yesu adu lingo ekpe na Genedjaleta.<sup>f</sup> Bhiti okpála asula de ani má wakaka ngú nadjé 'li Ebhe. <sup>2</sup> Ani au zabu bhisi lingo 'ngu me obhubhulu-o nde aze, u nde ngavulu onado gba o na sungu-o. <sup>3</sup> Yesu atsia a'u bhú susuka bini, bhende gba Simo-o. Do ani pi Simo me: «Yie lingo 'ge-o, amba mu dyudyo limu mbo ne abhú 'ngu.» Yesu atsia adu bhú zabu-o kuto. Ani aholo nasuno pi bhiti

---

<sup>f</sup>5:1 *Genedjaleta*: A ko 'ili koko na ekpe na Galilaya. Tsia bhú Mlk. 6:53.

okpála bhomu-o. <sup>4</sup> Aní andjia nagama 'ngú lie, aní atsia apa pí Simo me: «Dyudyo zabu-o apí tsiba, amba ngayi ne obi mu-o, yi bala onado gba yi-e bhú 'ngu ngú naholo osungu-o.»

<sup>5</sup> Simo agie pí aní me: «Musunu, ya amene kulu sukpe inde-e libhomu, ya holo belegu sungu de bini. Engú la bini, ka 'li mu-o, ya abhíke onado-o bhú 'ngu mabhike.» <sup>6</sup> U abala onado lie bhú 'ngu-o, u atsia aholo osungu bhelé. Kaka-a, onado gba uo-o aholo natsotsolo. <sup>7</sup> Abhomu-o, u amene 'kpa o pí obi o inde adu bhú zabu koko ngú na'i uo me, u go ha mbo 'kpa o pí o. Obhobhomu-o ago, u abebedhe ozabu bhisi-e ne osungu bedhebedhe. Kaka-a, ozabu atsia aholo nalinda bhú 'ngu.

<sup>8</sup> Lí Simo Piele au lie mo-o, aní atí bhú lí 'dhu Yesu, aní atsia apa me: «Ngámá, gbe limu de ma ne sidi, anga ma ne siti kpála!» <sup>9</sup> Aní apa mo-o, anga ngauo ne obi e, u angamba nani naali ka bhiti osungu inde u aholo e ko. <sup>10</sup> Djaki ne Djaa , ongisi gba Djebedayo inde adu amene bhú dabili bini ne Simo-o, angamba bhadi moko. Engú bini, Yesu apa pí Simo me: «Mo odjé tsulu de, anga nayie pí mbia inde-e, mu dú matá agili osungu de, engú bini, mo odú ibili agili okpála pí Ebhe.» <sup>11</sup> Abhomu-o, u agbele ozabu gba o apí 'gə. U a'o ka ndu 'he gba o hana, u atsia anu bhú dabili bini ne Yesu.

### **Yesu akobho kpála na kába**

*(Tsia bhú Mat. 8:1-4, di ne bhú Mk. 1:40-45.)*

<sup>12</sup> A akolo ekpí bini, Yesu adu bhú kuti bini na ndu doto na Galilaya, kpála bini inde lí kába atsotsolo kute e hana-a, akoto. Lí aní au Yesu lie, aní ago atí kala aní, aní atú bhúla e ne kuto, aní atsia alopole lie pí aní me: «Ngámá, i du me mu nde akanda-a, mu ti da nakobho ma.» <sup>13</sup> Yesu aha 'kpa e a'o lí aní. Aní atsia apa me: «Ma akanda moko, kokobho!» Abhomu-o, kába agulu bha kolo lí kute kpála ango-o hana maka ndjombe. <sup>14</sup> Yesu atsia aha lílí pí aní me: «Mo opá belegu engú inde-e pí kpála bini de. Engú bini, nu suno bha limu pí dimandə gba Ebhe maka lí kute mu nde lie ko. Pipita-a, amba mu ha makiso maka lí lílí gba Moidje apa lie, ngubula napana pí ndu okpála hana me mo okobho.» <sup>15</sup> Abana mo-o, engú gba

Yesu adu bha ayangba ne kalanu. Okpala bhelé adu ago apo bhúla o de ani ngú nadje ani, ne di me ani kobho o ne okuo gba o-o. <sup>16</sup> Engú la bini, ani adu anu bhú omili bili. Oo, ani atsia adu akpokpo 'ngú ne Ebhe.

### Yesu akobho dukuto

*(Tsia bhú Mat. 9:1-8, di ne bhú Mlk. 2:1-12.)*

<sup>17</sup> Ekprí bini, Yesu adu asuno pí okpala. OmuFalisai koko ne omusuno na líli gba Moidje inde ayie nani bhú ndu okuti hana na ndu doto na Galilaya ne Yudaya, di ne bhú 'ngbé gudhu na Yelusalema adulu de ani. Ne angu gba Ebhe-e, ani atsia adu akobho okpala na kuo. <sup>18</sup> Li nedhinga bhomu-o, okpala koko ago ne dukuto bini me u nde abi ani pí kalagba. U adu nagili kpadji ngú nato ani abhú 'ti, amba u 'o ani kala Yesu. <sup>19</sup> Engú bini, u ale nali ne ani abhú 'ti pima ka li okpala adu lie bhelé-o. Abhomu-o, u atsia a'hu ne ani apí 'ngbu 'ti. U adu gudho li 'ngbu 'ti-e má vuu! U atsia akè ani ne ekprú tété ne kalagba gba e hana bhú ká okpala kala Yesu. <sup>20</sup> Li Yesu ambila lie me okpala bhomu-o abhuka ni na paká-a, ani atsia apa pí kpala na kuo-o me: «Olia ma, ma a'e osisiti 'ngú gba mu-o a'e.»

<sup>21</sup> Li omusuno na líli di ne omuFalisai adje 'ngú bhomu-o lie, u atsia aholo nabhundja me: «Kpala inde ngasobho Ebhe me-e, a ko nga naae da? A ti da na'e siti 'ngú gba okpala da, bha bini Ebhe ngae kpi e kpi di?» <sup>22</sup> Yesu ambila mabhundja gba uo lie, ani apa pí uo me: «Yi ngabhundja li bua yi mo-o ka ni?» <sup>23</sup> Ne napa me, «Ma a'e osisiti 'ngú gba mu a'e», ne napa me, «Yie bhúlá, amba mu dhuku-o» a ane ne bhuku ne bhedho? <sup>24</sup> Engú bini, ma akunda me yi mbila me ngama, Ndili gba kpala-a, ma ne angu píla doto ngú na'e siti 'ngú.» Abhomu-o, Yesu atsia apa pí dukuto-o me: «Ma apa pí mu me yie bhúlá, ha dabili gba mu-o, amba mu gie limu agba mu!» <sup>25</sup> Kolo má gala me-e, kpala bhomu ayie bhúlá bhú ká djila ndu okpala hana, ani aha dabili inde ani de asi pí e, ani atsia agie lie agba e me ani nde ngadhögè Ebhe. <sup>26</sup> Ndu okpala hana adu angamba naali. U abedhe ne tsulu bedhe, u adu adhogè Ebhe, u atsia adu apa me: «Ya au naki ongú na ngangamba!»

### Yesu a'i Levi

*(Tsia bhú Mat. 9:9-13, di ne bhú Mlk. 2:13-17.)*

<sup>27</sup> Pipita-a, Yesu akoto kilidjo, ani atsia au ndombi bini na mandjandja, adu 'li ani me Levi,<sup>8</sup> ani nde adu kuto bhú bilo gba e-o. Yesu apa pi ani me: «Kpata ma.» <sup>28</sup> Levi ayie bhúlá, ani a'o ka ndu 'he hana, ani atsia akpata Yesu.

<sup>29</sup> Pipita-a, Levi atsia amene 'ngbé anokomia pi Yesu abhú 'ti gba e. Ondombi na mandjandja bhelé di ne okpála koko adu nazu 'he ne uo bhú dabili bini.

<sup>30</sup> Omufalissai di ne omusuno na líli gba o adu nadi matokono, u atsia ayi omukpata gba Yesu-o me: «Ka ni yi ngazu 'he ne nandji vino lie bhú dabili bini ne ondombi na mandjandja di ne okpála na sisiti-e?» <sup>31</sup> Yesu atsia agie pi uo me: «Okpála bhende li kuo nde li o ade-e, u ne gumu matia ade. Engú bini, obhende inde li o ne kuo ne gumu matia ngao. <sup>32</sup> Ma go ngú na'i okpála bhende ngbingbili-e de. Engú bini, ma ago ngú na'i obhende na sisiti-o, ngubula me u dji bua o.»

**Yesu akpo 'ngú pindji natse ezú ngú nayo Ebhe**

*(Tsia bhú Mat. 9:14-17, di ne bhú Mlk. 2:18-22.)*

<sup>33</sup> Okpála bhomu-o apa pi ani me: «Omukpata gba Djaa di ne obhende gba omufalissai ngatse ezú piko ngú nayo Ebhe. Engú bini, obhende gba mu-o la bha naao ngazu 'he ne nandji vino.» <sup>34</sup> Yesu agie pi uo me: «Yi abhundja naayi me yi ti da naholo omaha 'ko elo ne kpeke ngú natse ezú me 'ko elo-o nde nga bha bhú dabili bini ne uo? <sup>35</sup> Nedhinga koko akólo makolo, nedhinga inde li okpála adhépe 'ko elo-o lie bhú ká uo-o. Li oekpi angoo, u tsia tsé la 'zu.»

<sup>36</sup> Yesu atsia aha di gbitaku inde-e pi uo me: «Kpála bini tí da nasidha bongo na mbia, ani tsia há pápála-a ngú nadudu li bongo na didili de. Ani mene mo-o, li bongo na didili-e sídha, la di-e, pála bongo na mbia lé ne bhe na didili-e de.

<sup>37</sup> Kpála bini tí da na'o vino na mbia bhú odidili dhudhu na ko 'nu de. Ani mene mo-o, li vino na mbia bí 'fu, i úpa odidili dhudhu-o. Pandi-e túko, li odhudhu-o

---

<sup>8</sup>5:27 *Levi*: A ko 'ili koko gba Matié.



tsia síti di. <sup>38</sup> Engú bini, a ayo na'o vino na mbia bhadi bhú odhudhu na mbia!<sup>h 39</sup> f  
d̩ me kpála bini nde andji pandi na didili andji-e, ani kánda matá pandi na mbia  
de, anga ani pá me: «Pandi na didili-e ane ne bádha.»»

## 6

### Yesu aziba me ni ne ngámá pí 'ndji ekpí nague gba omaYuda

*(Tsia bhú Mat. 12:1-8, di ne bhú Mlk. 2:23-28.)*

<sup>1</sup> Ekpí bini nague gba omaYuda-a, Yesu ne om̩kpata gba e ad̩ akodho 'kpí  
bhú ngu 'z̩ inde u a'i e me ngano. Om̩kpata gba ani-e aholo akodho 'ndji 'ndji,  
atutuluba sa-tikpa o, u atsia ad̩ nazuz̩.<sup>i 2</sup> Om̩Falisai koko ayi uo me: «Yi  
ngamene bhom̩-o ni? Lílí gba ní-e ziba namene kulu bhú 'kpí nague de.» <sup>3</sup> Yesu  
atsia agie pí uo me: «Yi atanga ndjindji bhú Bhuku gba Ebhe-e , engú nani lí  
Davidi amene e? Ekpí bini, ngaani ne omaha e, u ad̩ lie ne g̩m̩-o, <sup>4</sup> ani ali nani  
bhú 'ti Ebhe. Ani aha mapa inde u a'o e ngú nadhögö Ebhe-e, ani az̩. Ani atsia  
aha di pí omaha e, abana lí lílí gba ní-e apa lie me az̩ bha mapa ango-o ne  
odimand̩-o .» <sup>5</sup> Yesu atsia apa matá pí uo me: «Yi mbila me ngama, Ndílí gba  
kpála-a, ma ne ngámá pí 'ndji ekpí nague.»»

### Yesu akobho kpála lí 'kpa e ad̩ ne eze

*(Tsia bhú Mat. 12:9-14, di ne bhú Mlk. 3:1-6.)*

<sup>6</sup> A ad̩ nani ekpí nague koko bini, Yesu ali bhú 'ti nadjé lílí gba Moidje-o . Ani  
akolo lie oo, ani atsia aholo nasuno. Bhú ká okpála-a, bhoko bini ad̩ oo, ad̩  
lí 'kpa ani na kokpa-a ne eze. <sup>7</sup> Om̩suno na lílí gba Moidje di ne om̩Falisai ad̩  
agílí kpadji ngú nap̩ ngbángá Yesu me, ani ngamene siti 'ngú. Kaka-a, u aholo

---

<sup>h5:38</sup> Yesu ak̩nda napa bhom̩-o me, u tí da na'o nasuno gba ni na mbia pí bhe  
gba om̩Falisai-e de.

<sup>i6:1</sup> Agba omaYuda-a, i d̩ me kpála nde ngakodho ngano-o, amba ani ngamene  
bhom̩-o kulu. La-a, lílí gba uo-o ziba namene kulu bhú 'kpí nague-o de. Tsia  
bhú Det. 23:26, di ne bhú Lev. 23:5-14.

atsia ani ne kpéke djila atigala ani kóbho kpála li 'kpí nague.

<sup>8</sup> Engú bini, li Yesu ambila lie me ali bua uo oo, u ngabhundja mo-o, ani atsia apa pi kpála li eze adu li 'kpa e me: «Yie bhúlá, amba mu lu si bhú ká djila ndu okpála hana.» Kpála ango-o ayie bhúlá, ani atsia alu kala ndu okpála inde adu bhú 'ti oo hana. <sup>9</sup> Pipita-a, Yesu atsia apa pi uo me: «Ma ne engú bini ngú nayi yi tété: Li 'kpí nague, líli gba ní-e aziba pi? U mene bádha 'ngú, ne me u mene siti 'ngú? U kobho kpála, ne me u akóbho ani de?» <sup>10</sup> Ani atsia ndu uo hana bini ne bini. Abhomu-o, ani atsia apa pi kpála na eze-e me: «Gbele 'kpa mu.» Kpála ango-o agbele 'kpa e, 'kpa ani atsia akolo ndjindji. <sup>11</sup> Engú bini, okpála ango-o abi 'gú naali, u atsia aholo nayi lio sunda o me: «Ní ti da namene ngú Yesu mangua 'ngú dho?»

### **Yesu alo obhulu titima ndjikpa ne ká bhisi**

*(Tsia bhú Mat. 10:1-4, di ne bhú Mk. 3:13-19.)*

<sup>12</sup> Bhú oekpí bhomu-o, sukpe bini, Yesu a'lu apí 'ta ngú nakpokpo 'ngú ne Ebhe. Sukpe libhomu ani asi nakpokpo 'ngú ne Ebhe. <sup>13</sup> Li ekpí aseke lie, ani a'i omukpata gba e-o, ani atsia alo okoko bhú ká uo ndjikpa ne ká bhisi inde ani agisila nani 'li o me obhulu titima gba Yesu. <sup>14</sup> A adu nani Simo (inde li Yesu agisila 'li e me Piele) ne ndai e Andili, Djaki ne Djaa, Filipino ne Batelemi, <sup>15</sup> Matié ne Tuma, Djaki ndili gba Alafayo ne Simo (inde u a'i e me kpála inde akunda doto gba e), <sup>16</sup> Djude ndili gba Djaki ne Yuda Isikaliote, inde apu Yesu pi obhulu yala-o.

### **Yesu asuno pi bhiti okpála**

*(Tsia bhú Mat. 4:23-25.)*

<sup>17</sup> Ani aké ne uo, ani atsia alu asabu 'ta li bili li omukpata gba ani koko bhelé adu lie ko. Okpála bhelé na ndu doto na Yudaya libhomu, na Yelusalema ne ogudhu na ngo 'ngbé 'ngu, gudhu na Tile ne Sidona adu di oo. <sup>18</sup> Okpála ango-o ago nani ngú naje Yesu, amba ani kobho di obhende adu ne okuo-o. Ani atsia akobho di okpála inde li osisiti bua adu ato mbolo li o ko. <sup>19</sup> Ndu okpála hana adu

nagilí nabu 'kpa o li kute ani, anga ndu uo hana adu akobho ka angu inde adu bhú ani-o.

### **Yesu akpo 'ngú pindji djali ne likabhu**

*(Tsia bhú Mat. 5:1-12.)*

<sup>20</sup> Yesu atsia omakpata gba e-o, ani atsia apa pi uo me:

«A ko djali pi yi, ngayi obhulu ndibhili,  
anga Ebhe ne ngamá gba yi-e ngae!

<sup>21</sup> A ko djali pi yi, ngayi obhende ngadje gumu mbia inde,  
anga yi azú 'he, yi tsia 'ú 'u!

A ko djali pi yi, ngayi obhende ngaku 'gba mbia inde,  
anga yi amú 'zo!

<sup>22</sup> A ko djali pi yi, i du me okpála nde ngayala yi, u nde ngagbe yi bhú ká o, u nde ngasobho yi, u nde ngapa 'ngú gba yi-e sisiti kabula ma, Ndili gba kpála. <sup>23</sup> Li nedhinga ango kolo, yi de kpi djali, amba yi dho di ebi, anga makalá na ngbéngbé ngadjeke yi abhúla. Oghi uo adu nani amene bhadi opolofeta sisiti moko.

<sup>24</sup> Engú bini, a ko likabhu pi yi obhulu tia,  
anga yi asia makalá gba yi-e asia!

<sup>25</sup> A ko likabhu pi yi, ngayi obhulu ká 'zú mbia inde,  
anga yi adú adjé gumu!

A ko likabhu pi yi, ngayi obhende ngamu 'zo mbia inde,  
anga yi adú bhú talia, yi tsia dú naku 'gbá!

<sup>26</sup> A ko likabhu pi yi, i du me ndu okpála hana nde ngapa 'ngú gba yi-e ndjindji, anga ogbi uo adu apa bhadi nani babadha 'ngú moko li opolofeta na eu ko!»

### **Yi kunda obhulu yala gba yi-o**

*(Tsia bhú Mat. 5:38-48, 7:12a.)*

<sup>27</sup> «Engú bini, ma apa la pi yi me, ngayi obhende ngadje ma-a, yi kunda obhulu yala gba yi-o. Yi mene bádha 'ngú pi obhende ngayala yi ko. <sup>28</sup> Yi yo me bisagu gba Ebhe-e go pi okpála bhende ngatu pedje li yi, amba yi yo Ebhe pi obhende

ngamene yi sisiti ko. <sup>29</sup> Li kpála bini sɛ pála mɛ li pápá bini-e, mɛ de dji di pápá koko pí aní, amba aní sɛ.<sup>†</sup> Li kpála bini gbɛlɛ koti gba mɛ-o, mɛ de 'o di aní amba aní ha bongo na mbulu mɛ-o. <sup>30</sup> Li kpála yo 'he ka mɛ-o, mɛ de ha pí aní. I dɛ me kpála bini nde agbɛlɛ 'he ka mɛ-o, mo oyó matá ka aní de. <sup>31</sup> Yi mene pí okpála koko bhadi maka bhende yi akɛnda me u mene e pí yi ko.

<sup>32</sup> I dɛ me yi nde ngakɛnda bha bini okpála bhende ngakɛnda yi-e, yi abhúndja de me yi asía makalá kaka-a de, anga okpála na sisiti-e, u ngakɛnda bhadi okpála bhende ngakɛnda o ko! <sup>33</sup> I dɛ me yi nde ngamene bha bini bádha 'ngú pí okpála bhende i ngamemene pí yi-e, yi abhúndja de me yi asía makalá kaka-a de, anga okpála na sisiti-e bhadi ngamemene moko! <sup>34</sup> I dɛ me yi nde ngaha bha bini 'he pí okpála inde yi abhúndja me u tí da di nagigie pí yi lí 'kpí koko-o, yi abhúndja de me yi asía makalá kaka-a de. Abana okpála na sisiti, u ngaha di 'he pí obi o okpála na sisiti ngɛbula me, u gie di pí o lí 'kpí koko!

<sup>35</sup> Engú bini, yi kɛnda obhɛlɛ yala gba yi-o. Yi mene bádha 'ngú pí uo. Yi ha 'he pí uo me yi nde bhúndja de me u agíe pí yi magie de. Yi asía 'ngbé makalá. Yi mene mo-o, yi tsia dɛ ongisí gba Ebhe Apí 'Kpí, anga ngaani-e, aní babadha pí okpála inde i gie heni pí aní de. Aní di babadha pí okpála na sisiti. <sup>36</sup> Yi bedhe ne ndjinga pí okpála maka lí 'dyí yi Ebhe abedhe di ne di líe pí okpála ko.»

### **Yi akódho 'ngú gba okpála koko de**

*(Tsia bhú Mat. 7:1-5.)*

<sup>37</sup> «Yi akódho 'ngú gba okpála koko de, amba Ebhe akódho di 'ngú gba yi-e de. Yi a'ó engú pí okpála koko de, amba Ebhe a'ó di engú pí yi de. Yi mbu lí siti 'ngú gba okpála koko, amba Ebhe mbu di lí siti 'ngú gba yi ko. <sup>38</sup> Yi ha 'he pí okpála koko, amba Ebhe ha di 'he pí yi. Aní abédhe kíli gba yi-e ne nguwa bedhe má kpambi, i hóló nabala kuto. A moko, Ebhe ahá bhadi pí yi maka lele yi ngahaha pí okpála koko líe ko.»

<sup>39</sup> Yesu atsia apa matá pí uo gbitaku bini me: «Kpála i u 'kpí de-e tí da

---

<sup>†</sup>6:29 Agba omaYuda-a, nasɛ kpála lí pabhɛ e-e, a ko sobho na ngbéngbé.

naholo 'kpa kilí e inde i u 'kpí de ngú nasuno kpadji pi ani uu? A mo-o ade! I da mo-o, li ndu uo bhisi hana bála bhú 'dú. <sup>40</sup> Mækpata bini ne mäsuno gba e ne imbilangu de. Engú la bini, ndu mækpata hana inde u asuno 'he pi e ndjindji-e, ani kólo maka mäsuno gba e-o. <sup>41</sup> Ka ni ma ngau mboye ka mäsoli inde bhú djila ndai ma-o lie, ma tsia u la ndula inde bhú djila ma-o de? <sup>42</sup> Lele pi ma ti da napa lie pi ndai ma me: «Ndai ma, 'o ma, ma gbe mboye ka mäsoli inde bhú djila ma bhomu», ngamu-o, ma nde u ngala belegu de ndula inde bhú djila ma-o? Bhulu kali, gbe ngaiza ndula inde bhú djila ma-o. Pipita-a, ma tsia u la 'kpí ndjindji ngú nagbe mboye ka mäsoli inde bhú djila ndai ma ko.»

### **Ndula ne lí e**

*(Tsia bhú Mat. 7:16-20, 12:33-35.)*

<sup>43</sup> «Ndula na babadha lili lílí na sisiti de. La di-e, ndula na sisiti lili lílí na babadha de. <sup>44</sup> U mbila ndula li lí e. U koko manga li ndula na eti de. La di-e, u koko malibhombi li kobe de. <sup>45</sup> Kpála na babadha-a, ka bádha 'ngú inde li bua ani-e, ani méne bhadi engú na babadha. La di-e, kpála na sisiti-e, ka siti 'ngú inde li bua ani-e, ani méne bhadi engú na sisiti. Engú inde ngakoto bhú 'bhø kpála-a, a ko engú inde ngayie ali bua ani ko.»

### **Oeti bhisi**

*(Tsia bhú Mat. 7:24-27.)*

<sup>46</sup> «La ka ni yi nga'i ma lie ndu 'kpí hana me: «Ngámá, Ngámá?» Yi la ngamene engú inde ma ngapa e pi yi me yi mene e ade. <sup>47</sup> Kpála bini inde agó abháka ma, adjé 'li ma, ani tsia méne maka ma apa lie, ma akunda napana pi yi me ani maka da. <sup>48</sup> Ani maka kpála inde aholo nayiki eti. Ani adjí edú tsutsu, ani atsia a'o 'dhu 'dhu-o pí teme. Li engu asi lie, a ago atu lie li kate eti-o, eti ango-o tsia dyiki de, anga a alu kpekpeke. <sup>49</sup> Engú bini, kpála bhende adje 'li ma, ani tsia mene maka ma apa lie de-e, ani maka kpála inde ayiki eti gba e pí doto. 'Dhu 'dhu tété ade. Li engu asi lie, a ago atu lie li kate eti-o. Eti-e atuko bha kolo má gala, a atsia agugumu hana má kpøkøbhø!»

## Yesu akobho kpála na kulu gba ngámá bini gba osudha

(*Tsia bhú Mat. 8:5-13.*)

<sup>1</sup> Pita aní andjia napa ndu ongu bhomu-o lie hana pi okpála-a, aní atsia atapa bhú kúti na Kapalanauma. <sup>2</sup> Oo, abhú Kapalanauma-a, ngámá bini gba osudha na Loma,<sup>j</sup> adu ne bali gba e bini inde aní adu akunda e naali. A adu li bali ango-o ne kuo masikpe de me aní kodho bua e. <sup>3</sup> Li aní adje 'ngú gba Yesu-o lie, aní atsia atima obhelesi okpála koko gba omaYuda agba Yesu. U anu napa pi aní me, aní go kobho bali gba ngámá ango-o. <sup>4</sup> Li obhelesi okpála bhomu-o akolo de Yesu lie, u atsia aholo nakikiliki lio pi aní me: «Mú ti da namene ehe inde aní ayo e pi aní, i du me mu nde akunda-o, anga aní ndjindji. <sup>5</sup> Aní kunda di omaha ní naali. Aní ayiki eti nadjé líli gba Moidje pi ní ngae.»

<sup>6</sup> Abhomu-o, Yesu atsia aholo 'nú ne uo. Aní akolo lie de kúti-e masikpe-e, ngámá gba osudha-a atsia atima obi e me u pa pi aní me: «Ngámá, mo ondála limu de. Ma ne kpála na padhá. A ayo ka mu nali bhú 'ti gba ma-a de.<sup>k</sup> <sup>7</sup> Kaka-a, ma u igini lima ndjindji de me ma go kolo li mu ngama-a de. Engú bini, pa bha koli eli bini, amba bali gba ma-a kobho. <sup>8</sup> Ma ngapa mo-o, anga ma sa líli gba ongámási. Ma la di ngaha líli pi osudha. Ma pa pi bhe bini-e me: «Nunu!» Aní nú. Ma pa pi bhe koko-o me: «Gogo!» Aní gó. Ma pa pi bali gba ma-a me: «Mene 'he inde!» Aní méne.»

<sup>9</sup> Li Yesu adje engú inde li ngámá bhomu-o apa e lie, aní angamba naali. Aní adji lie, aní atsia apa pi bhiti okpála inde adu akpata aní-e me: «Ma apa pi yi me, ma bhaka nga ngua kpála inde abhuka ma me-e de, belegu de bhú ká omaIsalaele!» <sup>10</sup> Li okpála na titima agie lio lie agba ngámá-a, u abhaka me kuo

---

<sup>j</sup>7:2 *Ngámá gba osudha na Loma:* Ngámá bini gba osudha na Loma: Ngámá ango-o nani ne ngámá pí 'ndji osudha kámá bini. A adu nani maYuda de.

<sup>k</sup>7:6 Li maYuda bini li bhú 'ti gba kpála inde ne maYuda ade-e, li maYuda ango-o kólo sisiti kala Ebhe.

nde ayie li bali gba ngámá angó-o ayie.

### **Yesu azuku ndili na bhobhoko gba oko bini na oele**

<sup>11</sup> Pita li Yesu akobho bali gba ngámá bhomu-o lie, ani atsia atapa bhú gudhu na Naine. Omukpata gba ani ne okpála bhelé anu bhú dabili bini ne ani. <sup>12</sup> Ani akolo li 'bhe bhoti na gudhu-o lie, a abhaka me u nde adji ne ngbangba makombi bini ngú nazizi. A ko nani koli ndili na bhobhoko bini gba oko bini na oele. Okpála bhelé na gudhu bhomu-o adu bhú dabili bini ne ole angó-o.

<sup>13</sup> Abhomu-o, Ngámá Yesu au ani. Li ani au ani lie, ani adje ndjinga ani naali. Ani atsia apa pi ani me: «'O naku 'gbá!» <sup>14</sup> Pipita-a, ani adyudyo lie, ani a'o 'kpa e li ngbangba-o. Abhomu-o, okpála inde abi kuo atsia alu. Yesu atsia apa pi makombi bhomu-o me: «Ma apa pi mu me, yie bhúlá!» <sup>15</sup> Kpála inde adu igini me ani nde akpi-e, ani ayie bhúlá, ani adu madu. Ani atsia aholo nagama 'ngú. Abhomu-o, Yesu atsia aha ani pi 'hi e. <sup>16</sup> Ndu okpála hana adje tsulu. U adu adhoghe Ebhe, u atsia adu apa me: «'Ngbé polofeta akoto bhú ká ní! Ebhe ago nateteke okpála gba e-o!» <sup>17</sup> Ngali na engú li Yesu amene e atsia agbolo bhú ndu doto na Yudaya libhomu di ne bhú okuti na ngongo-o hana.

### **Djaa bhulu nabatisa okpála atima okpála agba Yesu**

*(Tsia bhú Mat. 11:2-19.)*

<sup>18</sup> Li omukpata gba Djaa agie lio lie, u atsia akpokpo ndu ongamba 'ngú inde li Yesu amene e hana pi Djaa. Abhomu-o, ani a'i okpála bhisi bhú ká uo. <sup>19</sup> Ani atsia atima uo ngú nayi Yesu me: «Ne me mu ne Masiya inde ngago, ne me ayo me ya adjeke kpála koko?» <sup>20</sup> Li okpála bhomu-o akolo lie de ani-e, u atsia apa pi ani me: «Djaa bhulu nabatisa okpála atima ya me ya go yi mu me: «Ne me mu ne Masiya inde ngago, ne me ayo me ya djeke kpála koko?»»

<sup>21</sup> Bha li nedhinga bhomu-o, Yesu akobho okpála bhelé na kuo. Ani akobho obhende adu ne okuo ngangá. Ani akobho di obhende adu ne osisiti bua bhú o-o. Ani atsia abhulu di djila okpála bhelé inde i u 'kpi de-e bhú bádha bhú 'bu gba e-o. <sup>22</sup> Pipita-a, ani atsia agie pi okpála li Djaa atima o-o me: «Yi nu kpokpo pi

Djaa engú inde yi au e, di ne bhende yi adje e ko. Okpála i u 'kpí de-e ngau 'kpí. Obhende ne eze li 'dhá o-o, u ngadháká ndjindji. Okpála na kába ngakobho. Obhende i dje 'kpí de-e ngadje 'kpí. Obhende amu-o ngazuku. Ma ngakpokpo Bádha Ngali pi obhulá ndibhili. <sup>23</sup> A ko djali pi kpála inde i bhúka ma ne bua na bhisi bhisi de ko!»

### Yesu akpokpo 'ngú gba Djaa bhulá nabatisa okpála

<sup>24</sup> Bhiti okpála adá oo. Píta li obhulá titima gba Djaa agbida lie, Yesu atsia aholo akpokpo 'ngú gba Djaa pi uo me: «Yi aná igini natsia abhú 'gá-o ní? Yi aná igini natsia kpála inde maka mbamba inde ngadyiki ka anvi-e? A mo-o ade. <sup>25</sup> I dá mo-o de-e, yi aná la igini natsia ní? Kpála inde adyi babadha bongo-o ? A mo-o ade, anga obhende ngadyi babadha bongo-o, inde di ne ká tia ka o-o ngadá abhú 'ti gba ongámási. <sup>26</sup> Yi aná nga la igini natsia ní? Polofeta? A moko, ma apa pi yi me, yi au bhende ane belegá polofeta mane. <sup>27</sup> Padhá de, anga a ko kpála inde li eli gba Ebhe-e apa 'ngú gba e me:

«Ebhe apa me, ma ngatima bhulá titima gba ma-a  
pi má kalaná  
ngú naleke kpadji pi má.†»

<sup>28</sup> Ma apa pi yi me, Djaa ngbéngbé ane ndá okpála hana. Engú bini, kpála inde ane ne mboye bhú Náá gba Ebhe-e , ani ane ani ne engbé.»

<sup>29</sup> Ndá okpála hana, belegá ondombi na mandjandja adá adje Yesu. Abhomá-o, u ambila nani ngbili 'ngú gba Ebhe-e lie, Djaa atsia abatisa uo. <sup>30</sup> Engú bini, omáFalísai ne omásuno na líli gba Moidje ayala nani me Djaa batisa o. U amene lie mo-o, u ayala engú inde li Ebhe adá akúnda e pi uo-o.

<sup>31</sup> Do Yesu matá me: «Ma tí da nasuno okpála na naki si li da? Uo maka da?

<sup>32</sup> Uo maka ongisi inde adulá bhú daposó. Okoko ngasúsula pi obi o me:

«Ya abhi ngbabi na ebi pi yi,  
engú bini, yi tsia dho 'bi de!  
Ya ali etsi na da kuo pi yi,

---

†7:27 Tsia bhú Mal. 3:1.



engú bini, yi ku 'gbá de!»

<sup>33</sup> Padhá de, anga Djaa bhulɛ nabatisa okpála ago, ani zɛ 'he maka okpála koko de, ani ndji di vino de, do yi me: «A bhú ani ne siti bua!» <sup>34</sup> Ngama, Ndili gba kpála, ma ago, ma ngazɛ 'he maka okpála koko, ma ngandji vino, do yi me: «Yi tsia nga kpála inde ngabundja bha bini nazɛ 'he di ne nandji vino! Ani ngakɛnda ondɔmbi na mandjandja, a ko la di olia okpála na sisiti!» <sup>35</sup> Engú bini, ndɛ okpála hana inde abhuka imbilangɛ gba Ebhe-e, u ambila me imbilangɛ ango-o ngbingbili.»

### Yesu azɛ 'he abhú 'ti gba Simo mɛFalisai

<sup>36</sup> A adɛ nani mɛFalisai bini, ani a'ɪ Yesu ngú nazɛ 'he bhú dabili bini ne e. Yesu ali bhú 'ti gba mɛFalisai-o. Oo, ani atsia aholo nazɛ 'he-o. <sup>37</sup> Ɖlɔ bini na sisiti adɛ bhú gɛdhɛ bhomɛ-o. Ani adje lie me Yesu ngazɛ 'he abhú 'ti gba mɛFalisai bhomɛ-o, ani ago ne gili bini inde u abho e li teme inde u a'ɪ e me alabatele.<sup>1</sup> Gili ango-o abedhe nani ne mɛngotsi bedhe. <sup>38</sup> Ani akolo lie, ani atsia akita bhú li 'dhɛ Yesu li pápá ne akele ani. Ani aholo naku 'gbá, ngula adɛ atuko li 'dhɛ Yesu. Abhomɛ-o, ani aholo nakukuo ne sundjo e. Ani akama 'dhɛ ani, ani atsia aha mɛngotsi-e, ani atuko tété. <sup>39</sup> Li mɛFalisai inde a'ɪ Yesu au lie mo-o, ani atsia apa li bua e me: «Kpála inde-e, a ko bha ndjɛ polofeta de kɛkɛlɛ! Padhá de, anga ɔlɔ inde ngabu 'kpa e li ani bhomɛ-o, a ko siti ɔlɔ. Ani mbila la-a de!»

<sup>40</sup> Abhomɛ-o, Yesu atsia apa pi mɛFalisai-e me: «Simo, ma mbo ne engú bedi napapa pi mɛ.» Simo atsia agie me: «Mɛsuno, papa.» <sup>41</sup> Yesu atsia apa me: «Kpála bini aha nani bopulu pi okpála bhisi. Ani aha pi kpála bhe bini-e lí falanga kámá bhuluvue. Ani atsia aha pi kpála bhe koko-o lí falanga ndjikpa bhuluvue.

<sup>42</sup> Li tia dɛ la lie ka okpála ango-o ngú nagigie de-e, abhomɛ-o, ani atsia ambu li bopulu gba ndɛ uo bhisi hana. Bhú ká okpála bhisi bhomɛ-o, akɛnda ani ané mane ne bhedho?» <sup>43</sup> Simo atsia agie me: «Ma abhundja me a ko kpála bhende u ambu li bopulu gba e adɛ bhelé naali ko.» Do Yesu pi ani me: «Mo opa ndjindji.»

<sup>44</sup> Pipita-a, ani adji lie ne li pápá gba ɔlɔ-o, ani atsia apa pi Simo me: «Mo ou

---

<sup>1</sup>7:37 *Alabatele*: A ko teme na mase naali inde u abhobho oehe maka gili lie ko.

engú li ɛlɛ inde-e amene e au? Ma ali lie bhú 'ti gba mɛ-o, mɛ ha engu mɛma ngú navɛlɛ 'dhɛ ma de.<sup>m</sup> Engú bini, ngaani-e, ani avɛlɛ 'dhɛ ma ne ngɛla na djila e. Ani atsia akuo ne sundjo e.<sup>45</sup> Mɛ kama ma de. Engú bini, ngaani-e, nayie maka ma ali igini lie si-e, akolo pi mbia inde-e, ani 'o nakama 'dhɛ ma de.<sup>46</sup> Mɛ tuko emɛ pí 'ndji ma de. Engú bini, ngaani-e, ani atuko mɛngotsi li 'dhɛ ma.

<sup>47</sup> Kaka-a, ma apa pi mɛ me, mɛkɛnda na ngbéngbé inde ani asuno e, apana me u a'e bhiti siti 'ngú gba ani-e a'e. Engú bini, kpála inde u a'e siti 'ngú gba e me a nde yeye-e, ani pána bhadi mɛkɛnda na yeye.»<sup>48</sup> Abhomɛ-o, ani atsia apa pi ɛlɛ bhomɛ-o me: «Ma a'e osisiti 'ngú gba mɛ-o a'e.»<sup>49</sup> Okpála inde adɛ azɛ 'he bhú dabili bini ne ani aholo nabhundja me: «A inde-e mangua kpála dho? Ani nga 'e belegu siti 'ngú!»<sup>50</sup> Abhomɛ-o, Yesu atsia apa pi ɛlɛ-o me: «Ebhe akobho mɛ, anga mo obhuka ma. Nɛ ne guo 'ngú .»

## 8

### Omɛkpata ndjikpa ne ká bhisi ne olisi koko akpata Yesu

<sup>1</sup> Pipita-a, Yesu adɛ adholo bhú ndɛ ogɛdhɛ di ne bhú ndɛ okɛti hana. Ani adɛ akpokpo Bádha Ngali Naɛ gba Ebhe-e ne ndɛ bili hana. Omɛkpata ndjikpa ne ká bhisi-e adɛ bhú dabili bini ne ani.<sup>2</sup> Olisi koko nani li Yesu apandja osisiti bua bhú o, ne obhe ani akobho o ne okuo-o, a adɛ di bhú dabili bini ne ani. A dɛ nani: Malia (u a'i e me kpála na gɛdhɛ na Magadala) nani li Yesu apandja osisiti bua bhú e mananika-o;<sup>3</sup> Djaani, wala Kudja, ngámá na kulu gba 'ngbé ngámá Elode; Sudjana ne olisi koko bhelé. Ndɛ olisi bhomɛ-o hana adɛ aha tia gba o ngú nateteke Yesu ne omɛkpata gba e ne di.

### Gbitaku gba kpála nalu nguwa

*(Tsia bhú Mat. 13:1-9, di ne bhú Mk. 4:1-9.)*

<sup>4</sup> Okpála adɛ nayie bhú gɛdhɛ bini ne bini, u adɛ ago abhaka Yesu. Li okpála

---

<sup>m</sup>7:44 Simo ha nani engu pi Yesu ngú navɛlɛ 'dhɛ e de, anga Simo adɛ au lie me ni ngbéngbé pi Yesu ngaani. Tsia bhú Dje. 18:4, 19:2.

bhelé adu apəkəbhə bhúla o lie de ani-e, ani atsia apa gbitaku inde-e me: <sup>5</sup> «Kpála bini anu ngú nabala nguwa abhú 'dyi gba e. Ani adu ababala lie, té nguwa koko atsia abala li kpadji. Okpála adedele ne 'dhu o, odhu atsia ago, u azu bhobhomu-o hana. <sup>6</sup> Koko abala li bili na teme. Li ezu-o aze lie, atsia a'ulu anga engu du bhú doto sasa de. <sup>7</sup> Koko atsia abala li bili na eti. A akə lie, ezu-o akə ne eti-e bhú dabili bini. Eti-e atsia agaga ezu-o. Kaka-a, ezu-o bhele ndjindji de. <sup>8</sup> Engú bini, koko atsia abala naae bhú doto na babadha. Ezu-o akə, a atsia ali lílí. Nguwa bini ne bini ali lílí kámá bini.» Yesu atsia apa matá me: «Yi dje ndjindji, i du me a nde li yi ne 'dje 'dje ngú nadjé 'kpí ko!»

**Ka ni li Yesu adu akpo 'ngú lie bhú ogbitaku-o?**

*(Tsia bhú Mat. 13:10-17, di ne bhú Mk. 4:10-12.)*

<sup>9</sup> Omukpata gba Yesu ayi ani me: «Ta gbitaku bhomu-o pi?» <sup>10</sup> Ani atsia agie pi uo me: «Ngayi-e, yi ambila naayi engú inde awo nani lie kalanu pindji Nau gba Ebhe-e ambila. Engú bini pi okpála koko-o, ma akpo engú bhomu-o bhú ogbitaku maka li Bhuku gba Ebhe apa lie me:

«U ti da natsia 'kpí,  
engú la bini, u ú 'kpí de.  
U ti da nadjé 'kpí,  
engú la bini, u mbíla tata-a de.†»

**Yesu akpo ta gbitaku gba kpála nalu nguwa-o**

*(Tsia bhú Mat. 13:18-23, di ne bhú Mk. 4:13-20.)*

<sup>11</sup> «Ta gbitaku bhomu-o me, nguwa-a, a ko eli gba Ebhe-o. <sup>12</sup> Nguwa bhende abala li kpadji-e, a ko okpála bhende ngadje eli gba Ebhe-o. Engú bini, li Djabulu gó, ani tsia dhépe eli ango-o li bua uo, ngú nagbite kpadji pi uo me u abhúka de, amba Ebhe akóbho uo de. <sup>13</sup> Nguwa bhende abala li bili na teme-e, a ko okpála bhende ngadje eli gba Ebhe-e, u tsia sía ne djali hana. Engú bini, eli ango-o lí lí bua uo de. U bha ngabhuka ngubula nedhinga bedi. Li nale kolo-o, u 'ó ká

---

†8:10 Tsia bhú Isa. 6:9.

nabhuka gba o-o. <sup>14</sup> Nguwa bhende abala li bili na oeti-e, a ko okpála bhende ngadje eli gba Ebhe-o. Engú bini, u ne gũmũ ndũ 'he na doto ngangá. U ne gũmũ tia na doto ne odjali na mækobho na doto. Gũmũ tia na doto ne odjali na mækobho na doto ango-o ngagaga Eli-o. Kaka-a, eli bhomũ-o lí lílí nabhele mabhele de. <sup>15</sup> Nguwa bhende abala bhú doto na babadha-a, a ko okpála bhende ngadje eli gba Ebhe ne bua na babadha, u tsia zíba. U líla ndjindji, u tsia lí lílí ka kekele gba o ko.»

### **Gbitaku na eke**

*(Tsia bhú Mlk. 4:21-25.)*

<sup>16</sup> «Í dũ me kpála bini nde adhedhe eke-e, aní búku ne læsa de. Aní tó di asa polo de. Engú bini, aní 'ó pí 'he ngũbula me okpála inde ngali bhú 'ti-e, u u 'kpí tété ndjindji. <sup>17</sup> A moko, ndũ 'he hana inde awo lie mawo-o, akóto bhú mbasũ. Ndũ 'he inde na pepe hana akóto li zi 'kpí, li okpála tsia mbíla. <sup>18</sup> Kaka-a, 'e-e! Yi lila liyi bhú nadjé eli-o, anga kpála li ehe nde ka e, u ahá matá koko pí aní pépé. Engú bini, kpála inde li ehe nde ka e ade-e, u adhépe belegũ mboye 'he bhende aní ngabhundja me a ka ní ko.»

### **'Hi Yesu ne ondaise Yesu**

*(Tsia bhú Mat. 12:46-50, di ne bhú Mlk. 3:31-35.)*

<sup>19</sup> 'Hi Yesu ne ondaise Yesu ago ngú natsia aní. Engú bini, u ale nakolo li aní pima ka bhiti okpála-o. <sup>20</sup> Abhomũ-o, u atsia apa pí Yesu me: «'Hi mũ ne ondaise mũ akilidjo, u ngakũnda nau mũ.» <sup>21</sup> Engú bini, Yesu atsia apa pí ndũ uo hana me: «'Hi ma ne ondaise ma-a, a ko okpála inde ngadje eli gba Ebhe ne namemene ko.»

### **Yesu ayoko kpéke anvi pí 'ngu**

*(Tsia bhú Mat. 8:23-27, di ne bhú Mlk. 4:35-41.)*

<sup>22</sup> Ekpí bini pipita-a, Yesu ne omũkpata gba e a'ũ bhú zabũ bini. Aní atsia apa pí uo me: «Ní gulu ekpø-o ai 'ngu.» Abhomũ-o, u atsia atapa. <sup>23</sup> Nedhinga u adũ

agulu 'ngu-o lie, Yesu atsia ati ne ela. Kpéke anvi na gipi aholo nape pí ekpè-o. Engu aholo nabedhe bhú zabu-o, kuo atsia akolo de uo masikpe. <sup>24</sup> Omakpata adyudyo lio de Yesu masikpe, u atsia azuku ani me: «Musunu, Musunu, ní adji amú!» Yesu azuku, ani atsia ambe bhú 'ndji anvi di ne wowo 'ngu-o. Abhomu-o, anvi-e a'o nape, engu-o atsia akolo guguo. <sup>25</sup> Do ani pi uo me: «Nabhuka gba yi-e su?» Engú bini, u adu adje tsulu, u atsia adu angamba naali. Abhomu-o, u adu apa sunda o me: «A e mangua kpála dho inde ngaha belegu líli pi anvi ne engu, u ngamemene!»

### **Yesu akobho kpála bini li osisiti bua adu ato mbolo li e**

*(Tsia bhú Mat. 8:28-34, di ne bhú Mk. 5:1-20.)*

<sup>26</sup> Abhomu-o, u akolo bhú ndu doto gba okpála na Gelasa, ayi ekpè bhúla ndu doto na Galilaya. <sup>27</sup> Nedhinga li Yesu adu akoto bhú zabu-o lie, kpála bini na kuti bhomu-o ago ngú nabhaka ani. Kpála ango-o, osisiti bua adu bhú ani. Ekpí bhelé, ani du adyi bongo de, ani du asi bhú 'ti de. La-a, ani adu bha bini adu bhú ká olata. <sup>28-29</sup> Siti bua-a adu agbulu ani piko. Abhomu-o, u atsia adu agbite 'kpa ani ne 'dhu ani ne ekpé di ne gbíndjili ngú nalila ani. Engú bini, kpála ango-o adu atsotsolo gbíndjili di ne ekpè-o má dhu dhu dhu! Siti bua atsia adu amba bhúla ani ne abhú mili bíli. Li kpála ango-o au Yesu lie me-e, ani aholo natu 'ue. Abhomu-o, ani ati bhú li 'dhu Yesu, ani atsia asula kpekpeke me: «Yesu, Ndili gba Ebhe na Apí 'Kpí, mo okunda namene ngú ma pi? Ma ayo ka mu me, mo oméne ma sisiti de!» Ani apa nani mo-o, anga Yesu adu aha líli pi siti bua ango-o me ani koto bhú kpála bhomu-o makoto.

<sup>30</sup> Yesu atsia ayi kpála ango-o me: «A 'li mu pi?» Ani agie me: «A 'li ma me <Bhelé.>» Ani apa mo-o anga osisiti bua bhelé ali nani bhú ani. <sup>31</sup> Osisiti bua ango-o atsia adu akikiliki lio pi Yesu me: «Mo ombá ya bhú tsu 'dú bhe má ngbongobho-o de!» <sup>32</sup> A abhaka me 'ngbé piga opame bini nde ngagili 'zu gba o pí 'ta oo. Osisiti bua-a atsia apa pi Yesu me: «Ha kpadji pi ya, ya li bhú opame

bhomu-o.» Aní atsia azíba pí uo.<sup>n</sup> <sup>33</sup> Abhomu-o, osisiti bua aze bhú kpála ango-o, u atsia amba lío bhú opame-o. Píga opame bhomu-o libhomu ayie ne holo apí 'ta, u anu alilinda bhú ekpe-o, u atsia amu.

<sup>34</sup> Lí omúlila gba opame au engú inde akodho 'kpí-e lie, u atsi ne holo, u atsia anu nakpokpo ngali ango-o abhú gúdhú ne abhú okúti. <sup>35</sup> Okpála aze ngú nau engú inde akodho 'kpí-o. U akolo de Yesu lie, u abhaka me kpála inde lí osisiti bua aze bhú e nde adu kuto bhú lí 'dhú Yesu. Aní adu me aní nde adyi bongo, aní nde ngabhundja 'ngú hana ndjindji. Abhomu-o, tsulu atsia aholo uo. <sup>36</sup> Okpála inde au ndu 'ngú bhomu-o hana atsia akpokpo pí uo maka lí Yesu akobho kpála ango-o lie ko.

<sup>37</sup> Abhomu-o, ndu okpála hana na ndu doto bhomu-o atsia apa pí Yesu me aní yie bhú kúti gba o mayie, anga u adu adje tsulu naali. Yesu a'u bhú zabu-o ngú na'e ne enú. <sup>38</sup> Kpála inde lí osisiti bua aze bhú e aholo nalopolo lie pí Yesu me: «Yesu, í dú me má nde akúnda-a, mo o'ó ka ma de, ní nu ne má.» Engú bini, Yesu agie aní sidi, aní atsia apa pí aní me: <sup>39</sup> «Gie límú agba má, amba má kpokpo ndu 'ngú inde lí Ebhe amene e pí má-o hana.» Abhomu-o, kpála ango-o atsia atapa ne kpokpo ndu 'ngú lí Yesu amene e pí aní-e hana bhú gúdhú libhomu.

### **Yesu akobho ele bini, aní atsia azuku di ndili na eole gba Yailo**

*(Tsia bhú Mat. 9:18-26, di ne bhú Mlk. 5:21-43.)*

<sup>40</sup> Nedhinga lí Yesu agie lie lie alí pála ekpe koko-o, okpála bhelé asia aní ndjindji, anga ndu uo hana adu adjeke aní. <sup>41</sup> Lí nedhinga bhomu-o, kpála bini akolo. A adu 'lí aní me Yailo. Aní adu nani ngámá na eti nadjé lílí gba Moidje na bílí bhomu-o. Aní atí bhú lí 'dhú Yesu, aní atsia akikilíki lie pí aní me aní nu agba ní, <sup>42</sup> anga ndili gba aní na eole adu masíkpe de nakpi. Koli ndili bhomu-o

---

<sup>n</sup>8:32 Engú inde amene lie sí-e, a dú nani bhú kúti gba omaYuda de, anga omaYuda ngau opame sisiti. Tsia bhú Lev. 11:7, ne bhú Det. 14:8, di ne bhú Mlk. 5:11.

bha nani ka ani bini, ani adu ne kalanga ndjikpa ne ka bhisi. Li kpadji-e, bhiti okpala asulu Yesu ma wakaka!

<sup>43</sup> A abhaka me elo bini nde oo. Elo ango-o, ngute adu atuko li ani bhu snda kalanga ndjikpa ne ka bhisi. [Ani andjia nani tia lie hana pi omatia], engu bini, kpala bini ti nani da nakobho ani de. <sup>44</sup> Ani ago ne akele Yesu, ani atsia abu 'kpa e li bongo 'ta ani-o.° Ngute-e a'o bha kolo natuko li ani maka ndjombe.

<sup>45</sup> Abhomu-o, Yesu atsia ayi me: «A abu 'kpa e li ma da?» Ndu uo hana agie me: «A ko naae ya de!» Piele atsia apa pi Yesu me: «Musuno, bhiti okpala inde asa mu ngbalina inde-e, ngasulu mu ngao.» <sup>46</sup> Engu bini, Yesu atsia apa me: «Kpala bini abu 'kpa e li ma, anga ma ambila me te angu gba ma-a akoto.»

<sup>47</sup> Elo ango-o au me Yesu ambila engu inde ni amene e ambila. Abhomu-o, ani ago ne naguku, ani tsia ati bhu li 'dhu Yesu. Ani atsia akpokpo pi Yesu kala ndu okpala hana ta 'ngu inde ani abu 'kpa e li ani lie, di ne maka ani akobho bha lie maka ndjombe-o. <sup>48</sup> Yesu pi ani me: «Ndi elo-e, mo okobho, anga mo obhuka ma kuku. Nu ne guo 'ngu .»

<sup>49</sup> Nedhinga li Yesu adu apa lie mo-o, kpala bini ayie agba ngama Yailo, ani ago apa pi ani me: «Ndili gba mu-o andjili. Mo ondala mata musuno de.» <sup>50</sup> Engu bini, li Yesu adje ani lie, ani atsia apa pi Yailo me: «Mo odje tsulu de, du bha ne nabhuka, ndili gba mu-o akobho makobho.»

<sup>51</sup> Li Yesu akolo lie agba ngama Yailo, ani ziba de me kpala bini li nganda ni abhu 'ti-e de, bha bini Piele, Djaa ne Djaki, a la bhadi-e 'dyi ndili-e ne 'hi ndili-o.

<sup>52</sup> Ndu okpala inde adu oo hana, adu atu 'ue ne naku 'gba ngu ndili ango-o.

Abhomu-o, Yesu atsia apa pi uo me: «Yi 'o naku 'gba! Ndili-e kpi de, engu bini, ani tila.» <sup>53</sup> La-a, u aholo namu ani anga u adu ambila ndjindji me ndili-e akpi.

<sup>54</sup> Abhomu-o, Yesu aholo 'kpa ani, ani atsia asula kpekpeke me: «Ndika ma, yie bhula!» <sup>55</sup> Ndili-e azuku, ani ayie bhula kolo ma gala! Yesu atsia aha lili pi uo me, u ha ezu pi ani. <sup>56</sup> Okpala inde azu ani angamba naali. Engu bini, Yesu agbele 'dje

---

°8:44 Bhu lili gba omaYuda-a, li elo du ne kuo gba olisi-e, ani bu 'kpa e li bhoko-o, li bhoko ango-o kolo sisiti kala Ebhe. Tsia bhu Lev. 15:25-33.

uo kpekpeke me u apá belegu engú inde akodho 'kpí-e pì kpála bini de.

## 9

### **Yesu atima obhulɔ titima ndjikpa ne ká bhisi gba e-o**

*(Tsia bhú Mat. 10:5-15, di ne bhú Mlk. 6:7-13.)*

<sup>1</sup> Ekpí bini, Yesu apo bhúla omɔkpata ndjikpa ne ká bhisi gba e-o. Aní aha angu pì uo me u pandja ndɛ osisiti bua hana bhú okpála, amba u kobho di okpála na kuo. <sup>2</sup> Pípita-a, aní atsia atima uo me u nɛ ne kpokpo ngali Naɛ gba Ebhe , amba u kobho di okpála na kuo. <sup>3</sup> Aní pì uo me: «Nanɛ ka yi-e, yi abhá oehe de. Yi ahá ndula de. Yi ahá ehe ngú nabi 'he bhúbhú de. Yi ahá ezɛ de. Yi ahá falanga de. Kpála bini bhú ká yi ahá bongo na mbulu bhisi de. <sup>4</sup> Ndɛ eti hana u asía yi bhú e-e, yi dɛ bha oo, akólo lí nedhinga inde yi ayíe lie bhú eti ango-o. <sup>5</sup> Ndɛ eti hana u sía yi bhú e de-e, yi de koto bhúbhú, amba yi pulu doto na kɛti gba uo inde adhedhe lí 'dhɛ yi-o. Bhobhomɛ-o asúno pì uo me u amene siti 'ngú.»<sup>o</sup> <sup>6</sup> Obhulɔ titima gba Yesu agbida, u apɛ bhú ndɛ okɛti hana. U akpokpo Bádha Ngali gba Ebhe-e pì okpála. U atsia akobho di okpála na kuo ne ndɛ bilí hana.

### **Mabhundja gba Elode adholo ngangá**

*(Tsia bhú Mat. 14:1-12, di ne bhú Mlk. 6:14-29.)*

<sup>7</sup> Elode , ngámá na ndu doto na Galilaya, adje ndɛ 'ngú lí Yesu ne omɔkpata gba e adɛ amene e hana. Abhomɛ-o, mabhundja gba ani-e atsia aholo adholo ngangá, anga okpála koko adɛ apa me: «Djaa bhulɔ nabatisa okpála azuku!»  
<sup>8</sup> Okoko adɛ apa me: «Polofeta Eliya akoto bhomɛ-o ngae.» Okoko atsia adɛ apa matá me: «Suka opolofeta na kalanɛ-o, azuku bhomɛ-o ngae.»  
<sup>9</sup> Engú bini, Elode atsia apa naae me: «Ma aha nani líli-e ngama me u kodho ngulɔ Djaa . Kpála bhende ma ngadje okpála apa 'ngú gba e me-e, a ko matá naae da?» Abhomɛ-o, aní atsia adɛ agílí me ní u Yesu.

---

<sup>o</sup>9:5 Okɛti gba omaYuda inde í ziba nani Bádha Ngali gba Ebhe-e de-e, u dɛ nani au uo maka omaYuda de, ne odoto gba o-o hana. Tsia bhú Mlk. 6:11.



## Yesu aha 'zɛ pi bhiti okpála

*(Tsia bhɛ Mat. 14:13-21, ne bhɛ Mlk. 6:30-44, di ne bhɛ Dja. 6:1-14.)*

<sup>10</sup> Li obhɛlɛ titima agie lio lie de Yesu-o, u atsia akpokpo ndɛ 'ngɛ inde u amene e hana pi ani. Pipita-a, ani abha uo, ani atsia atapa ne uo de okpála tsutsu li pápá na gɛdhɛ na Betesaida. <sup>11</sup> Engɛ bini, li bhiti okpála bhomɛ-o ambila lie me u agbida oo, u atsia akpata ani. Abhomɛ-o, Yesu asia uo, ani atsia akpokpo 'ngɛ pɛndji Naɛ gba Ebhe-e pi uo. Ani atsia akobho di okpála inde adɛ ne kuo ko.

<sup>12</sup> Li ekpɛ aholo lie nabi-e, obhɛlɛ titima ndjikpa ne ká bhisi-e adyudyo lio de Yesu, u atsia apa pi ani me: «Ha kpadji pi okpála, amba u gbida nagili dabili nasi tété, di ne ehe nazɛ mazɛ bhɛ odjedje kɛti masikpe si, anga ní ei bhɛ mili bili.»

<sup>13</sup> Do Yesu pi uo me: «Yi ha 'zɛ pi uo ngayi.» U atsia agie me: «A bha ka ya si ne mapa bhuluvue di ne sungu bhisi. Ne me mo okɛnda me ya nɛ nakala ezɛ pi ndɛ okpála inde-e hana ngaya?» <sup>14</sup> (Obhosi adɛ nani oo masikpe de kutu bhuluvue.) Yesu atsia apa pi omɛkpata gba e me: «Yi pa pi uo me u popo bhúla o okpála ndjikpa bhuluvue, ndjikpa bhuluvue, amba u dɛlɛ kuto.»

<sup>15</sup> Omɛkpata-a amene maka ani apa pi uo lie ko. U atsia apa pi ndɛ okpála hana me u dɛlɛ kuto. <sup>16</sup> Abhomɛ-o, Yesu aha mapa bhuluvue ne sungu bhisi-o, ani atsia 'kpɛ ne bhɛlɛ, ani atsia agie heni pi Ebhe ngɛbula ezɛ bhomɛ-o. Pipita-a, ani agɛmɛ mapa ne sungu-o, ani aha pi omɛkpata ngɛ nagagapa li okpála. <sup>17</sup> Ndɛ uo hana azɛ 'he, u a'u'u má kpú kpú kpú! Dudu atigala-a, obhɛlɛ titima alo, a atsia abebedhe okíli ndjikpa ne ká bhisi.

## Piele apa me Yesu ne Masiya

*(Tsia bhɛ Mat. 16:13-19, di ne bhɛ Mlk. 8:27-29.)*

<sup>18</sup> A akolo ekpɛ bini, Yesu adɛ akpokpo 'ngɛ ne Ebhe kpi e kpi me, omɛkpata gba ani-e nde de ani. Ani atsia ayi uo me: «Okpála ngapa me ma ne da?» <sup>19</sup> U agie me: «Okpála koko ngapa me, mɛ ne Djaɛ bhɛlɛ nabatisa okpála. Okoko me, mɛ ne polofeta Eliya. Okoko matá me, sɛka opolofeta na kalanɛ-o azuku.» <sup>20</sup> Ani atsia ayi matá uo me: «A la yi-e, yi ngapa naayi me ma ne da?» Do Piele me: «Mɛ ne Masiya inde li Ebhe atima e ko.»

## Yesu akpo 'ngú pindji nakpi ne nazuku ka e

(*Tsia bhú Mat. 16:20-28, di ne bhú Mlk. 8:30, 9:1.*)

<sup>21</sup> Engú bini, ani agbele 'dje uo kpekpeke, ani atsia aha líli me u apá belegu engú bhomu-o pi kpála bini de. <sup>22</sup> Abhomu-o, ani atsia apa matá pi uo me: «A ayo me ngama, Ndili gba kpála-a, ma dje likabhu naali. Obhelesi okpála, ongbengbe odimandè di ne omusuno na líli gba Moidje ayála ma. U abhéle ma, engú bini, ekpí na bata-a, ma tsia zúku.»

<sup>23</sup> Pipita-a, ani apa pi ndu okpála hana inde adu oo me: «I du me kpála nde akunda nakpata ma-a, a ayo me ani 'o nabhundja 'ngú gba e makpe. Ekpí bini ne bini hana, a ayo me ani bi kulusi gba e-o, amba ani kpata ma. <sup>24</sup> Padhá de, anga i du me kpála nde akunda nalila mukobho gba e, ani kpí. La-a, i du me kpála nde akunda nakpi ngubula ma-a, ani tsia kóbho. <sup>25</sup> I du me kpála nde asia ndu 'he na doto hana, engú la bini, ngaani makpe ani ngita-a, ani tsia kpi-e, a la pi ani babadha bhúbhú ne ni? <sup>26</sup> I du me kpála bini nde adje numu li 'ngú gba ma-a, di ne bhe ma ngapa e-e, ngama Ndili gba kpála, ma adjé bhadi numu li 'ngú gba ani. A adú moko li nedhinga ma agó lie bhú na na اساسا gba ma, ne bhe gba 'Dyi ma, di ne bhe gba oandjelu na bububu-o. <sup>27</sup> Ma apa pi yi na paká me, okpála koko bhú ká obhende inde si-e, mú padhá de, u aú ngaiza Na gba Ebhe-e kalanu.»

## Zi Ebhe asa Yesu ngbalina

(*Tsia bhú Mat. 17:1-8, di ne bhú Mlk. 9:2-8.*)

<sup>28</sup> Masikpe de ekpí madjina pita ani apa 'ngú bhomu-o lie, Yesu aha Piele, ne Dja di ne Djaki, ani atsia a'u ne uo apí 'ta ngú nakpokpo 'ngú ne Ebhe. <sup>29</sup> Ani adu akpokpo 'ngú ne Ebhe lie, bhúla ani ayipa lie, bongo gba ani avu má tuu! <sup>30</sup> Kolo me-e, okpála bhisi aze, u atsia aholo nagama 'ngú ne ani. A adu nani Moidje ne Eliya. <sup>31</sup> Zi Ebhe asa uo ngbalina. U atsia adu akpokpo 'ngú ne Yesu maka ani adji nandjia kulu gba e lie ne nakpi ka e abhú Yelusalema ko. <sup>32</sup> Piele ne obi e adu ne ela má yikpokpo! U agbungbua lio lie, u au Yesu ne okpála bhisi me zi Ebhe nde asa uo ngbalina. <sup>33</sup> Li okpála bhisi bhomu-o adu ayie lie de Yesu-o, Piele atsia apa pi ani me: «Musuno, ya si ndjindji. A ayo me ya yiki 'ti

ngbangbali bata, bini pi ma, bini pi Moidje, bini pi Eliya.» (Engú bini, ani da ambila ta 'ngú inde ani adu apa e de.)

<sup>34</sup> Nedhinga ani adu apa 'ngú bhoma-o lie, ndindi atsia ago abuku uo. Li ndindi adu abuku uo lie, omakpata atsia aholo nadje tsula naali. <sup>35</sup> Bhú ndindi-e, eli bini akoto, atsia apa me: «Kpála inde-e, a ko Ndili gba ma inde ma abhu e ko. Yi dje ani!» <sup>36</sup> Pita li eli bhoma-o andjia lie, u au bha ibili Yesu kpi e kpi. Nani li nedhinga bhoma-o, omakpata andjili bha má bulu! U tsia pa nga nani engú ango-o pi kpála bini de.

### **Yesu akobho ndili na bhobhoko bini li siti bua adu ato mbolo lie**

*(Tsia bhú Mat. 17:14-18, di ne bhú Mk. 9:14-27.)*

<sup>37</sup> Li ekpí aseke lie, Yesu ne omakpata bata-a aké eta-o. Okpála bhelé atsia ago ngú naké lio ne Yesu. <sup>38</sup> Bhú ká okpála bhoma-o, kpála bini aholo nasusula me: «Musunu, kikiliako, dje nga bha-a mbo ndjinga ndili gba ma na bhobhoko-o. Koli ani bha ka ma bini!» <sup>39</sup> Siti bua ngagbulu ani piko. A ngaha pi ani natu 'ue. A ngadyiki ani kpekpeke má djigi djigi! Li efu holo naze bhú 'bhé ani. Bua ango-o le bha nakoto bhú ani pima. Li angu ani ndjia má ngba! <sup>40</sup> Ma akikiliki lima pi omakpata gba ma-o me u gbe bua ango-o bhú ani, engú bini, u ale pima.»

<sup>41</sup> Do Yesu de-e: «Ngayi okpála na naki-e, yi ne nabhuka ade, yi ngamene siti 'ngú. Ma adú matá ne yi bhú dabili bini ngubula ekpí madho? Ma akibila matá yi ngubula ekpí madho?» Pipita-a, Yesu apa pi kpála ango-o me: «Go ne ndili gba ma ei.»

<sup>42</sup> Li ndili-e adu ago lie, bua ango-o adyiki ani má djigi djigi! Ani atsia agú 'i ani kuto má gbwe! Abhoma-o, Yesu ambe bhú 'ndji siti bua ango-o. Ani akobho ndili-o, ani atsia aha ani pi 'dyi e. <sup>43</sup> Ndu okpála hana adu angamba. U atsia aziba me Ebhe ne angu naali.

### **Yesu akpo matá engú pindji nakpi gba e ko**

*(Tsia bhú Mat. 17:22-23, di ne bhú Mk. 9:30-32.)*

Li ndu okpála hana adu angamba lie li ndu 'ngú li Yesu adu amene e, ani atsia

apa pi omukpata gba e me: <sup>44</sup> «Yi dje engú ma adji apa e pi yi inde-e ndjindji. U apú ma, Ndili gba kpála-a, pi okpála na doto.» <sup>45</sup> Engú bini, omukpata gba ani-e mbila nani ta 'ngú bhomú-o de. Ebhe awo nani tata-a pi uo mawo. U atsia adu adje tsulu ngú nayi ani tété.

### **A ngbéngbé da?**

*(Tsia bhú Mat. 18:1-5, di ne bhú Mk. 9:33-37.)*

<sup>46</sup> Abhomú-o, omukpata aholo amene kpekebhe sunda o ngú nambila me, a ti da nadu ngbéngbé bhú ká o da. <sup>47</sup> Engú bini, li Yesu ambila engú inde u adu abhundja e li bua o-o lie, abhomú-o, ani aha mboye ndili bini, ani a'o ani de e.

<sup>48</sup> Ani atsia apa pi uo me: «Kpála inde asía mboye ndili inde-e ka 'li ma-a, ani asia bhomú-o ma. Kpála inde asía ma-a, ani asia la di bhomú-o kpála inde atima ma ko. Padhá de, anga kpála inde ane ne mboye bhú ká yi hana-a, ani ane ne engbé ngae.»

### **Kpála inde i yala yi de-e, a ko naayi kpála**

*(Tsia bhú Mk. 9:38-40.)*

<sup>49</sup> Abhomú-o, Djaa adyudyo lie de ani, ani atsia apa pi ani me: «Məsuno, ya au kpála bini ngapandja osisiti bua bhú okpála ne 'li m. Ya di me yoko ani, anga a ko mukpata gba m-o maka ya de.» <sup>50</sup> Engú bini, Yesu agie pi ani me: «Yi ayoko ani de, anga kpála inde i yala yi de-e, a ko naayi kpála.»

### **Okpála na kuti bini na ndu doto na Samalia ayala nasia Yesu**

<sup>51</sup> Li nedhinga nagie lie ka Yesu abhúla-a akolo lie masakpe-e, ani atsia aholo kpadji na Yelusalema ne kpeke bua hana. <sup>52</sup> Ani atima obhulu titima kalanu bhú kuti bini na ndu doto na Samalia, ngú naleke ndu 'ngú hana pi ani ndjindji.

<sup>53</sup> Engú bini, ani adu la anu lie ne abhú Yelusalema-a, okpála na kuti bhomú-o atsia ayala nasia ani. <sup>54</sup> Omukpata Djaki ne Djaa au lie mo-o, u atsia apa pi Yesu me: «Ngámá, mo okunda me ya ha líli me mgbála yie abhúla, amba a go bhili uo?» <sup>55</sup> Engú bini, Yesu adji bhúla e ne li pápá gba uo, ani atsia ambe bhú 'ndji

uo.<sup>p</sup> <sup>56</sup> Abhomu-o, u atsia agbida bhú kúti koko.

### **Okpála bhende akúnda nakpata Yesu**

*(Tsia bhú Mat. 8:19-22.)*

<sup>57</sup> U adu lie li kpadji-e, kpála bini apa pi Yesu me: «Ma akpáta mu li ndu bili mo onú lie hana.» <sup>58</sup> Yesu atsia apa pi ani me: «A ka onekpø di ne odhu ne dabili gba o ngú nasi tété. Engú bini, dabili ngú nago ka ma, Ndili gba kpála tété ade.»

<sup>59</sup> Ani apa matá pi kpála koko me: «Kpata ma.» Engú bini, kpála ango-o apa pi ani me: «Ngámá, 'o nga ma, amba ma nú zi ngaiza 'dyi ma.»<sup>s</sup> <sup>60</sup> Yesu agie pi ani me: «'O okpála bhende amu-o, u zi okuo gba o-o, amba ngamu-o, mu nu naamu ne kpokpo ngali Namu gba Ebhe ko.» <sup>61</sup> Kpála koko apa matá pi ani me: «Ngámá, ma akpáta mu makpata. Engú la bini, 'o ngaiza ma, amba ma nu bhana lima pi opiga gba ma ko.» <sup>62</sup> Yesu agie pi ani me: «Li kpála bini holo namene kulu ne kengø-o, pipita ani tsia 'kpí ne sidi-e, kpála ango-o ti ne Namu gba Ebhe-e de.»

## **10**

### **Yesu atima omukpata ndjikpa mananika ne ká bhisi**

<sup>1</sup> Pipita-a, Ngámá Yesu alo omukpata koko ndjikpa mananika ne ká bhisi.<sup>t</sup> Ani atsia atima uo bhisi bhisi kalanu bhú ndu ogudhu ne ndu bili hana inde a ayo nako lie me, ani nu bha ngae makpe ko. <sup>2</sup> Ani atsia apa pi uo me: «Nguwa abhú 'dyi bhelé. Engú bini, okpála namene kulu ango-o bhelé ade. Yi yo ka bhulu edyi-e me ani tima okpála na kulu bhelé bhú edyi gba e ko. <sup>3</sup> Ma atima yi maka okandøø bhú ká osia. Yi nenu! <sup>4</sup> Yi ahá falanga de. Yi ahá ehe nabi 'he bhúbhú de. Yi ahá maløø de. Yi adú ne lulu li kpadji-e ngú nayiyi okpála de.

---

<sup>p9:55</sup> U aye bhú obhuku koko-o me: «Yi mbila ngua bua inde i ngagama 'ngú bhú yi-e de. Padhá de, anga ngama, Ndili gba kpála-a, ma go ngú nabhili okpála de, ma ago mangbo ngú nakobho uo.» Tsia bhú Luk. 19:10.

<sup>s9:59</sup> A adu me 'dyi ani nde kpi nga nani-i de. Tsia bhú Eki. 20:12.

<sup>t10:1</sup> U aye bhú obhuku koko-o me: «Ndjikpa mananika.»

<sup>5</sup> Yi li bhú 'ti bini-e, yi de pa ngaiza me: <Guo 'ngú gba Ebhe-e d̩ bhú 'ti inde.>  
<sup>6</sup> Li kpála inde akunda guo 'ngú d̩ bhú 'ti ang-o, li guo 'ngú gba yi-e d̩ bhú dabili bini ne ani. I d̩ mo-o de-e, nayi na guo 'ngú gba yi-e gíe lie pí yi. <sup>7</sup> Yi d̩ bhú 'ti ang-o. I d̩ me u nde aha ehe naz̩ maz̩ di ne bhe nandji mandji pí yi-e, yi de z̩, amba yi ndji. Padhá de, anga a ayo me kpála na kulu sia makalá na kulu gba e ko. Yi adú asi bhú 'ti ngangá de.

<sup>8</sup> I d̩ me yi nde ali bhú g̩d̩h̩ bini-e, li okpála na g̩d̩h̩ ang-o sia yi-e, yi de z̩ 'he inde u ahá e pí yi ko. <sup>9</sup> Yi kobho obh̩l̩ kuo inde bhú g̩d̩h̩ ang-o, amba yi pa pí nd̩ okpála hana me: <Na̩ gba Ebhe-e akolo de yi masikpe.>

<sup>10</sup> Engú bini, i d̩ la me yi nde ali bhú g̩d̩h̩ bini-e, u sia yi de-e, yi de ze ali kpadji, amba yi pa me: <sup>11</sup> <Ya ngapulu beleg̩ doto na g̩d̩h̩ gba yi inde adhedhe li 'dh̩ ya, ngú nasuno pí yi me yi amene siti 'ngú. Yi mbila la ndjindji me, Na̩ gba Ebhe-e akolo de yi masikpe.> <sup>12</sup> Ma apa pí yi me li 'kpí li Ebhe akódho 'ngú gba okpála lie, okpála na g̩d̩h̩ ang-o adjé likabhu naali ané okpála na Sodom̩<sup>u</sup> mane.»

### **Okuti inde ayala nabhuka Yesu**

*(Tsia bhú Mat. 11:20-24.)*

<sup>13</sup> «'E-e! A ko likabhu pí yi okpála na g̩d̩h̩ na Koladjina! A ko likabhu pí yi okpála na g̩d̩h̩ na Betesaida! Padhá de, anga i d̩ me ongamba 'ngú inde amene lie agba yi-e, i méne lie bhú og̩d̩h̩ na Tile ne Sidona-a, okpála na og̩d̩h̩ ang-o de adyi nani pili didili, u tsia túko 'mbi bhú 'ndji o ngú napana me u adji bua o adji. <sup>14</sup> Kaka-a, li 'kpí li Ebhe akódho 'ngú gba okpála lie, likabhu gba yi-e ané bhende gba okpála na Tile ne Sidona mane. <sup>15</sup> Ne yi di, okpála na Kapalanauma-a, yi abhundja naayi me u a'é'e yi abhúla-a? A mo-o ade. U abála yi bhú djua na d̩d̩ma.»

<sup>16</sup> Do ani matá pí om̩kpata gba e me: «Li kpála bini dje yi-e, amba ani adje

---

<sup>u</sup>10:12 *Sodom̩*: A ko g̩d̩h̩ inde li Ebhe atsulu nani e ka siti 'ngú gba okpála ang-o. Tsia bhú Dje. 19:24-28.

bhomɔ-o ma. Li kpála bini yala nasia yi-e, amba ani ayala bhomɔ-o nasia ma. Engú bini, li kpála bini yala nasia ma-a, amba ani ayala bhomɔ-o nasia kpála inde atima ma ko.»

### **Omukpata ndjikpa mananika ne ká bhisie agie lio**

<sup>17</sup> Omukpata ndjikpa mananika ne ká bhisie agie lio me u nde abedhe ne djali bedhe. U atsia apa me: «Ngámá, osisiti bua ngamanga belegu ya ngao nedhinga ya ngaha líli pí uo lie ne 'li mɔ ko!» <sup>18</sup> Yesu atsia apa pí uo me: «Ma au Satana ayie abhúlá akɔ kuto maka mugbálá. <sup>19</sup> Yi djedje nga, ma aha angu pí yi ngú nadele okpulu ne oapekebhe ne 'dhu yi di ne nandjia ndu angu gba bhulu yala gba yi-e hana. Ehe bini tí da namene yi sisiti de. <sup>20</sup> Engú bini, yi akpí djali ka li osisiti bua ngamanga yi lie de. Yi kpi mangbo djali ka li Ebhe aye 'li yi lie abhúlá ko.»

### **Yesu akpi djali**

*(Tsia bhú Mat. 11:25-27, 13:16-17.)*

<sup>21</sup> Bha li nedhinga angoo makpe-e, Yesu abedhe nani ne djali bedhe ka Bu Bhobua . Ani atsia apa me: «Ma agie heni pí mɔ, 'Dyi ma, Ngámá na abhúlá ne Ngámá na doto. Padhá de, anga engú inde mo opana e pí obhende imbilangɔ de-e, mo owo pí okpála na imbilangɔ di ne obhende amene balu má too! A moko, 'Dyi ma, anga mo okunda bha nani moko.

<sup>22</sup> 'Dyi ma, mo oha ndu 'he hana mɔma. Kpála bini mbila de me ngama, Ndili-e, ma ne da-ie, bha bini ngamɔ, 'Dyi ma. Kpála bini mbila la di de me ngamɔ, 'Dyi ma-a, mɔ ne da-ie, bha bini ngama, Ndili gba mɔ-o, la di ne okpála bhende li ngama, Ndili-e, ma akunda napana mɔ pí o ko.»

<sup>23</sup> Pipita-a, ani adji bhúla e li pápá gba omukpata gba e-o, ani atsia apa pí uo kpi o kpi me: «A ko djali pí yi, ngayi okpála i ngau engú inde yi ngau e ko! <sup>24</sup> Padhá de, anga ma apa pí yi me opolofeta di ne ongbengbe ongámási bhelé akunda nani nau engú yi ngau e inde, engú bini u u de. U akunda nani nadjé engú yi ngadje e inde, engú bini u dje de.»

## Kpála bini na ndu doto na Samalia inde amene bádha 'ngú

<sup>25</sup> Abhomu-o, m̄suno bini na líli gba Moidje ayie bhálá. Aní atsia ayi Yesu ngú nale aní me: «M̄suno, a ayo me ma mene pí nḡabula me ma sia m̄kobho na d̄d̄uma?» <sup>26</sup> Yesu agie pí aní me: «U aye bhú líli gba ní-e pí? Mo otatanga lie, m̄ djedje bhúbhú pí?» <sup>27</sup> Kpála ango-o atsia agie pí aní me: ««A ayo me k̄nda Ebhe, Ngámá gba m̄-o, ne bua m̄ hana, ne m̄kobho gba m̄-o hana, ne angu gba m̄-o hana, ne mabhundja gba m̄-o hana», amba «M̄ k̄nda la di kilí m̄, maka mo ok̄nda lim̄ lie makpe ko.»<sup>†</sup> » <sup>28</sup> Do Yesu pí aní me: «Mo ogie ndjindji. Mene moko, amba m̄ sia m̄kobho na d̄d̄uma.»

<sup>29</sup> Engú bini, m̄suno na líli-e ango-o ad̄ ak̄nda nasuno me engú inde ní ayi e, a ngbingbili. Abhomu-o, aní atsia ayi Yesu me: «Kilí ma-a, a ko da?»

<sup>30</sup> Do Yesu pí aní me: «Kpála bini ayie nani bhú Yelusalema, aní ad̄ ak̄ ne abhú Djeliko. Lí kpadji-e, aní atí bhú 'kpa obh̄l̄ 'zi inde ad̄ agb̄l̄ 'he gba okpála ne kpéke. U abha obongo gba aní-o. U abhi aní má kpú! U abha lío-o, u agbida. U atsia a'o ka aní masíkpe de nakpi. <sup>31</sup> Dimand̄ bini ad̄ ap̄ lí kpadji ango-o. Aní au kpála ango-o lie me-e, aní ab̄ma bha aní lí pála kpadji koko, aní atsia atapa. <sup>32</sup> Kpála bini na piga gba Levi<sup>‡</sup> akolo di lí bíli lí kpála ango-o ad̄ lie-o. Aní au aní lie, aní ab̄ma bha aní lí pála kpadji koko, aní atsia atapa.

<sup>33</sup> Engú bini, kpála bini na ndu doto na Samalia inde ad̄ naae bhú dh̄k̄ lí kpadji bhomu-o, akolo de aní. Aní au aní lie, aní adje ndjinga aní naali. <sup>34</sup> Aní adyudyo lie de aní masíkpe. Aní aha em̄ di ne vino,<sup>¶</sup> aní atuko lí djila oeka gba aní-o, aní atsia agbite ne papala bongo. Aní aha aní, aní a'o aní pí 'ngb̄ punda gba e-o. Aní an̄ ne aní bhú 'ti gba ogomago. Oo, aní atsia alila aní ndjindji. <sup>35</sup> Lí ekpí aseke lie, aní agbe lí falanga bhisi, aní aha pí bh̄l̄ eti-o. Aní atsia apa pí aní me: «Lila kpála inde-e ndjindji. I d̄ me m̄ nde ap̄ tia koko pí aní pí bhende-e,

---

<sup>†</sup>10:27 Tsia bhú Det. 6:5, di ne bhú Lev. 19:18.

<sup>‡</sup>10:32 *Piga gba Levi*: A ko okpála inde a ad̄ nani ateteke odimand̄ lí kulu bhú 'ngbé 'ti Ebhe gba omaYuda-o.

<sup>¶</sup>10:34 Vino d̄ di nani ngú nabhili okéké bhú djila eka.



ma agie pi m̄ ngama, nedhinga ma apú matá lie sii ko.»»

<sup>36</sup> Yesu atsia ayi m̄suno bhom̄-o me: «Mo obhundja naam̄ pi? Bhú ká okpála bata bhom̄-o, a ko kpála bhedho ad̄ nani kilí kpála inde ati bhú 'kpa obh̄l̄ 'zi bhom̄-o?» <sup>37</sup> M̄suno na líli-e agie me: «A ko bhende adje ndjinga ani-o.» Yesu atsia apa pi ani me: «N̄n̄, amba m̄ mene bhadi moko.»

### Yesu an̄ natsia Malata ne Malia

<sup>38</sup> Li Yesu ne om̄kpata gba e ad̄ lie li kpadji-e, ani ali bhú k̄ti bini. Oo, ēle bini ad̄ 'li ani me Malata, ani atsia asia Yesu agba e. <sup>39</sup> Malata ad̄ ne ndai e na ēle bini, ad̄ 'li ani me Malia . Malia ad̄ naae kuto bhú li 'dh̄ Yesu, ani atsia ad̄ adje engú inde li Yesu ad̄ apa e ko. <sup>40</sup> Bua Malata ad̄ abh̄l̄ ka bhiti kulu-o. Ani ago de Yesu, ani atsia apa pi ani me: «Ngámá, li ndai ma a'o ka ma lie namene nd̄ kulu hana kpi ma kpi me-e, m̄ bhundja 'ngú t̄t̄ bini di? Pa ngala pi ani me, ani go ha mbo 'kpa e m̄ma.» <sup>41</sup> Ngámá agie pi ani me: «Malata, Malata, m̄ nga'o bua m̄ abh̄l̄, m̄ la di ngat̄t̄ lim̄ nḡbula ongú bhelé. <sup>42</sup> La-a, a ndj̄ndji ne koli 'he bini. Malia aha naae ehe inde ane ne bádha, inde li kpála bini dhépe e ka ani de.»

## 11

### Yesu asuno nakpokpo 'ngú ne Ebhe pi om̄kpata gba e-o

*(Tsia bhú Mat. 6:9-13.)*

<sup>1</sup> A ad̄ ekpí bini, Yesu ad̄ akpokpo 'ngú ne Ebhe li bìli bini. Ani andjia lie, s̄ka om̄kpata gba ani-e atsia apa pi ani me: «Ngámá, suno nakpokpo 'ngú ne Ebhe pi ya, maka li Djaa asuno di lie pi om̄kpata gba e ko.» <sup>2</sup> Yesu atsia apa pi uo me: «Yi d̄ akpokpo 'ngú ne Ebhe-e, yi de pa me:

⟨'Dyi ya,

a ayo me, okpála mbila me, m̄ ne Ebhe na bubu;

a ayo me, m̄ go ̄ Ngámá píla doto.

<sup>3</sup> Ha ez̄ gba ya na ekpí bini ne bini-e pi ya.

<sup>4</sup>Mbu li osisiti 'ngú gba ya ko.

A moko, ngaya makpe, ya ngambu di li osisiti 'ngú li okpála amene e li pabíli gba ya ko.

Mo o'ó de me nale ha angu ya-a de.»»

<sup>5</sup>Yesu atsia apa matá pí uo me: «Í ðá me sùka yi bini nde ne kilí e, aní nà bhaka aní agba e tutu sukpe ngú napa pí aní me: «Wai, ha mbo mapa màmá bata. <sup>6</sup>Kilí ma bini inde bhú dholo ago li ma oo, ehe la ka ma ngú nahaha pí aní ade.» <sup>7</sup>Í ðá me bhende abhú 'ti-e nde agie pí aní me: «Mo ondála ma de! Ma aní bhoti-e aní. Ngaya ne ongisi gba ma-a, ya asíli kuto asíli. Ma tí da nayie bhúlá ngú naha mapa pí mà de.» <sup>8</sup>Ma apa pí yi na paká me, abana aní yie bhúlá ngú nahaha pí aní kabula mækunda gba o-o de-e, engú bini, aní ayíe bhúlá ngú naha ndá 'he hana inde aní nde ne gúmá e pí aní ka aní ngandala aní lie ko.

<sup>9</sup>Ngama-a, ma atsia apa pí yi me, yi yo 'he inde yi nde ne gúmá e-o, amba Ebhe ha pí yi. Yi gíli 'he inde yi nde ne gúmá e-o, amba yi u. Yi bhí bhoti-o, amba Ebhe 'á pí yi. <sup>10</sup>Padhá de, anga ndá okpála hana inde ngayo 'he aní nde ne gúmá e, aní ngasisia. Kpála bhende ngagíli 'he inde aní nde ne gúmá e, aní ngauu. Ebhe nga'á bhoti pí kpála bhende ngabhíbi-o. <sup>11</sup>Bhú ká yi odyí ongisi-e, a tí da naha kpálá pí ndíli gba e da, í ðá me ndíli-e nde ayo ka aní sungu-o?<sup>w</sup> <sup>12</sup>Í ðá me aní nde ayo ka aní pala 'ngá-o, aní tsia há pí aní apekebhe-e? <sup>13</sup>Belegá ngayi okpála na sisiti-e, yi ngaha babadha 'he pí ongisi gba yi-o. A ane la mane ne bádha pí 'Dyí yi inde abhúlá-a me aní ha Bu Bhobua pí obhende ngayoyo ka aní ko!»

### **Yesu agbe siti bua inde adá aní 'bhé kpála-o**

*(Tsia bhú Mat. 12:22-30, di ne bhú Mk. 3:22-27.)*

<sup>14</sup>Yesu adá agbe siti bua inde adá aní 'bhé kpála bhú bhoko bini. Lí siti bua ang-o akoto lie, kpála ang-o aholo agama 'ngú. Abhomá-o, bhiti okpála inde adá oo angamba naali. <sup>15</sup>Okpála koko bhú ká uo atsia apa me: «Ngámá gba osisiti bua inde 'lí e me Beledjebula ngaha angu pí aní ngae, ngú napandja osisiti bua ne

---

<sup>w</sup>11:11 U aye bhú obhuku koko-o me: «Teme í ðá me u nde ayo ka aní mapa.»

di!»

<sup>16</sup> Okoko adu agili nale ani. Abhomu-o, u atsia apa pi ani me, ani mene ngamba 'ngú ngú napana me, angu gba ani-e ngayie abhúla. <sup>17</sup> Engú bini, Yesu ambila mabhundja gba uo-o lie, ani atsia apa pi uo me: «I du me okpála gba ngámá bini nde ngagu gbele sunda o, nau ango-o lú-u de. Li ndu eti hana túko. <sup>18</sup> I du me omaha Satana nde ngagu gbele sunda o-o, nau gba ani-e ti da nalú lele pi? Padhá de, anga yi ngapa me, ma ngapandja osisiti bua ne angu gba Beledjebula. <sup>19</sup> I du me ma nde ngapandja osisiti bua ne angu gba Beledjebula-a, okpála gba yi-e ngapandja uo ne angu gba da? Kaka-a, okpála gba yi-e akódho 'ngú gba yi-e ngao! <sup>20</sup> La-a, i du me ma nde ngapandja osisiti bua ne angu gba Ebhe na paká-a, apa bhomu-o me, Nau gba Ebhe-e akolo li yi akolo.

<sup>21</sup> Li kpála bini na angu inde li tia 'gú nde ka e ndjindji, du alila eti gba e-e, ehe bini dúla tia gba ani-e de. <sup>22</sup> Engú la bini, i du me kpála bini inde ane ani ne angu-o go, ani há egú pi ani, ani tsia há angu ani. Ani bhá ndu tia 'gú inde ani adu a'o bua e lie hana. Ani tsia gápa ndu 'he inde ani abha e ka ani-e hana.

<sup>23</sup> Kpála bhende pi ma ade-e, a ko yala ma. Kpála bhende i ha 'kpa e muma ngú napo bhúla okpála de-e, ani ngatsambala uo matsambala.»

### **Siti bua ti da matá nagie lie**

*(Tsia bhú Mat. 12:43-45.)*

<sup>24</sup> «Li siti bua koto bhú kpála bini-e, ani nú ne djakadha abhú omili bilí<sup>y</sup> ngú nagili bilí nague ka e tété. I du me ani nde u de-e, ani pá li bua e me: «Ma agie lima bhú 'ti gba ma inde ma akoto nako bhú e-o.» <sup>25</sup> Ani gie lie oo, ani bháka me u apo bhú 'ti-o, u aleke ndjindji. <sup>26</sup> Abhomu-o, ani nú, ani bhá osisiti bua koko mananika inde ane ani ne siti. U gie lio bhú dabilí bini, u lí bhú 'ti-o, u tsia dúlu. Pipita-a, mukobho gba kpála ango-o, kólo la matá sisiti naali ane bhende na kalanu-o mane.»

---

<sup>y</sup>11:24 *Mili bilí*: A ko bilí inde li engu nde lie ade, li kpála ti da di nasi kuti lie de.

## Djali na kukulu

<sup>27</sup> Nedhinga ani adu apa 'ngú bhomu-o lie, ehe bini atsia asula pi ani bhú ká okpála me: «A ko djali pi ehe inde azu mu-o, inde di mo ondji 'ka e-o!» <sup>28</sup> Engú bini, Yesu agie me: «A ko djali mangbo pi okpála inde ngadje eli gba Ebhe di ne nalilila ko!»

### Yesu ayala namene ngamba 'ngú pi okpála

*(Tsia bhú Mat. 12:38-42.)*

<sup>29</sup> Li bhiti okpála ago apo bhúla o lie de Yesu-o, ani atsia aholo apa me: «Okpála na naki inde-e sisiti. U ngayo ngamba 'ngú. Engú bini, Ebhe méne ngamba 'ngú bini pi uo de, bha bini bhende gba polofeta Djonasi. <sup>30</sup> Padhá de, anga maka li Ebhe aha nani Djonasi lie ngú napana ngamba 'ngú pi okpála na Ninive-e, Ebhe ahá bhadi ma, Ndili gba kpála-a, ngú napana ngamba 'ngú pi okpála na naki moko. <sup>31</sup> Ngámá na ehe inde adu atsia 'kpí li ndu doto na Saba ayie nani tsutsu ngú nago nadjé oeli na imbilangu gba 'ngbé ngámá Salomo. Li Ebhe akódho 'ngú gba okpála lie, ngámá na ehe angu-o alú kala okpála na naki, ani tsia a'ó 'ngú pí uo. Kaka-a, kpála bini si, ani ane Salomo mane! <sup>32</sup> Okpála na Ninive adji nani bua o li nedhinga u adje ngali gba Ebhe inde li Djonasi adu akpokpo e lie-o. Li Ebhe akódho 'ngú gba okpála lie, okpála na Ninive alú kala okpála na naki, u tsia a'ó 'ngú pí uo. Kaka-a, kpála bini si, ani ane Djonasi mane!»

### Nadu li zi 'kpí

*(Tsia bhú Mat. 5:15, 6:22-23.)*

<sup>33</sup> «I du me kpála bini nde adhedhe eke-e, ani tó asa lusa de. Engú bini, ani 'ó pí 'he amba okpála inde ngali bhú 'ti-e, u u 'kpí tété ndjindji. <sup>34</sup> Djila mu ne zi 'kpí na kute mu. Li djila mu du ndjindji-e, ndu kute mu hana dú bhú zi 'kpí. Engú bini, li djila mu du sisiti-e, ndu kute mu hana dú bhú biti. <sup>35</sup> Tsia ndjindji me zi 'kpí inde bhú mu-o, adú biti de. <sup>36</sup> I du me ndu kute mu hana nde li zi 'kpí-e, yá mu bini nde bhú biti ade-e, kute mu libhomu dú li zi 'kpí, maka li zi 'ke ngaziga mu lie má ngilili ko!»

**Yesu ambamba ta osisiti 'ngú gba omɔFalisai di ne bhende gba omɔsuno na lílí  
gba Moidje-o**

*(Tsia bhú Mat. 23:1-36, di ne bhú Mlk. 12:38-40.)*

<sup>37</sup> Li Yesu andjia nagama 'ngú lie, mɔFalisai bini atsia a'í ani agba e ngú nazɔ 'he. Ani ali abhú 'tí gba mɔFalisai-o, ani atsia aholo nazɔ 'he-o. <sup>38</sup> MɔFalisai ango-o angamba naali, anga ani au me Yesu vɔlɔ lie kala nazɔ 'he-e de.<sup>z</sup>

<sup>39</sup> Abhomɔ-o, Ngámá Yesu apa pí ani me: «Ngayi omɔFalisai-e, yi ngavɔlɔ kɛte pápá di ne kɛte saani. Engú la bini, ngayi-e, yi abedhe ne 'ngbé bua di ne siti bua bhú yi bedhe. <sup>40</sup> Imbilangɔ bhú yi ade! Ebhe inde abho kɛte-e, ani bho di bua ngae di? <sup>41</sup> Kaka-a, yi ha mangbo pí obhɔlɔ ndibhili ehe bhende bhú opápá di ne bhú osaani gba yi ko. Yi mene mo-o, lí ndɔ 'he hana kólo pí yi babadha.

<sup>42</sup> La-a, a ko líkabhu pí yi, omɔFalisai! Padhá de, anga yi ngaha bini bhú ká ndjikpa na oulu na sese ne ndɔ djedje ulu na abhú 'dyi-e hana pí Ebhe. La-a, yi mene engú na ngbingbili pí okpála de. Yi kɛnda la di Ebhe de. A la bhomɔ-o engú inde ayo me yi mene ngaiza e me, yi nde 'líli 'to yi lí naha bini bhú ká ndjikpa na oehe gba yi-e pí Ebhe de ko. <sup>43</sup> A ko líkabhu pí yi, omɔFalisai! Padhá de, anga yi kɛnda bha nadɔlɔ pí dabili na akalanɔ bhú oti nadje lílí gba Moidje . Yi kɛnda la di me okpála dɔ ne yiyi yi maka ongámási lí ohi-kpadji. <sup>44</sup> A ko líkabhu pí yi! Padhá de, anga yi maka olata inde u 'o 'he pí e ngú nasusuno de, lí okpála ngadhɔkɔ pí e me u nde mbíla de!»

<sup>45</sup> Sɔka omɔsuno na lílí-e apa pí ani me: «Mɔsuno, mo opa lie mo-o, mo osobho di bhomɔ-o ya.» <sup>46</sup> Yesu atsia agie me: «A ko di líkabhu pí yi, omɔsuno na lílí! Padhá de, anga yi ngamene mɔgito me yi nga'o titili 'he lí 'ngbɔ okpála. Engú la bini, ngayi makpe-e, yi 'o belegɔ líkpa yi bini tété ngú nateteke uo de. <sup>47</sup> A ko líkabhu pí yi! Padhá de, anga yi ngaleke olata opolofeta, inde lí ogbi yi abhili nani o-o! <sup>48</sup> Yi ngapana bhomɔ-o me, yi azíba engú inde lí ogbi yi amene nani e ko. Padhá de, anga ngauo-o, u abhili opolofeta, ngayi-e, yi la ngaleke olata uo!

---

<sup>z</sup>11:38 OmɔFalisai adɔ nani navɔlɔ lío kala nazɔ 'he ngɔbula nasuno me o naao ne obabadha okpála kala Ebhe.

<sup>49</sup> Kaka-a, Ebhe ne imbilangɔ gba e, apa li 'ngú gba yi-e me: «Ma atíma opolofeta di ne obhɔlɔ titima pi uo. U abhíli okoko bhú ká uo, u tsia méne okoko sisiti.»

<sup>50</sup> Nayie maka li Ebhe abho nani doto lie, okpála atuko ngute opolofeta bhelé. Kaka-a, okpála na naki abí mangimbo ango-o ngao. <sup>51</sup> Kalanɔ-o, u abhøle Abele. Ali soso-o, u abhøle Djakalia bhú mbadhasɔ na 'ngbé 'ti Ebhe gba omaYuda, sɔnda bìli natsulu enɔ pi Ebhe ne titina na bubu-o. Ma apa pi yi na paká me, okpála na naki abí mangimbo na ngute okpála bhomɔ-o hana ngao!

<sup>52</sup> A ko likabhu pi yi, omɔsuno na líli! Padhá de, anga yi ani bhoti na imbilangɔ-o. La ngayi makpe-e, yi li de. Yi atsia ani la di bhoti ango-o pi obhende akɔnda nali-o.»

<sup>53</sup> Li Yesu ayie lie li bìli bhomɔ-o, omɔsuno na líli ne omɔFalisai aholo napadha ani. U atsia aholo ayiyi ani li ongú bhelé bhelé. <sup>54</sup> Padhá de, anga u adɔ agili nagbo ani li 'li e.

## 12

**Yi dɔ apa 'ngú mbámbá, yi adú ne tsulɔ de**

*(Tsia bhú Mat. 10:26-27.)*

<sup>1</sup> Nedhinga bhomɔ-o, bhiti okpála apo bhúla o de Yesu. U adɔ bhibhiti naali, kaka-a, u adɔ adedele 'dhɔ obi o. Abhomɔ-o, Yesu atsia aholo napa ngaiza pi omɔkpata gba e me: «'E-e! Yi lila liyi ka levile gba omɔFalisai-e uu! Padhá de, anga u ngali bhú ndɔ ongú hana ne kali gba o-o maka li levile<sup>a</sup> ngali bhú mapa lie hana ko. <sup>2</sup> Ndɔ 'ngú inde awo lie mawo-o hana, akóto bhú mbasɔ. Ndɔ 'ngú inde na pepe hana, ndɔ okpála hana ambíla. <sup>3</sup> Kaka-a, ndɔ 'ngú inde yi apá e sukpe-e hana, okpála adjé ne ngbikpi. Ndɔ 'ngú inde yi apá e bhú tɔpele abhú 'ti-e hana, okpála asúsula ne di bhú mbasɔ.»

**Kpála inde a ayo me yi kpe e ko**

*(Tsia bhú Mat. 10:28-31.)*

---

<sup>a</sup>12:1 Li bìli inde-e, levile ngasuno ehe na sisiti.

<sup>4</sup> «Ma apa pi yi, ngayi ondaise ma me: yi akpé okpála bhende ngabhèlè kàte-e de, inde pipita-a, i ti da matá namene 'he bini de ko. <sup>5</sup> Ma asúno pi yi kpála inde a ayo me yi kpe e ko. Yi kpe Ebhe inde ka e ne angu ngú nabhili okpála. Pipita-a, ani ti da nabu uo bhú djua na dũdũma. A moko, ma apa pi yi me: yi kpe mangbo ani!

<sup>6</sup> U tsitsindji odjedje odhu bhuluvue ngubula senge bhisi di? La-a, Ebhe 'ili 'to e li sũka uo bini de. <sup>7</sup> Ebhe mbila belegũ alo na sundjo yi-e hana. Yi adjé tsulũ de, bhú djila Ebhe-e, yi ane bhiti odjedje 'dhu bhomũ-o mane!»

### **Okpála ayála Yesu-o, Yesu ayála di uo**

*(Tsia bhú Mat. 10:32-33, 12:32.)*

<sup>8</sup> «Ma apa pi yi me: kpála inde apá li ma bhú ká djila okpála me ni ne naama kpála-a, ngama, Ndili gba kpála-a, ma apá bhadi li ani bhú ká djila oandjelu gba Ebhe-e me, a ko naama kpála. <sup>9</sup> Engú bini, kpála inde apá li ma bhú ká djila okpála me ni mbila ma de-e, ngama, Ndili gba kpála, ma apá bhadi li ani bhú ká djila oandjelu gba Ebhe-e me, ma ambila ani de.

<sup>10</sup> I dũ me kpála bini nde apa siti 'ngú li kũte ma, Ndili gba kpála-a, li Ebhe mbú li ani. I dũ la me kpála bini nde asobho Bu Bhobua-a , Ebhe mbú li ani de.

<sup>11</sup> Nedhinga u anú lie ne yi bhú oti nadge líli gba Moidje , di ne kala ongámási inde ngatsia 'kpí li doto me u kodho 'ngú gba yi-e, yi adjé tsulũ de me yi akóbho li mangua kpadji dho-ie de, di ne me yi apá pi-ie de. <sup>12</sup> Padhá de, anga li nedhinga bhomũ-o, Bu Bhobua asúno pi yi ngae engú inde a ayo me yi pa e-o.»

### **Mũkobho gba kpála ane tia**

<sup>13</sup> Abhomũ-o, kpála bini bhú ká okpála apa pi Yesu me: «Mũsuno, pa pi ndai ma me ani ha naama tia na libhondi 'dyi ya-a mũma haha.» <sup>14</sup> Yesu agie pi ani me: «Wai, a'o ma kpála nakodho 'ngú di ne nagbogbo bhũsũ otia gba yi-e da?» <sup>15</sup> Ani atsia apa pi ndũ uo hana me: «'E-e! Yi lila liyi ka gũmũ tia na doto uu, anga belegũ li tia dũ bha ka kpála bhelé-e, mũkobho gba ani-e dũ bhúbhú de.»

<sup>16</sup> Abhomũ-o, ani atsia akpokpo gbitaku inde-e pi uo me: «Kpála bini na tia adũ

nani ne odyi bhelé inde aha nguwa pi ani naali. <sup>17</sup> Ani adu ayi li bua e me: «Ma améne si pi? Dabili ka ma ngu nalila nguwa gba ma-a tété hana ade.» <sup>18</sup> Pipita-a, ani me: «Ma ambila engú inde ma améne e ambila! Ma apándjala ongbokopi gba ma-o, ma ayíki ibili obhe na ngbengbengbe. Ma bú nguwa ne otia gba ma-a hana bhúbhú. <sup>19</sup> Abhomu-o, ma tsia pá li bua ma me, tia ka ma bhelé ngubula bhiti kalanga. Ma guo ngala mbo guguo. Ma zu babadha 'zu, ma ndji pandi, amba ma kpi djali.» <sup>20</sup> Engú bini, Ebhe pi ani me: «Mu ne ngingi! Sukpe na naki-e, mu ngakpi. Ndu 'he inde mo opo bhúla e hana-a atígala pi da?» <sup>21</sup> Yesu apa matá me: «A bhadi moko pi kpála inde ngapo bhúla tia pi e makpe, me ani nde gili nadu bhulu tia li pápá gba Ebhe de ko.»

### **Yi ha liyi pi Ebhe**

*(Tsia bhú Mat. 6:25-34.)*

<sup>22</sup> Pipita-a, Yesu atsia apa pi omakpata gba e me: «Kaka-a, ma apa pi yi me: yi akína liyi ngubula ezú inde yi nde ne gumu e ngu makobho gba yi-e de. Yi akína di liyi ngubula obongo inde yi nde ne gumu e ngu kute yi-e de. <sup>23</sup> Padhá de, anga makobho gba yi-e ane ezú. La di-e, kute yi ane bongo. <sup>24</sup> Yi tsia nga odhu, u lulu 'dyi de. U popo bhúla nguwa de. Dabili ngu naleke 'zu ka uo tété ade. Ngbokopi ka uo ade. La-a, Ebhe ngaku uo! Makobho gba yi-e, ane bhe gba odhu-o tsutsu naali!

<sup>25</sup> A ko da bhú ká yi-e, inde ka nakina lie, i ti da nadyudyo ekpi na makobho gba e nga bha mbo ne ekpi bini-e? <sup>26</sup> I du me yi nde ti da namene belegu de mboye ehe bhomu-o, yi la ngakina liyi ngu ongu koko ka ni? <sup>27</sup> Yi tsia nga ofelele abhiye. U memene kulu de. U dudu bongo de. Ma apa la pi yi me, belegu 'ngbé ngámá Salomo bhú ndu ká tia gba e hana-a, ani sia bongo bini ane ne bádha maka susuka de. <sup>28</sup> I du me Ebhe nde ngadyi bongo li ulu inde naki abhiye, mambi u tsia bhíke e bhú djua-a, ani ti da nadyi bongo li yi ane mane di? Ngayi okpála inde li nabhuka gba yi-e nde yeye!

<sup>29</sup> Kaka-a, yi a'ó bua yi abhúlá ngu nagili ezú inde yi azú e, ne ehe bhende yi andji e de. <sup>30</sup> Omupagano, okpála na doto inde-e, u ngagili ehe bhomu-o ndu 'kpi



hana ngao. Engú bini, 'Dyi yi Ebhe mbila hana me yi ne gũgũmũ. <sup>31</sup> Yi gĩli nga mangbo namene ongú inde li Naũ gba Ebhe-e akũnda e ko. Yi mene mo-o, li Ebhe tsia há di ndũ 'he koko pi yi hana pépé.»

### **Yi wo tia gba yi-e abhúlá**

*(Tsia bhú Mat. 6:19-21.)*

<sup>32</sup> «Ngayi okpála gba ma, inde bhelé ade-e, yi adjé tsulũ de. Padhá de, anga 'Dyi yi Ebhe au ndjindji me yi dũ ongámási bhú Naũ gba ani-e, maka ngaani 'Dyi yi, ni nde lie ne Ngámá ko. <sup>33</sup> Yi tsindji ohe gba yi-o, amba yi ha tiatia, yi ha pi obhulũ ndibhili. Yi bho pi yi oti bongo inde i kádha de. Yi wo tia gba yi-e abhúlá, li bili i síti lie de. Obhulũ 'zi ti da nakolo tété de. Okéké ti la di da nazũ de.

<sup>34</sup> Padhá de, anga bili inde li tia gba yi-e nde lie, bua yi bhadi oo ko.»

### **Okpála na kulu inde i ngalila**

<sup>35</sup> «Yi dũ bedhe ngũbula kulu maka kpála inde adyi bongo na kulu, ani atsia adhedhe eke gba e madhedhe. <sup>36</sup> Yi dũ bedhe maka okpála inde i ngadjeke ngámá gba o me, ani nde atapa bhú anokomia na kũva. U ngadjeke me u 'ũ bhoti-e pi ani má gala, li nedhinga inde ani agó nabhibhi lie ko. <sup>37</sup> A ko djali pi okpála na kulu inde li ngámá gba o akólo lie, ani bháka me u nde la de ko! Ma apa pi yi na paká me, ani dyí bongo na kulu gba e-o, ani 'í uo ngũbula nazũ 'he. Ani tsia há ezũ-o pi uo. <sup>38</sup> A ko djali pi uo, i dũ me ani nde abhaka me u nde la de ko, belegũ ani go tutu sukpe, belegũ ani go bhú sikikpi! <sup>39</sup> Yi mbila ndjindji me, i dũ me bhulũ eti mbila nedhinga inde li bhulũ 'zi agó lie mambila-a, ani de 'ó de me ani li abhú 'ti gba ni-e de. <sup>40</sup> Ngayi di-e, yi dũ bedhe. Padhá de, anga yi mbila nedhinga li ngama, Ndili gba kpála-a, ma agó lie de.»

### **Kpála na kulu na ngbingbili di ne kpála na kulu na sisiti**

*(Tsia bhú Mat. 24:45-51.)*

<sup>41</sup> Abhomũ-o, Piele atsia ayi ani me: «Ngámá, mo opa gbitaku inde-e bha bini pi ya kpi ya kpi? Ne me, mo opa pi ndũ okpála hana.» <sup>42</sup> Ngámá agie pi ani me: «Kpála na kulu na ngbingbili ne imbilangũ-o, a ko bhedho? A ko kpála bhende li

ngámá gba e a'o e ngú nalila eti gba e-o, di ne nagapa ezụ pi okpála koko na kulu, i dū me nedhinga ango-o nde akolo-o. <sup>43</sup> A ko djali pi kpála na kulu ango-o, i dū me ngámá gba ani-e nde agie lie agba e, ani tsia bhaka me ani nde ngamene kulu gba e ko! <sup>44</sup> Ma apa pi yi na paká me, ngámá bhom̄-o 'ó ani pí 'ndji ndū 'he gba e hana. <sup>45</sup> Engú bini, i dū me kpála na kulu ango-o nde apa li bua e me: «Ha-a! Ngámá gba ma-a gó má gala de.» Ani hólo nabhi obi e na obhosibhosi di ne obhe na olisilisi-o. Ani hólo nazū 'he, nandji pandi ne nalangba ne di. <sup>46</sup> Ngámá gba ani-e gíe lie li ekpí ani djeke ani lie de, li nedhinga inde ani mbila e de. Ngámá gba ani-e 'é ani bhú kulu, ani tsia 'ó ani bhú ká okpála na sisiti.<sup>b</sup>

<sup>47</sup> I dū me kpála na kulu nde ambila engú li ngámá gba e akunda e, engú bini ani tsia leke lie ngú namemene maka li ngámá ango-o akunda lie de-e, kaka-a, u bhí ani naali. <sup>48</sup> La-a, i dū me kpála na kulu nde mbila 'ngú li ngámá gba e ngakunda e de-e, ani mene engú inde a ayo me u bhi ani ka e, u bhí ani naali de. Padhá de, anga kpála bhende u aha 'he pi e bhelé-e, u ayó bhadi 'he ka ani bhelé. Kpála bhende u a'o 'he sa 'kpa e bhelé-e, u ayó matá ehe ka ani pépé ane mane.»

### **Yesu ago ngú nagbogbo bh̄s̄ okpála**

*(Tsia bhú Mat. 10:34-36.)*

<sup>49</sup> «Ma ago ngú nabhike djua píla doto. Ma akunda me adū atsi matsi! <sup>50</sup> A ayo me ma sia batisimo na likabhu. La-a, likabhu li bua ma naali akólo li 'kpí inde ma asía lie ko! <sup>51</sup> Yi abhundja naayi me ma ago ngú na'o guo 'ngú píla doto? Ma apa pi yi me, a mo-o ade. Ma ago mangbo ngú nagbogbo bh̄s̄ okpála. <sup>52</sup> Nayie pi mbia inde-e, piga bini na okpála bhuluvue agbó bh̄s̄ e, bata ayála bhisi, li bhisi yála bata.

<sup>53</sup> 'Dyi ndili ayála ndili na bhobhoko gba e-o,

li ndili-e yála 'dyi e.

'Hi ndili ayála ndili na   le gba e-o,

li ndili-e yála 'hi e.

---

<sup>b</sup>12:46 U aye bhú obhuku koko-o me: «U k  kodho bh̄s̄ ani má mbi mbi mbi!»

Ogbi na   le ay la  le gba ndala e,  
li  le gba ndili-e y la ogbi e. †»

### **Yi mbila eng  inde ngakodho 'kp  mbia inde-e ko**

*(Tsia bh  Mat. 16:2-3.)*

<sup>54</sup> Yesu apa mat  pi okp la me: «Yi u me ebha ngago ne kati, yi kolo p  me: «Ebha inde-e adhi madhi.» I tsia m ne la bhadi lie moko. <sup>55</sup> Yi dje anvi me a nde ngayie li p p  na yoyoko, yi p  me: «Ekp -e akp  naali.» I tsia m ne la bhadi lie moko. <sup>56</sup> Ngayi obh li kali inde-e! Yi mbila eng  inde ngakodho 'kp  abh l  ne bhende p la doto-o hana. La ka ni, yi k nda nambila eng  inde ngakodho 'kp  li nedhinga inde-e lie de-e?»

### **Yi dje liyi ne kp la inde yi nde ne e bh  'ng  ko**

*(Tsia bh  Mat. 5:25-26.)*

<sup>57</sup> «Ka ni, ngayi makpe, yi mbila nakodho 'ng  na ngbingbili inde ayo namene e lie de-e? <sup>58</sup> I da me yi nde bh  'ng  ne kil  m -o, ani da an  ne m  bh  djila okp la nakodho 'ng -o, m  de mene ne kp ke me yi dje liyi ne ani li kpadji. M  ngakpe bhom -o me, ani an  ne m  pi kp la nakodho 'ng -o de. Li kp la nakodho 'ng -o h  m  pi osudha de. Li osudha-a tsia bh ke m  bh  tikp  de. <sup>59</sup> Ma apa pi m  me, m  k to bha oo me, m  nde agie nd  bopulu gba m -o hana m  kpek bh !»

## **13**

### **Ebhe nga'i okp la me u dji bua o**

<sup>1</sup> Abhom -o li nedhinga ango-o, okp la koko ago akpokpo pi Yesu me: «Pilato abhili okp la koko na Galilaya me u nde ngatsulu en  pi Ebhe.» <sup>2</sup> Ani agie pi uo me: «Yi abhundja naayi me, i da me Pilato nde abhili uo mo-o, a ak nda napa me u ad  sisiti ane nd  okp la koko na Galilaya hana? <sup>3</sup> Ma apa pi yi me, a mo-o ade.

---

†12:53 Tsia bh  Mik. 7:6.

Engú bini, i dæ me yi nde dji bua yi de-e, ndæ yi hana, yi amú bhadi maka uo. <sup>4</sup> Yi bhundja okpála ndjikpa ne ká madjina nani li 'ndjá 'ti na Silæ abhili o-o. Yi abhundja naayi me u adæ nani sisiti ane ndæ okpála koko na Yelusalema hana? <sup>5</sup> Ma apa pi yi me, a mo-o ade. Engú bini, i dæ me yi nde dji bua yi de-e, ndæ yi hana, yi amú bhadi maka uo.»

### **Ndula na figi inde i li lílí de**

<sup>6</sup> Pipita-a, Yesu atsia apa gbitaku inde-e pi uo me: «Kpála bini alu nani ndula na figi bhú edyi gba e na vino. Ekpí bini, ani ago nagili lílí bhúbhú. La-a, ani u belegu de bini. <sup>7</sup> Abhomæ-o, ani atsia apa pi kpála na kulu gba e me: «Tsitsia nga, a ko mbia inde-e kalanga bata, ma ngago agili lílí bhú ndula inde. La-a, ma u belegu de bini. Dede! A ngangí bili padhá ka ní?» <sup>8</sup> Engú bini, kpála na kulu-o agie pi ani me: «Ngámá, 'o nga matá ndula ango-o li kalanga inde, amba ma dji doto bhú lili ngbalina, ma tuko doto na eká bhúbhú. <sup>9</sup> Koko bhú kalanga na sidi-e, i lí lílí. I dæ la me a nde li lílí de-e, mæ tsia dé.»»

### **Yesu akobho eðe bini na kuo bhú 'kpí naguo gba omaYuda**

<sup>10</sup> Li 'kpí bini naguo gba omaYuda-a , Yesu adæ asuno bhú 'ti nadjé lílí gba Moidje-o . <sup>11</sup> A abhaka me eðe bini na kuo nde oo. Sunda kalanga ndjikpa ne ká madjina, siti bua adæ bhú ani. Siti bua ango-o atsia adæ anu 'ngbu ani. Kaka-a, ani ale nani nali lie pima. <sup>12</sup> Li Yesu au eðe ango-o lie, ani a'í ani. Ani atsia apa pi ani me: «'Hi ma, kuo gba mæ-o ayie.» <sup>13</sup> Ani abu 'kpa e pí ani, kolo má gala me-e, ani ali lie má ngbæ! Ani atsia aholo nadhøge Ebhe.

<sup>14</sup> Engú bini, ngámá na eti nadjé lílí-e ake 'ngú lie naali, ka li Yesu akobho kpála lie bhú 'kpí naguo-o. Do ani pi okpála inde adæ oo me: «A ne 'kpí madhia ngú namene kulu. Yi go li okpí bhomæ-o, ngubula me u kobho yi ne okuo gba yi ko. Engú bini, yi agó bhú 'kpí naguo de!» <sup>15</sup> Abhomæ-o, Ngámá Yesu atsia agie pi ani me: «Yi ne obhælæ kali! Li 'kpí naguo-o, yi bhuhulu bagala di ne punda gba yi-e bhú 'ti o, ngú nanæ ne uo me u ndji 'ngu dí? <sup>16</sup> Eðe inde-e, ani bhú piga gba Abalahama. Satana agbite ani kalanga ndjikpa ne ká madjina. A ayo de me u bhulu ani li 'kpí naguo dí?» <sup>17</sup> Li Yesu agie pi uo lie mo-o, ndæ obhælæ yala gba

ani-e hana atsia asia nɔmɔ. Engú bini, ndɔ okpála hana adɔ akpi djali ka ndɔ obabadha kulu hana inde ani adɔ amene e ko.

### **Gbitaku pɔndji lí ndula u a'í e me mɔtadi**

*(Tsia bhú Mat. 13:31-32, di ne bhú Mk. 4:30-32.)*

<sup>18</sup> Abhomɔ-o, Yesu atsia apa me: «Naɔ gba Ebhe-e , a maka ni? Ma ti da napapana li ni? <sup>19</sup> A maka lí ndula na mɔtadi. Kpála bini aha, ani alu bhú 'dyi gba e-o. A akɔ, a akolo 'ngbé ndula. Odhu atsia ayiki 'ti o bhú oyáyá ko.»

### **Gbitaku pɔndji levile**

*(Tsia bhú Mat. 13:33.)*

<sup>20</sup> Do Yesu matá me: «Ma ti da napana Naɔ gba Ebhe-e li ni? <sup>21</sup> A maka levile inde li ɔlɔ bini aha e. Ani atsia akpɔdhɔlɔ ne bhiti faline akólo li nedhinga li faline hana afúka lie ko.»

### **Yi li li bhoti na yeye**

*(Tsia bhú Mat. 7:13-14, 21-23.)*

<sup>22</sup> Yesu aholo 'nú bhú Yelusalema. Li ani adɔ anɔ lie oo, ani adɔ apɔ bhú ogɔdhɔ ne bhú okɔti me ani nde ngasuno Bádha Ngali pi okpála. <sup>23</sup> Kpála bini ayi ani me: «Ngámá, Ebhe akóbho bha okpála masudha?» Abhomɔ-o, Yesu atsia agie pi uo me: <sup>24</sup> «Yi mene ne kpéke me yi li li bhoti na yeye-o. Padhá de, anga ma apa pi yi me, okpála bhelé aglí me ni li, engú la bini u alé pima.

<sup>25</sup> A maka me li nedhinga li bhɔlɔ 'ti-e ayie bhúlá lie, ani ní bhoti-o. Pipita-a, yi dúlɔ akilidjo. Yi hólo nabhi bhoti-e me yi nde ngapa me: «Ngámá, 'ɔ bhoti-e pi ya.» Ani tsia gíe pi yi me: «Ma mbila bili li yi ayie lie de!» <sup>26</sup> Abhomɔ-o, yi tsia pá pi ani me: «Ní azɔ nani 'he, ní andji di pandi ne yi bhú dabilí bini. Mo otsia asuno li okpadji gba ya-o.» <sup>27</sup> Ani tsia gíe pi yi me: «Ma mbila bili li yi ayie lie de. Ngayi osisiti okpála, yi yie de ma oo ko!» <sup>28</sup> Nedhinga yi aú Abalahama, Isaka, Yakobho di ne ndɔ opolofeta hana lie bhú Naɔ gba Ebhe-e, li Ebhe tsia bála la naae yi akilidjo! Oo, yi adɔ aku 'gbá di ne nazɔ tate yi. <sup>29</sup> Okpála ayie ne 'dje doto badha

hana, u tsia gó bhú anokomia bhú Naṁ gba Ebhe ko. <sup>30</sup> Abhomṁ-o, okpála koko inde asidi mbia inde-e, u akólo akalanṁ. Li obhe koko inde akalanṁ mbia inde-e, u tsia kólo asidi.»

### **Yesu li kpadji na Yelusalema**

*(Tsia bhú Mat. 23:37-39.)*

<sup>31</sup> Li nedhinga ang-o, omṁFalisai koko ago apa pi Yesu me: «Yie si mayie, anga ngámá Elode ngakṁnda nabhøle mṁ.» <sup>32</sup> Yesu atsia agie pi uo me: «Yi nṁ pa pi bhṁli kali maka nekpø bhomṁ-o me: «Ma ngapandja osisiti bua bhú okpála. Ma di ngakobho okpála na kuo naki di ne mambi. Ma tsia ndjía kulu gba ma-a bhú 'kpí na bata.» <sup>33</sup> Engú bini, a ayo me ma kpata kpadji gba ma-a, naki, mambi di ne ekpí na bata. Padhá de, anga a ayo de me, okpála bhøle polofeta li bili koko de, bha bini abhú Yelusalema.

<sup>34</sup> Aa! Ngayi, okpála na Yelusalema-a, yi ngabhili opolofeta! Yi la di ngabhili ne teme okpála inde li Ebhe atima o agba yi-o! A ko bhṁtsibhṁtsi madho ma akṁnda napo bhúla yi maka li 'hi 'ngṁ apopo bhúla ongisi gba e lie sa mbudha e-o. La-a, yi tsia kṁnda de! <sup>35</sup> Mbia inde-e, kṁti gba yi-e atígala padhá. Ma apa pi yi me, yi ú matá ma belegṁ de bini akólo li nedhinga inde yi apá lie me: «A ayo me Ebhe tuko bisagu pí kpála inde ngago ne 'li ani ko!†»»

## **14**

### **Yesu akobho kpála na kuo li 'kpí naguo gba omaYuda**

<sup>1</sup> A akolo ekpí bini, ekpí naguo gba omaYuda-a , Yesu anṁ nazṁ 'he agba sṁka ongámási gba omṁFalisai-o . Okpála inde adṁ oo adṁ atsia Yesu ne kpéke djila. <sup>2</sup> Abhomṁ-o, kpála bini inde li kṁte e asisika ne engu adṁ kala ani. <sup>3</sup> Yesu ayi omṁsuno na líli gba Moidje ne omṁFalisai-e me: «Líli gba ní azíba nakobho kpála li 'kpí naguo? Ne me a zíba de.» <sup>4</sup> Engú bini, u andjili bha má bulu! Abhomṁ-o, Yesu aha 'kpa bhṁli kuo-o, ani akobho ani. Ani atsia apa pi ani me ani gie lie

---

†13:35 Tsia bhú Djlm. 22:5, di ne bhú Ets. 118:5.

agba e. <sup>5</sup> Pípíta-a, aní pí uo me: «Belegú lí 'kpí nague-o, lí sùka ongisi gba yi na bhosi-bhosi-e,<sup>d</sup> í ðá di-e sùka bagala gba yi-e tí bhú 'dú 'ngu-o, yi kolo gbé aní má gala! A mo-o adí?» <sup>6</sup> U mbíla engú bini inde u agíe e tété-e de.

### Yi kò líyi ne kuto

<sup>7</sup> Yesu au me okpála inde u a'í o-o ngadulá pí odabili na akalaná. Abhomá-o, aní atsia apa gbitaku inde-e pí ndá uo hana me: <sup>8</sup> «Lí kpála bini 'í má bhú anokomia na káva-a, mo onú adá pí dabili na akalaná de. Padhá de, anga má mbíla de me, u a'í kpála koko inde ane má mane e-e de. <sup>9</sup> Í ðá mo-o, lí kpála inde a'í ndá yi bhisi hana gó pa pí má me: <'O ka dabili bhomá-o pí aní.> Abhomá-o, má nú ne námá hana, má tsia d'á asidi. <sup>10</sup> Engú bini, lí kpála bini 'í má bhú anokomia-a, má de ná ðá pí dabili na asidi, amba lí kpála inde a'í má agó lie, aní de pa pí má me: <Ndai ma, dyudyo límá ne akalaná.> Lí ndá okpála bhende yi ngazá 'he ne o-o hana, tsia ú má me, má ne 'ngbé kpála. <sup>11</sup> Padhá de, anga í ðá me kpála nde nga'o lie ne abhúlá-a, lí Ebhe ké aní ne kuto. Í ðá la me kpála nde nga'o lie ne kuto-o, lí Ebhe 'é'e aní ne abhúlá.»

### A ayo na'í da bhú anokomia gba má-o?

<sup>12</sup> Pípíta-a, Yesu apa pí kpála inde a'í aní-e me: «Lí má 'í okpála ngú nazá 'he tulukpe, í ðá di-e tagolo-o, mo o'í obi má de. Mo o'í ondaise má de. Mo o'í okpála na piga gba má-o de. Mo o'í la di okpála na tia inde asilí kúti lingo má-o de. Padhá de, anga ngauo-o, u 'í di má lí 'kpí koko, u tsia gíe ehe inde mo omene e pí uo-o pí má. <sup>13</sup> Engú bini, lí má 'í okpála bhú anokomia-a, 'í obhulá ndibhili. 'Í okpála na eze. 'Í obhende ne eze lí 'dhá o-o di ne obhende í u 'kpí de ko. <sup>14</sup> Má mene mo-o, má d'á ne djali, anga u tí da nagie 'he bini pí má de. Ebhe agíe pí má lí 'kpí lí okpála na ngbingbili-e azúku lie ko.»

### Gbitaku pindji 'ngbé anokomia

*(Tsia bhú Mat. 22:1-10.)*

---

<sup>d</sup>14:5 *Ongisi na obhosi-bhosi*: Bhú obhuku koko-o u aye me «punda.»

<sup>15</sup> U adje 'ngú bhom̩-o lie, s̩ka okpála inde ad̩ az̩ 'he bhú dabilí bini ne Yesu-o atsia apa pí aní me: «A ko djali pí kpála inde az̩ anokomia bhú Na̩ gba Ebhe-o !» <sup>16</sup> Do Yesu pí aní me: «Kpála bini amene 'ngbé anokomia. Aní atsia a'í okpála bhelé ngánga. <sup>17</sup> A akolo lie lí nedhinga naz̩ 'he-e, aní atsia atima kpála na kulu gba e ngú napa pí okpála inde aní a'í o-o me: «Ez̩-o abh̩, yi gógo.» <sup>18</sup> Kpála ne kpála aholo ayo ka aní me aní mbu lí ní. Bhe na kalan̩-o apa pí aní me: «Ma akala edyi, a ayo me ma n̩ natsitsia. Ma ayo ka m̩ me mbu lí ma.» <sup>19</sup> Koko apa pí aní me: «Ma akala obagala ndjikpa ng̩bula kulu na edyi. Ma adjí nale uo. Ma ayo ka m̩ me mbu lí ma.» <sup>20</sup> Koko atsia apa matá me: «Ma aha e̩ mbia inde. Kaka-a, ma tí dá nan̩-̩ de.»

<sup>21</sup> Kpála na kulu-o agie lie agba ngámá gba e-o. Aní atsia akpokpo 'ngú bhom̩-o pí aní. Abhom̩-o, ngámá-a aholo ake 'ngú lie. Aní atsia apa pí kpála na kulu gba e me: «N̩ má gala bhú odaposo, di ne lí okpadji. 'Í obh̩l̩ ndibh̩lí. 'Í okpála na eze. 'Í obhende í u 'kpí de, di ne obhende ne eze lí 'dh̩ o-o.» <sup>22</sup> Pita nedhinga masudha-a, kpála na kulu ago, aní atsia apa me: «Ngámá, ma amene lílí gba m̩-o amene. Engú bini, dabilí nga bha uu.» <sup>23</sup> Abhom̩-o, ngámá atsia apa pí kpála na kulu gba e me: «N̩ lí okpadji 'dyi, lingo oaga na edyi, mba okpála ne kpéke, amba eti gba ma-a bedhe bedhe. <sup>24</sup> Padhá de, anga ma apa pí yi me, okpála inde ma a'í o kalan̩-o, s̩ka uo bini z̩ anokomia gba ma-a de!»

### **Yi 'o ka nd̩ 'he hana ngú nakpata Yesu**

*(Tsia bhú Mat. 10:37-38.)*

<sup>25</sup> Ekpí koko-o, lí okpála bhelé ad̩ adh̩k̩ lie bhú dabilí bini ne Yesu-o, aní adjí bhúla e lí pápá gba uo-o, aní atsia apa pí uo me: <sup>26</sup> «Kpála inde ak̩nda akpata ma-a, a ayo me aní yala 'dyi e ne 'hi e. Aní yala wala e ne ongisi gba e-o. Aní yala ondaise e na obhosibhosi, di ne obhende na olisilisi, amba aní yala beleg̩ m̩kobho gba e makpe ko. Í d̩ mo-o de-e, aní tí da nad̩ m̩kpata gba ma-a de. <sup>27</sup> Kpála inde í k̩nda nabí kulusi gba e de-e, inde í kpata ma de-e, aní tí da nad̩ m̩kpata gba ma-a de.

<sup>28</sup> Í d̩ me s̩ka yi nde ak̩nda nayiki 'ngbé 'ti-e, aní d̩ ngaiza kuto. Aní tsia



hólo nabhundja ngú nambila me tia ka ni bhelé ngú nandjia kulu ango-o. <sup>29</sup> I dɛ mo-o de-e, ani 'o 'dɛ 'ti-e, pipita ani tsia ndjia eti-e de-e, ndɛ okpála hana inde aú-o, u hólo namɛ ani. <sup>30</sup> U tsia dɛ apa me: <Yi tsia nga kpála inde, ani akpo nako lita nayiki eti. Engú bini, ani ndjia de!> <sup>31</sup> A bhadi moko, i dɛ me 'ngbé ngámá bini nde akɛnda nagɛ 'gú ne 'ngbé ngámá koko, ani dɛ ngaiza kuto. Ani holo nabhundja ngú nambila me, ne okpála kutu ndjikpa-a, ni ti da nagɛ 'gú ne 'ngbé ngámá inde ka e ne okpála kutu ndjikpa bhisi-o. <sup>32</sup> I dɛ mo-o de-e, ani tíma obhɛɛ titima pi 'ngbé ngámá ango-o nedhinga ani nde nga bha lie tsutsu-o. Ani tsia yí ani me: <A ayo namene pi ngɛbula me egú adɛ-ɛ de-e?> <sup>33</sup> Abhomɛ-o, Yesu atsia apa matá me: «Sɛka yi bini ti da nadɛ mɛkpata gba ma-a de, i dɛ me ani nde 'o ka ndɛ 'he gba e hana de ko.»

### **Ngɛɛ inde akolo padhá**

*(Tsia bhú Mat. 5:13, di ne bhú Mk. 9:50.)*

<sup>34</sup> «Ngɛɛ ne bádha 'he. Engú bini, i dɛ me kpokpo nde andjia bhúbhú andjia, u tí da nagie matá kpokpo bhúbhú ne ni? <sup>35</sup> A belegɛ ndjindji ade ngú doto di ne ngú nalu 'zɛ. U bála bha ibili akilidjo. Kpála inde ne 'dje 'dje ngú nadjé 'kpí-e, ani djedje!»

## **15**

### **Gbitaku gba kandɛɛ inde angíta, u atsia au matá e**

*(Tsia bhú Mat. 18:12-14.)*

<sup>1</sup> Ekpí bini, ondɛmbi na mandjandja di ne okpála na sisiti ago ndɛ o hana de Yesu ngú nadjé ani. <sup>2</sup> OmɛFalisai ne omɛsuno na líli gba Moidje adɛ adi ani. U adɛ apa me: «Kpála inde-e ngasia okpála na sisiti. Ani la di ngazɛ 'he ne uo bhú dabili bini!»

<sup>3</sup> Abhomɛ-o, Yesu atsia apa gbitaku inde-e pi uo me: <sup>4</sup> «Kpála bini bhú ká yi ne okandɛɛ kámá bini. Li sɛka uo bini ngíta-a, ani mene pi? A na paká me, ani 'ó ká obhende ndjikpa odukpabini ne ká odukpabini-e li bili nazɛ 'he ka o-o. Ani tsia

nú nagíli bhende angita-a, akólo lí nedhinga inde ani aú ani lie-e ko. <sup>5</sup> Lí ani au ani lie, ani bédhe ne djali bedhe. Ani há kandøle-o, ani 'ó ani pí de-ngulɛ e. <sup>6</sup> Ani gíe lie agba e. Pipita-a, ani 'í obi e ne okpála inde asili kɛti de ani-o. Ani tsia pá pí uo me: <Yi kpi djali bhú dabilí bini ne ma, anga ma au kandøle gba ma inde angita nako au!> <sup>7</sup> Yesu atsia apa matá me: «Djali adú bhadi moko abhúlá ngɛbula kpála bini na sisiti inde adji bua e. Djali ango-o ané bhende u nde ne e ngɛbula okpála na ngbingbili ndjikpa odukpabini ne ká odukpabini, inde ngabhundja me o ne gɛmɛ nadjí bua o ade ko.»

### **Gbitaku pindji lí falanga inde angita, u atsia au matá e**

<sup>8</sup> «Matá di-e, i dɛ me øle bini nde ne lí falanga<sup>e</sup> ndjikpa, lí sɛsɛka bini ngita-a, ani méne pí? A na paká me, ani dhédhe eke. Ani pó bilí abhú 'ti. Ani gíli má bhotobhoto, akólo lí nedhinga inde ani aú lie-e ko! <sup>9</sup> Lí ani au lie, ani 'í obi e di ne okpála inde asili kɛti de ani-o. Ani tsia pá pí uo me: <Yi kpi djali bhú dabilí bini ne ma, anga ma au lí falanga inde angita nako ka ma-a au!> <sup>10</sup> Yesu atsia apa matá me: «Oandjelu gba Ebhe-e akpí bhadi djali moko ngɛbula koli kpála na sisiti bini inde adji bua e ko.»

### **Gbitaku gba ndíli inde angita, u atsia au matá e**

<sup>11</sup> Yesu atsia apa matá me: «Bhoko bini adɛ nani ne ongisi na obhosibhosi bhisi. <sup>12</sup> Bhende na ndimindimi-e apa pí 'dyi e me: <'Dyi ma, ha naama tia na libhondi-e mɛma haha.> Abhomɛ-o, 'dyi uo atsia agapa tia gba e lí uo. <sup>13</sup> Píta 'kpí bedí, ndíli na ndimindimi-e abha tia gba e, ani atapa ne di bhú kɛti bini tsutsu. Oo, ani andjia tia gba e hana má kpøkøbhø lí ndɛ 'ngú na padhá padhá! <sup>14</sup> Lí ani andjia tia gba e lie hana-a, adyindi na ngbéngbé atsia alí bhú ndu doto ango-o. Abhomɛ-o, ani aholo adje gɛmɛ. <sup>15</sup> Ani anɛ alí bhú kulu pí sɛka kpála na ndu doto bhomɛ-o. Kpála ango-o aha ani, ani atsia atima ani abhú 'dyi gba e me ani dɛ nalila opame. <sup>16</sup> Ani adɛ akɛnda nazɛ ezɛ gba opame-o. La-a, kpála bini ha

---

<sup>e</sup>15:8 Agba omaYuda-a, lí falanga bini (denaliusí) nani ne makalá pí kpála na kulu ngɛbula ekpí bini.

nani ehe nazu mazu pi ani de.

<sup>17</sup> Abhomu-o, ani aholo abhundja. Pipita-a, ani atsia apa li bua e me: <Ndū okpála na kulu gba 'dyi ma-a hana, ezū ka uo bhibhiti naali. Ngama la ei-e, ma ngakpi ne gumu! <sup>18</sup> Ma agie lima agba 'dyi ma, ma tsia pá pi ani me: 'Dyi ma, ma amene siti 'ngú kala Ebhe di ne li pápá gba mu. <sup>19</sup> A ayo matá na'i ma me ndili ka mu de. Ha bha ibili ma maka sūka okpála na kulu gba mu ko.>

<sup>20</sup> Ani atsia aholo agie lie agba 'dyi e. Li nedhinga inde ani adu nga bha lie de kati-e tsutsu-o, 'dyi ani au ani. Ani au ani lie, ani adje ndjinga ani naali. Ani anu ne holo, ani ati li ngu lu ani, ani atsia akama ani li kate e. <sup>21</sup> Abhomu-o, ndili-e atsia apa pi ani me: <'Dyi ma, ma amene siti 'ngú kala Ebhe di ne li pápá gba mu. A ayo matá na'i ma me ndili ka mu de.> <sup>22</sup> U akolo lie akati-e, do 'dyi ani pi okpála na kulu gba e me: <Yaka! Yi go ne yambu bhende ane ne bádha, yi dyi li ani. Yi to kati bhú 'kpa ani, amba yi to malokò bhú 'dhu ani. <sup>23</sup> Pipita-a, yi nu bhelo folo bagala na tsikpa-o. Ní zu 'he, amba ní kpi djali. <sup>24</sup> Padhá de, anga ndili gba ma inde adu nako mugito me ani akpi-e, ani agie matá lie bhú mukobho. Ani adu nako me ani nde angita, ma atsia au matá ani.> Abhomu-o, u atsia aholo nakpi djali.

<sup>25</sup> Li nedhinga bhomu-o, ndili bhende na gigina adu abhiye. Nedhinga ani adu agie lie lie akati-e, ani akolo lie de eti-e masikpe-e, ani adje tolo 'tsi ne ebi. <sup>26</sup> Ani a'i sūka okpála na kulu-o. Ani atsia ayi ani li engú inde adu akodho 'kpí-o.

<sup>27</sup> Kpála na kulu ango-o agie pi ani me: <Ndai mu agie lie agie. 'Dyi mu atsia abhelo folo bagala na tsikpa-o, anga ani au me, ani agie lie ne kate na angu.>

<sup>28</sup> Abhomu-o, ndili na gigina-a aholo nake 'ngú lie. Ani ayala nali abhú 'ti-o. 'Dyi ani akoto, ani atsia alopole lie pi ani me ani lili. <sup>29</sup> Engú bini, ndili-e agie pi 'dyi e me: <Djedje nga, a ko kalanga bhelé ma ngamene kulu pi mu maka bali. Ma ndjo sūka líli gba mu-o 'kpí bini de. Mu ha nga la belegu ndili meeme mu ma bini de me, ya mene anokomia ne obi ma-a ne di. <sup>30</sup> Li ndili gba mu inde andjia tia gba mu-o hana ne olisi na zabhe-e ago lie, mo otsia abhelo folo bagala na tsikpa-a pi ani!>

<sup>31</sup> 'Dyi ani atsia apa pi ani me: <Ndika ma, ndu 'kpí hana, ní ne mu bhú dabili

bini. Ndɛ 'he inde gba ma-a hana, a ko naamɛ. <sup>32</sup> Engú bini, a ayo bha igini me ní mene anokomia amba ní kpi djali. Padhá de, anga ndai mɛ inde adɛ nako mɛgito me ani akpi-e, ani agie matá lie bhú mɛkobho. Ani adɛ nako me ani nde angita, ma atsia au matá ani!»

## 16

### Kpála na kulu na kali

<sup>1</sup> Pipita-a, Yesu atsia apa matá pi omɛkpata gba e me: «Bhɛlɛ tia bini adɛ ne kpála na kulu gba e. Kpála ang-o adɛ atsia 'kpí li ohe gba ani-o. Okpála koko ago apa pi ani me, kpála na kulu ang-o ngarɛrɛ tia gba ani-o. <sup>2</sup> Abhomɛ-o, ani a'i kpála na kulu-o. Ani atsia apa pi ani me: «Ma ngadje pindji mɛ e mangua 'ngú dho? Suno obhuku na ndɛ tia gba ma-a hana mɛma, anga mɛ tí da matá natsia 'kpí li ohe gba ma-a de.» <sup>3</sup> Abhomɛ-o, kpála na kulu ang-o aholo ayi bua e me: «Ma améne si pi? Padhá de, anga ngámá gba ma adji a'é ma bhú kulu. Angu ka ma ngú nade edyi ade. A la di li ma ne nɛmɛ ngú nadɛ ne yoyo 'he. <sup>4</sup> Aa! Ma ambila engú inde ma améne e ambila, ngɛbula me okpála sia ma ndjindji li nedhinga u a'é ma lie bhú kulu ko!»

<sup>5</sup> Abhomɛ-o, ani a'i okpála bini ne bini inde adɛ ne bopulu gba ngámá gba ani-o. Ani ayi bhende na kalanɛ-o me: «Bopulu gba ngámá gba ma-a ka mɛ madho?»

<sup>6</sup> Ani agie pi ani me: «Ngbɛngɛlɛ na emɛ kámá bini.» Kpála na kulu-o pi ani me: «Ha 'kpa balɛa na bopulu gba mɛ-o. Dɛ kuto má gala, amba mɛ dji me ndjikpa bhuluvue.» <sup>7</sup> Pipita-a, ani ayi koko me: «A la mɛ-o, bopulu gba mɛ-o madho?» Ani agie me: «Kíli mapɛnga kámá bini.» Kpála na kulu-o pi ani me: «Ha 'kpa balɛa na bopulu gba mɛ-o, amba mɛ dji me ndjikpa madjina.» <sup>8</sup> Ngámá gba kpála na kulu na kali ang-o adhɛgɛ ani, anga ani amene ehe maka kpála inde ngau 'kpí tsutsu. Okpála na doto inde-e ne imbilangɛ na kali gba o-o, u ambila namene ehe sɛnda o ane ongisi gba Ebhe.

<sup>9</sup> Ngama-a, ma apa pi yi me, yi gili nadɛ bhú makpolia ne obi yi ne tia na kali na doto inde, amba li tia neke ka yi-e, u de sia yi bhú kɛti na dɛdɛma. <sup>10</sup> Kpála

bhende ngbingbili bhú ohe na djedjedje-e, aní bhadi ngbingbili bhú ohe na ngbengbengbe. Kpála bhende ngbingbili bhú ohe na djedjedje-e ade, aní di ngbingbili bhú ohe na ngbengbengbe ade. <sup>11</sup> I dæ me yi nde mene ndjindji ne tia na kali na doto inde-e de-e, Ebhe tí da naha kækulæ tia pí yi de. <sup>12</sup> I dæ me yi nde mene ehe ngbingbili ne tia gba kpála koko de-e, a há tia gba yi-e pí yi da?

<sup>13</sup> Kpála bini tí da namene kulu pí ongámási bhisi de. Aní yála bini, aní tsia kánda koko. Aní méne kulu pí koko ndjindji, aní tsia ú koko bhú djila e padhá. Yi tí da namene kulu pí Ebhe bhú dabilí bini ne namene pí tia de.»

### **Yesu asuno píndji 'ngú ngangá**

*(Tsia bhú Mat. 11:12-13, 5:31-32, di ne bhú Mk. 10:11-12.)*

<sup>14</sup> OmæFalisai adje ndæ 'ngú bhomæ-o hana. Abhomæ-o, u atsia adæ amæ Yesu, anga u adæ nani akúnda tia naali. <sup>15</sup> Yesu atsia apa pí uo me: «Yi ngamene ehe bhú djila okpála mægito me yi ngbingbili. Engú bini, Ebhe mbíla bua yi hana, anga ehe lí okpála ngau e bhú djila o ngbéngbé-e, Ebhe ngauu bhú djila e padhá.

<sup>16</sup> Nakolo lí nedhinga gba Djaá bhulæ nabatisa okpála-a, u akpokpo 'lí Ebhe pí okpála bhú lílí gba Moidje di ne bhú obhuku gba opolofeta . Nayie lí nedhinga bhomæ-o, u akpokpo Bádha Ngali Naæ gba Ebhe-e pí okpála. Kpála ne kpála ngagíli ne kpéke me ní lí bhú kati na mündeyi-o . <sup>17</sup> A ko mboye 'ngú masudha me ekpí di ne doto kodho 'kpí. A ko la kpéke da 'ngú me okpála 'e mboye kæ eli bini bhú ká lílí gba Moidje-o.

<sup>18</sup> Lí bhoko bini 'e wala e bhú káva-a, aní ha ølø koko-o, aní akúnda bhomæ-o ølø gba kpála koko. Lí bhoko bini ha ølø inde lí 'ko e a'e e bhú káva-a, aní akúnda di bhomæ-o ølø gba kpála koko.»

### **Gbitaku gba bhulæ tia ne bhulæ ndibhíli**

<sup>19</sup> «A adæ nani bhulæ tia bini. Aní adæ adyi babadha bongo na tia naali. Ndæ 'kpí hana, aní adæ nadæ ndjindji. Aní atsia adæ di nazæ 'he ndjindji. <sup>20</sup> Bhulæ ndibhíli bini adæ di nani oo. A adæ 'lí aní me Ladjalo. Eka atsotsolo nani kate aní hana. Aní adæ asi kuto lí bhoti gba bhulæ tia-o. <sup>21</sup> Aní adæ akúnda nazæ okulæ 'zæ inde

adɛ abala sa dabili nazɛ 'he gba bhɛɛ tia-o. La di-e, obɛɛ adɛ ago adhapa oeka gba ani-o. <sup>22</sup> Bhɛɛ ndibhili-e akpi. Oandjelu aha ani, u atsia anɛ a'o ani ade Abalahama. Bhɛɛ tia akpi di, u atsia azi ani.

<sup>23</sup> Oo, li bili gba okpála inde amu-o, ani adɛ adje likabhu naali. Ani atsia 'kpí ne abhúlá, ani au Abalahama tsutsu ne Ladjalo de e. <sup>24</sup> Abhomɛ-o, ani aholo natobhila me: <'Dyi ma Abalahama, dje nga bha mbo ndjinga ma! Tima Ladjalo me ani to ndji-likpa e bhú 'ngu, amba ani go ne di tɛnɛ pí 'mi ma, anga ma ngadje likabhu bhú djua inde-e naali.> <sup>25</sup> Abalahama agie pí ani me: <Ndika ma, bhundja me mo osia nani tia bhelé li nedhinga mo odɛ lie bhú mɛkobho pɛla doto-o. La-a, Ladjalo atsia asia nani nae likabhu naali. Mbia inde-e, ani ngasia bádha 'ngú, mɛ la naamɛ ngasia likabhu. <sup>26</sup> Matá-a, a sɛnda ní ne tsú 'dú, ngɛbula me li kpála kɛnda nayie gba ya ei akodho 'kpí ne agba yi oo, ani de le pima! Li kpála kɛnda nayie gba yi oo akodho 'kpí ne agba ya ei-e, ani de le di pima!>

<sup>27</sup> Do bhɛɛ tia me: <'Dyi ma, kikiliako, ma ayo nga bha-a ka mɛ me, tima Ladjalo agba 'dyi ma, <sup>28</sup> anga ondaise ma na obhosibhosi bhuluvue oo. A ayo me, ani nɛ nagbele 'dje uo, amba ngauo di-e, u agó li bili na likabhu inde-e de.>

<sup>29</sup> Abalahama agie me: <U mbila líli gba Moidje di ne obhuku gba opolofeta-a hana. A ayo me u dje uo.> <sup>30</sup> Bhɛɛ tia atsia apa me: <'Dyi ma Abalahama, a mo-o ade. Engú bini, i dɛ me sɛka okpála inde amu-o nde azuku-o, ani nɛ pa pí uo-o, u djí bua o.> <sup>31</sup> Abalahama pí ani me: <Í dɛ me u nde dje engú inde bhú líli gba Moidje di ne bhú obhuku gba opolofeta de-e, belegɛ i dɛ me sɛka okpála inde amu-o nde azuku-o, u djé di ani de.>>

## 17

### Yi mbu li siti 'ngú gba okpála koko

*(Tsia bhú Mat. 18:6-7, 21-22, di ne bhú Mk. 9:42.)*

<sup>1</sup> Pipita-a, Yesu apa pí omɛkpata gba e me: «Engú inde ngato okpála bhú siti 'ngú-o néke de. Engú la bini, a ko likabhu pí kpála inde i ngato engú ango-o ko! <sup>2</sup> Í dɛ me kpála bini nde ngato ongisi bhú siti 'ngú-o, a pí ani ndjindji me u

gbite ngingi tangulɔ ani, amba u bhike ani bhú 'ngbé 'ngu. Bhobhomɔ-o pɪ ani ndjindji naali ane me sɔka okpála na bhɔbhɔkɔ-o ti ka ani bhú siti 'ngú. <sup>3</sup> 'E-e! Yi lila liyi ndjindji!

I dɛ me ndai mɛ nde amene siti 'ngú-o, mɛ de suno pɪ ani. I dɛ me ani nde apa me ni amene sisiti-e, mɛ de mbu li ani. <sup>4</sup> I dɛ me ani nde amene mɛ sisiti bhɔsibhɔtsi mananika li 'kpí bini-e, ani go bhɔsibhɔtsi mananika hana, ani pa pɪ mɛ me: «Ma amene mɛ sisiti, mbu li ma.» Mɛ de mbu li ani.»

### **Nabhuka na kpekpeke**

<sup>5</sup> Obhɔlɔ titima apa pɪ Ngámá Yesu me: «Mene me nabhuka gba ya-a kolo matá kpekpeke.» <sup>6</sup> Abhomɔ-o, Ngámá Yesu atsia agie me: «I dɛ me nabhuka gba yi-e dɛ maka lí ndula na mɛtadi-e, yi de tí da napa pɪ ndula inde-e me: «Yie si, amba mɛ nɛ lu limɛ abhú 'ngbé 'ngu.» I tsia méne bhadi moko.»

### **Kulu inde a ayo me kpála na kulu mene e ko**

<sup>7</sup> «Li kpála bini bhú ká yi dɛ ne kpála na kulu gba e bini-e, i dɛ me kpála na kulu ango-o nde ngamene kulu abhiye, ani dɛ di-e ngalila onɔ-o, ani gie lie akɛti-e, ani tsia pá pɪ kpála na kulu ago-o me: «Go má gala ngú nazɔ 'he?» <sup>8</sup> A mo-o ade. Ani pá mangbo pɪ ani me: «Lɛ ezɔ, mɛ yipa bongo-o ngú naha ezɔ-o mɛma akólo li nedhinga ma andjia nazɔ 'he lie di ne nandji 'he bhende nandji mandji lie ko. Pipita-a, mɛ tsia zɔ 'he amba mɛ ndji di 'he bhe gba mɔ-o.» <sup>9</sup> Ani ti da nagie heni pɪ kpála na kulu-o, anga ani amene líli gba ani-e uu? Belegɔ de bini. <sup>10</sup> A bhadi pɪ yi moko. Nedhinga yi amene ndɔ 'ngú inde u apa e pɪ yi e lie hana-a, yi de pa me: «Ya bha naaya ne okpála na kulu. Ya amene bha kulu inde a ayo igini me ya mene e ko.»»

### **Yesu akobho okpála na kába ndjikpa**

<sup>11</sup> Li Yesu adɔ anɔ lie abhú Yelusalema-a, ani apɔ sɔnda ndu doto na Samalia ne bhe na Galilaya. <sup>12</sup> Ani ali lie bhú kɛti bini me-e, obhosi na kába ndjikpa ago ake lio ne ani. U alɔlɔ mbo de ani tsutsu. <sup>13</sup> U atsia aholo atobhila me: «Ngámá Yesu, dje nga bha-a mbo ndjinga ya!» <sup>14</sup> Yesu au uo lie, ani atsia apa pɪ uo me: «Yi nɛ

suno liyi pi odimandø gba Ebhe-o .» Nedhinga u adu anu lie, u atsia akobho. <sup>15</sup> Li saka uo bini au lie me ni akobho-o, ani atsia agie lie sidi me ani nde ngadhege Ebhe ne angu hana. <sup>16</sup> Ani ati bhú li 'dhu Yesu. Ani atu bhúla e ne kuto. Ani atsia agie heni pi Yesu. Bhoko ang-o adu nani kpála na Samalia. <sup>17</sup> Abhomu-o, Yesu atsia ayi me: «Ndu okpála ndjikpa hana akobho adi? Obhende odukpabini-e la su? <sup>18</sup> Kpála bini bhundja nago nagie heni pi Ebhe de, bha bini kpála inde naae ne maYuda ade inde-e?» <sup>19</sup> Pipita-a, Yesu atsia apa pi ani me: «Yie bhúlá, nunu. Mo okobho, anga mo obhuka ma.»

### **Nedhinga li Ebhe agó nau lie píla doto**

*(Tsia bhú Mat. 24:23-28, 37-41.)*

<sup>20</sup> Omufalisai ayi Yesu me: «Nau gba Ebhe-e agó nadho?» Ani atsia agie pi uo me: «Nau gba Ebhe-e gó ngua bhende de me okpála nde ngauu mau-o de. <sup>21</sup> U pá de me: <Yi tsitsia, a sii!> ne me <A aoo!> padhá de, anga yi mbila me Nau gba Ebhe-e bhú ka yi.»

<sup>22</sup> Pipita-a, ani atsia apa pi omukpata-a me: «Nedhinga koko akólo makolo. Yi akúnda me yi u nga bha mbo ma, Ndili gba kpála, 'kpí bini. Engú bini, yi ú la ma de. <sup>23</sup> U apá pi yi me: <Ani aoo!> di ne me: <Ani sii!> engú bini, yi agú holo oo de. <sup>24</sup> Ekpí li ngama, Ndili gba kpála, ma agó lie, a adú maka mugbálá, li zi e ngayie li 'dje kokpí, li pápá bini akólo li pápá koko. <sup>25</sup> Engú bini, a ayo me ma dje ngaiza likabhu naali, amba okpála na naki yala di ma.

<sup>26</sup> Maka engú inde akodho 'kpí nani bhú 'kpí Nua-a, akódho bhadi 'kpí moko li 'kpí inde li ngama, Ndili gba kpála, ma agó lie ko. <sup>27</sup> Padhá de, anga bhú 'kpí Nua, okpála adu azu 'he. U adu andji pandi. Obhosi ne olisi adu aha lio akolo li 'kpí li Nua ali bhú zabu lie ko. Ebha adhi, engu asi píla doto libhomu, a atsia abhili ndu uo hana. <sup>28</sup> A adú maka bhú 'kpí gba Loto. Okpála adu azu 'he. U adu andji pandi. U adu akala 'he di ne natsindji 'he. U adu alu 'zu. U adu ayiki 'ti. <sup>29</sup> Engú bini, ekpí li Loto akoto bhú Sodomu lie, djua di ne itimeli ayie abhúla, abala pí uo maka ebha, atsia abhili ndu uo hana. <sup>30</sup> A akódho bhadi 'kpí moko li 'kpí li ngama, Ndili gba kpála-a, ma súno angu gba ma-a lie pi okpála ko.



<sup>31</sup> Li 'kpí ang-o, kpála bhende abháka e apí 'ngbũ 'ti-e, a ayo de me ani li abhú 'ti ngú nabha ohe gba e de. A bhadi moko, kpála bhende abháka e abhú 'dyi-e, a ayo de me ani gie lie akuti-e de. <sup>32</sup> Yi bhundja engú inde amene nani wala Loto-o.<sup>f</sup> <sup>33</sup> Kpála bhende agíli nalila mukobho gba e, ani kpí. Kpála bhende la abhíke mukobho gba e, ani tsia kóbho. <sup>34</sup> Ma apa pi yi me, sukpe ang-o, okpála bhisi adú pí mako bini, u ahá bini, u tsia 'ó ká koko. <sup>35</sup> Olisi bhisi adú atũ mapũnga bhú dabili bini, u ahá bini, u tsia 'ó ká koko. [ <sup>36</sup> Obhosi bhisi adú amene kulu bhú edyi bini, u ahá bini, u tsia 'ó ká koko. »] <sup>37</sup> Omukpata ayi ani me: «Ngámá, engú ang-o akódho 'kpí ne su?» Ani atsia agie pi uo me: «Bili li kuo kpála adú lie, oagbagba apékøbho bhadi bhúla o oo ko.»

## 18

### Gbitaku gba siti kpála nakodho 'ngú ne øke bini na øøle

<sup>1</sup> Pipita-a, Yesu apa gbitaku bini pi omukpata gba e ngú nasuno pi uo me, a ayo me u dũ nayo Ebhe ndũ nedhinga hana, u andála de. <sup>2</sup> Ani pi uo me: «Kpála nakodho 'ngú bini adũ nani bhú gũdhũ bini. Ani dũ akpe Ebhe de. Ani atsia adũ di au okpála bhú djila e padhá. <sup>3</sup> Bhú gũdhũ ang-o, øke na øøle bini adũ di oo. Ani adũ ago apa pi ani me: «Leke engú sũnda ya ne kpála inde ya nde ne e bhú 'ngú ko.» <sup>4</sup> Ekpí bhelé, kpála nakodho 'ngú ang-o adũ ayayala. Pipita-a, ani atsia apa li bua e me: «Ma ngakpe Ebhe ade. Ma la di ngau okpála bhú djila ma padhá. <sup>5</sup> Engú bini, øke inde ngandala ma naali. A ayo me ma leke engú gba ani-o, anga i dũ mo-o de-e, ani dũ bha ago naba 'ndji ma.»»

<sup>6</sup> Ngámá Yesu atsia apa matá me: «Yi dje engú inde li siti bhũlũ nakodho 'ngú bhomũ-o apa e ndjindji! <sup>7</sup> Ebhe méne bádha 'ngú pi okpála inde ani alo o-o di? I dũ me u nde ngaku 'gba pi ani sukpe ne ngbikpi-e? Ani djéke ngengele ngú nateteke uo? <sup>8</sup> Ma apa pi yi me, ani aléke 'ngú gba uo-o má gala! La-a, li

---

<sup>f</sup>17:32 Wala Loto akolo nani teme na ngũtũ anga ani agũmũ nani líli gba Ebhe. Tsia bhú Dje. 19:26.

nedhinga li ngama, Ndili gba kpála, ma agó lie, ma abháka me okpála nde abhuka Ebhe pílá doto uu?»

### **Gbitaku gba mǎFalisai , ne ndombi na mandjandja**

<sup>9</sup> Okpála koko adǎ au lio me o naao ngbingbili. U atsia adǎ au ndǎ okpála koko hana bhǎ djila o padhá. Abhomǎ-o, Yesu atsia apa gbitaku inde-e li 'ngǎ gba uo-o me: <sup>10</sup> «Ekpí bini, okpála bhisi anǎ bhǎ 'ngbé 'ti Ebhe gba omaYuda ngǎ nayo Ebhe. Bhe bini adǎ mǎFalisai , bhe koko adǎ ndombi na mandjandja.

<sup>11</sup> MǎFalisai-e ayie bhǎlá, anǎ atsia ayo Ebhe a li bua e me: <Oo, Ebhe! Ma ngagie heni pí mǎ, anga ma maka okpála koko ade. U ngazi 'he. U ngamene sisiti 'ngǎ. U ngakǎnda olisi, i dǎ di-e obhosi gba okpála koko. Ma di ngagie heni pí mǎ, anga ma maka ndombi na mandjandja inde-e ade. <sup>12</sup> Ma tsetse ezǎ 'kpí bhisi sǎnda poso bini ngǎ nayo mǎ. Ma haha bini bhǎ ká ndjikpa pí ndǎ 'he ma ngasia e hana.>

<sup>13</sup> Ndombi na mandjandja alǎ naae mbo tsutsu, anǎ akpe belegǎ natsia 'kpí ne abhǎlá. Engǎ bini, anǎ atǎ bhǎla e ne kuto, anǎ abu 'kpa e pí 'ka e, anǎ atsia apa me: <Oo, Ebhe! Dje nga bha-a mbo ndjinga ma, ma naama ne siti kpála.>» <sup>14</sup> Do Yesu matá me: «Ma apa pí yi me, ndombi na mandjandja ango-o agie nani lie agba e me, Ebhe nde adje nayo gba anǎ-e adje. Engǎ bini, Ebhe dje bhende gba mǎFalisai-e de. Padhá de, anga kpála bhende nga'o lie ne bhǎlá-a, li Ebhe ké anǎ ne kuto. La-a, kpála bhende nga'o lie ne kuto-o, li Ebhe 'é'e anǎ ne bhǎlá.»

### **Yesu asia ongisi na ndjendje**

<sup>15</sup> Okpála adǎ ago di pí anǎ ne ongisi na ndjendje ngǎbula me anǎ 'o 'kpa e pí 'ndjǎ uo. Li omǎkpata au lie mo-o, u aholo nayoko uo. <sup>16</sup> Engǎ bini, Yesu a'ǎ uo, anǎ atsia apa me: «Yi 'o ongisi na djedjedje me u go bhaka ma! Yi anǎ kpadjǎ pí uo de, anga Naǎ gba Ebhe-e , a pí okpála inde maka uo ko. <sup>17</sup> Ma apa pí yi na paká me, kpála inde i sia Naǎ gba Ebhe-e maka mboye ndili de-e, anǎ ti ne Naǎ gba Ebhe-e de.»

### **Bhǎlá tia ne uo ne Yesu**

*(Tsia bhú Mat. 19:16-30, di ne bhú Mlk. 10:17-31.)*

<sup>18</sup> Abhomu-o, ngámá bini gba omaYuda ayi Yesu me: «Musunu, ngamu bádha kpála, a ayo me ma amene pi ngubula nasia mukobho na duduama?» <sup>19</sup> Yesu atsia agie pi ani me: «Mu nga'i ma me bádha kpála ka ni? Kpála bini babadha ade. Ebhe bha babadha ngae kpi e kpi. <sup>20</sup> Mu mbila olíli-e ndjindji: «Mo okúnda e, i da di-e bhoko gba kpála koko de. Mo obhéle kpála de. Mo ozí 'he de. Mo opá eu li kilí mu de. Manga 'dyi mu ne 'hi mu mamanga.†» <sup>21</sup> Ngámá angu-o atsia apa me: «Nayie bhú ndili li ma-a, ma amene ndu 'ngú bhomu-o hana.» <sup>22</sup> Pita li Yesu adje engú bhomu-o lie, ani atsia apa pi ani me: «Mo oneke matá koli ehe bini. Nunu, tsindji ndu 'he gba mu-o hana, amba mu gapa tiatia pi obhulu ndibhili. Mo osia tia abhúla. Pipita-a, mu go kpata ma.» <sup>23</sup> Ani adje lie mo-o, ani asia likabhu naali, anga tia adu nani ka ani bhelé naali.

<sup>24</sup> Li Yesu au lie me ani asia likabhu mo-o, ani atsia apa me: «A bha ndju kpekpeke pi obhulu tia ngú nali bhú Nuu gba Ebhe-o! <sup>25</sup> A kpekpeke pi eya ngubula nali li gudho musana. A la matá kpekpeke ane pi bhulu tia ngubula nali bhú Nuu gba Ebhe ko.»

<sup>26</sup> Abhomu-o, okpála inde adje engú inde ani apa e atsia ayi me: «I da mo-o, a ti da nakobho da?» <sup>27</sup> Yesu agie me: «Engú bhende i ti ne okpála de-e, a ati bha ne Ebhe.»

<sup>28</sup> Abhomu-o, Piele atsia apa me: «Tsitsia nga, ya a'o ká ndu 'he gba ya-a hana ngú nakpata mu.» <sup>29</sup> Do Yesu pi uo me: «Ma apa pi yi na paká me, i da me kpála bini nde a'o ká eti gba e, ani 'o ká wala e, ani 'o ká ondaise e, ani 'o ká okpála inde azu e, ani 'o ká ongisi gba e ngubula Nuu gba Ebhe-e, <sup>30</sup> ani sía 'he bhelé naali kuto ei. Pipita-a, bhú nedhinga inde ngagu-o, ani tsia sía di mukobho na duduama.»

**Yesu akpo 'ngú bhutsibhutsi na bata pindji nakpi di ne nazuku ka e**

*(Tsia bhú Mat. 20:17-19, di ne bhú Mlk. 10:32-34.)*

---

†18:20 Tsia bhú Eki. 20:12-16, di ne bhú Det. 5:16-20.

<sup>31</sup> Pipita-a, Yesu aha okpála na titima ndjikpa ne ká bhisi-e, aní anɛ ne uo li ngongo, aní atsia apa pi uo me: «Yi djedje, ní adji mbia inde-e abhú Yelusalema. Oo, ndɛ 'ngú hana inde li opolofeta aye e pindji ma, Ndili gba kpála-a, adji amene lie. <sup>32</sup> Padhá de, anga u apú ma pi omɔpagano. Li okpála ang-o mú ma, u sóbho ma, u tsia kú di ngusɛ li kute ma. <sup>33</sup> U abhí ma ne fimbo. Pipita-a, u tsia bhéle ma. La-a, bhú 'kpí na bata-a, ma tsia zúku.» <sup>34</sup> Engú bini, omɔkpata mbila nani ta 'ngú ang-o de, anga a awo nani lie pi uo mawo. U tsia dɛ ambila ta 'ngú li Yesu adɛ apa e de.

### **Yesu akobho kpála bini inde i u 'kpí de**

*(Tsia bhú Mat. 20:29-34, di ne bhú Mk. 10:46-52.)*

<sup>35</sup> Li Yesu akolo lie masikpe de Djeliko-o, kpála bini inde i u 'kpí de-e adɛ kuto dengo 'hi-kpadji. Aní adɛ ayo 'he. <sup>36</sup> Aní adje tolo okpála akodho 'kpí lie, aní atsia ayi me: «A ko ní?» <sup>37</sup> Okpála atsia agie pi aní me: «Yesu, kpála na kati na Nadjaleta ngakodho 'kpí bhomɔ-o ngae.» <sup>38</sup> Abhomɔ-o, aní atsia asula me: «Yesu, Ndili gba Davidi, dje nga bha-a mbo ndjinga ma!» <sup>39</sup> Okpála inde adɛ akalanɔ-o aholo ambembe bhú 'ndji aní me: «Gbite 'bhɛ mɛ.» Engú bini, aní aholo asusula matá kpekpeke me: «Ndili gba Davidi, dje nga bha-a mbo ndjinga ma!» <sup>40</sup> Yesu alɛ, aní atsia aha líli me u go ne aní pi ní. Aní akolo lie de aní-e, Yesu atsia ayi aní me: <sup>41</sup> «Mo okɔnda me ma mene pi mɛ ní?» Aní agie me: «Ngámá, bhulu djila ma, amba ma u matá 'kpí.» <sup>42</sup> Yesu apa pi aní me: «U matá 'kpí uu! Mo okobho anga mo obhuka ma.» <sup>43</sup> Kolo má gala me-e, aní aholo matá nau 'kpí. Aní atsia adɛ akpata Yesu me aní nde ngadhɛgɛ Ebhe. Ndɛ okpála hana inde au engú ang-o, aholo di nadhɛgɛ Ebhe.

## **19**

### **Yesu alí bhú 'ti gba Djakayo**

<sup>1</sup> Pita li Yesu alí lie bhú Djeliko, aní atsia adɛ agulu gɔdhɔ-o. <sup>2</sup> A abhaka me kpála bini nde oo, a adɛ 'li aní me Djakayo. A adɛ nani ngámá gba ondɛmbi na

mandjandja. Tia adu ka ani bhelé. <sup>3</sup> Ani adu agili nau me Yesu ngae dho. Engú bini, li okpála adu la lie bhelé-e, ani ale nau ani pima anga ani adu nani ndundu.

<sup>4</sup> Abhomu-o, ani ayiki lie ne holo ne akalanu. Ani atsia a'u bhú ndula bini dengo 'hi-kpadji ngubula me ni u Yesu nedhinga inde ani apú lie oo ko.

<sup>5</sup> Li Yesu akolo lie li bili bhomu-o, ani a'e djila e ne abhúlá, ani atsia ani. Ani atsia apa pi ani me: «Djakayo, kò kuto má gala, anga a ayo me ma si naki bhú 'ti gba mu-o.» <sup>6</sup> Abhomu-o, Djakayo akò kuto bhú holo. Ani atsia asia Yesu ne djali hana. <sup>7</sup> Ndu okpála hana au lie mo-o, u aholo adi mutokono. U atsia adu apa me: «Lele pi li kpála inde-e atapa lie nasi agba kpála na sisiti-e!» <sup>8</sup> Djakayo ayie bhúlá, do ani pi Yesu me: «Ngámá, djedje nga. Ma agbó bhusu tia gba ma-a bhisi. Ma ahá bhe bini-e pi obhulu ndibhili. I du me ma nde aha tia gba kpála bini ne kali-e, ma agie pi ani bhutsibhutsi badha.» <sup>9</sup> Abhomu-o, Yesu atsia apa pi ani me: «Naki-e, Ebhe akobho mu. Ngamu di-e, mu bhú piga gba Abalahama-o. <sup>10</sup> Padhá de, anga ngama, Ndili gba kpála-a, ma ago nagili di ne nakobho okpála inde angita ko.»

### **Gbitaku gba okpála na kulu ndjikpa**

*(Tsia bhú Mat. 25:14-30.)*

<sup>11</sup> Yesu akolo de Yelusalema masikpe. Okpála inde adu adje ani-e adu abhundja naao me, Nau gba Ebhe-e asúno lie pi okpála mbia inde. <sup>12</sup> Kaka-a, ani atsia apa gbitaku bini pi uo me: «Kpála bini na piga gba ngámá bini anu nani bhú doto bini tsutsu ngubula me u to palata na ngámá tangulu ni, amba pipita-a, ni gie lini.

<sup>13</sup> Kala me ani nu-o, ani a'i okpála na kulu gba e ndjikpa-o. Ani agapa lí falanga<sup>s</sup> bini bini li ndu uo hana. Ani atsia apa pi uo me: «Yi mene kulu ne falanga inde, akólo li nedhinga inde ma agie lima lie ko.» <sup>14</sup> Okpála na doto gba ani-e adu ayala ani. U atima okpála nganda ani ngu napa me: «Ya kunda de me kpála bhomu-o u ngámá pí 'ndji ya-a de.»

---

<sup>s</sup>19:13 Agba omaYuda-a, lí falanga bini (olo) nani ne makalá pi kpála na kulu ngubula epe bata.

<sup>15</sup> La-a, u ato palata na ngámá tangulɔ ani. Ani atsia agie lie bhú doto gba e-o. Abhomɔ-o, ani a'í okpála na kulu inde ani agapa nako falanga lio ngɔbula nambila bhende u asia e pépé-o. <sup>16</sup> Abhomɔ-o bhe na kalanɔ-o ago. Ani atsia apa me: <Ngámá, ma asia lí falanga ndjikpa pí bhende nako mo oha e mɔma ko.>

<sup>17</sup> Abhomɔ-o, ngámá-a apa pí ani me: <A ndjindji. Mɔ ne bádha kpála na kulu, anga mo omene ndjindji bhú mboye ehe bedi. Ma a'ó íbili mɔ ngámá pí 'ndji ogɔdhɔ ndjikpa.> <sup>18</sup> Bhe na bhisi-e ago, ani atsia apa me: <Ngámá, ma asia lí falanga bhuluvue pí bhende nako mo oha e mɔma ko.> <sup>19</sup> Abhomɔ-o, ngámá-a apa di pí ani me: <Ngamɔ di-e, ma a'ó mɔ ngámá pí 'ndji ogɔdhɔ bhuluvue.>

<sup>20</sup> Pírita-a, koko ago, do ani de-e: <Ngámá, lí falanga gba mɔ-o íi. Ma awo nako bhú bongo .> <sup>21</sup> Mɔ 'o lí ma tsulɔ, anga mɔ ne kpála inde ngamene 'ngú na kpekpeke. Mɔ ngaha ehe bhende mɔ 'o e ngamɔ de. Mɔ ngaha 'zɔ inde mɔ lu e ngamɔ de.> <sup>22</sup> Ngámá-a apa pí ani me: <Mɔ ne siti kpála na kulu. 'Li mɔ makpe agbíte mɔ ngae. Mo ombila nako hana me, ma ne kpála inde ngamene 'ngú na kpekpeke. Ma ngaha ehe inde ma a'o e ngama de. Ma ngaha ezɔ inde ma alu e ngama de.> <sup>23</sup> Ka ní mɔ 'o nako tia gba ma-a lie bhú baki de-e? Maka ma ago-o, ma de asia koko pépé.>

<sup>24</sup> Pírita-a, ani apa pí okpála inde adɔ oo me: <Yi dhepe tia inde ka ani bhomɔ, amba yi ha pí bhende ne di ndjikpa ko.> <sup>25</sup> U atsia apa pí ani me: <Ngámá, a ka ani ndjikpa!> <sup>26</sup> Ani agie me: <Ma apa pí yi me, kpála bhende lí ehe nde ka e, u ahá ehe pí ani bhelé. Engú bini kpála bhende lí ehe nde ka e ade-e, u adhépe belegɔ mboye ehe inde ka ani ko.> <sup>27</sup> La-a, pí obhulɔ yala gba ma inde í kɔnda nako de me ma aɔ ngámá pí 'ndji o-o, yi go ne uo ei, amba yi bhili uo kala ma sɔi.>>>

### Yesu alí bhú Yelusalema

*(Tsia bhú Mat. 21:1-11, ne bhú Mlk. 11:1-11, di ne bhú Dja. 12:12-19.)*

<sup>28</sup> Píta lí Yesu akpo 'ngú bhomɔ-o lie, ani atsia akodho 'kpí ne akalanɔ ngú nanɔ bhú Yelusalema. <sup>29</sup> Ani akolo lie sɔnda kɔti na Betefadje ne Betania-a,<sup>h</sup> lingo 'ta

---

<sup>h</sup>19:29 Nayie bhú Yelusalema akólo bhú Betefadje ne Betania, a ko kilometele

na ondula na Olive, ani atsia atima omukpata bhisi. <sup>30</sup> Ani pi uo me: «Yi n̄ bhú k̄t̄i inde kala yi aoo. Yi akólo lie oo, yi abháka me u nde agbite ndili punda oo. Kpála bini dh̄k̄u nga pi ani de. Yi bhulu ani amba yi go ne ani ei. <sup>31</sup> I d̄u me kpála bini nde ayi yi me: <Yi ngabhulu ani ngú ni?> Yi de pa pi ani me: <Ngámá ne ḡm̄u ani.>» <sup>32</sup> Omukpata bhisi an̄u, u atsia abhaka nd̄u 'ngú hana maka li Yesu apa pi uo lie ko. <sup>33</sup> U ad̄u abhulu en̄u-o lie, obh̄ubh̄ul̄u-o ayi uo me: «Yi ngabhulu en̄u bhom̄u-o ngú ni?» <sup>34</sup> U agie me: «Ngámá ne ḡm̄u ani.»

<sup>35</sup> Pipita-a, u ago ne ndili 'n̄u-o pi Yesu. U apa okoti gba o pí 'ngb̄u en̄u-o. U atsia ateteke Yesu ngú na'̄u pí 'ngb̄u ani.<sup>i</sup> <sup>36</sup> Ani ad̄u an̄u lie, okpála ad̄u apa okoti gba o li kpadji. <sup>37</sup> Ani akolo de Yelusalema masikpe li ngba 'ta na ondula na Olive. Nd̄u omukpata hana abedhe ne djali bedhe. U atsia aholo nadh̄oḡo Ebhe kpekpeke ngú nd̄u ongamba 'ngú hana inde u au e ko. <sup>38</sup> U ad̄u apa me:

«A ayo me Ebhe tuko bisagu pí

'ngbé ngámá inde ani atima e ko!

Guo 'ngú abh̄ulá,

amba sangu d̄u di pi Ebhe Apí 'Kpí!<sup>†</sup>»

<sup>39</sup> Om̄Falisai koko inde ad̄u bhú ká okpála bhom̄u-o, apa pi Yesu me: «M̄suno, yoko omukpata gba m̄u-o mayoko.» <sup>40</sup> Yesu atsia agie me: «Ma apa pi yi me, i d̄u me u nde agbite 'bh̄o o-o, li oteme holo nat̄u 'ue!»

### Yesu aku 'gbá ngú okpála na Yelusalema

<sup>41</sup> Li Yesu akolo lie masikpe de Yelusalema-a, ani au ḡud̄u-o lie, ani atsia aholo aku 'gbá ngú okpála angoo. <sup>42</sup> Ani ad̄u apa me: «Aa! Ngayi okpála na Yelusalema-a, i d̄u me yi mb̄ila li 'kpí na naki inde-e, guo 'ngú inde u ago pi yi ne e uu-o! La-a, a ko likabhu pi yi anga mb̄ia inde-e, awo lie pi yi mawo. <sup>43</sup> Padhá de, anga oekpí koko akólo pi yi makolo, li 'kpí angoo, obh̄ul̄u yala gba yi-e, asá

---

bata.

<sup>i</sup>19:35 Na'̄u ka Yesu pí 'ngb̄u punda-a, asuno nani bhom̄u-o guo 'ngú di ne nake lie ka ani ne kuto. Tsia bhú Djkl. 9:9.

<sup>†</sup>19:38 Tsia bhú Ets. 118:26.

aga denko yi ngbalina. U búka yi, u tsia há 'gú pí yi ne ndu pápá hana. <sup>44</sup> U agúgumú gúdhú-o. U tsia bhíli ndu okpála inde bhúbhú-o hana. Agba yi-e, teme bini tígala pí kilí e de, anga yi mbíla nani ekpí inde lí Ebhe ago natsia yi líe de!»

### **Yesu alí bhú 'ngbé 'tí Ebhe gba omaYuda**

*(Tsia bhú Mat. 21:12-17, ne bhú Mlk. 11:15-19, di ne bhú Dja. 2:13-22.)*

<sup>45</sup> Pípíta-a, Yesu alí bhú 'ngbé 'tí Ebhe gba omaYuda-o. Aní atsia aholo natsambala okpála inde adu atsindji 'he oo-o.<sup>i</sup> <sup>46</sup> Aní apa pí uo me: «U aye bhú Bhuku gba Ebhe-e me, Ebhe apa me: «Etí gba ma-a, a adú etí nayo ma.» Engú bini, ngayi-e, yi adji, atsia akolo bíli gba obhúlu 'zi!†»

<sup>47</sup> Yesu adu asuno ndu 'kpí hana bhú 'ngbé 'tí Ebhe gba omaYuda. Ongbengbe odimandé , omusuno na líli gba Moidje di ne obhelesi okpála adu agíli kpadji ngú nabhólé aní. <sup>48</sup> Engú bini, u tsia sia kpadji ngú namemene de, anga ndu okpála hana adu adje aní ne gúgumú naali.

## **20**

### **A ngaha angu pí Yesu da?**

*(Tsia bhú Mat. 21:23-27, di ne bhú Mlk. 11:27-33.)*

<sup>1</sup> A akolo ekpí bini, Yesu adu asuno pí okpála bhú 'ngbé 'tí Ebhe gba omaYuda. Aní atsia adu di nakpokpo Bádha Ngali pí uo. Ongbengbe odimandé gba Ebhe , omusuno na líli gba Moidje di ne obhelesi okpála ago. <sup>2</sup> U atsia ayi aní me: «Pa nga pí ya, aha kpadji pí mú ngú namene ongú inde-e da? A aha la di angu angoo-pí mú ngánga da?» <sup>3</sup> Abhomú-o, Yesu atsia agie pí uo me: «Ngama di-e, ma ayí yi lí 'ngú bini. Yi pa nga múma, <sup>4</sup> a ha kpadji pí Dja ngú nabatisa okpála da? Ne me a ko Ebhe, ne me a ko okpála?»

<sup>5</sup> U aholo namene kpekebhe sánda o. U atsia adu apa me: «Í du me ní nde agie

---

<sup>i</sup>19:45 U adu nani atsindji onu di ne odhu bhú 'ngbé 'tí Ebhe gba omaYuda ngubula me okpála, inde adu ne gúgumú ngú nahaha pí Ebhe-e, kala.

†19:46 Tsia bhú Isa. 56:7, di ne bhú Djlm. 7:11.



me: «A aha kpadji pi ani ne Ebhe», ani yí ní me: «Í ḍu mo-o, ka ni yi bhuka la nani engú inde ani aḍu apa e lie de-e?»<sup>6</sup> Í ḍu di me ní nde apa me: «A ha kpadji pi ani ne okpála-a», li nḍu okpála hana bhíli ní ne teme, anga u ambila ndjindji me Dja a nani ne polofeta .»<sup>7</sup> Abhoṃu-o, u atsia agie me: «Ya mbila kpála inde aha kpadji pi ani-e de.»<sup>8</sup> Do Yesu pi uo me: «Í ḍu mo-o, ngama di-e, ma pá pi yi de me aha kpadji m̄ma da ngú namene ehe inde.»

### **Gbitaku p̄ndji okpála na kulu inde abh̄le ndili gba ngámá gba o-o**

*(Tsia bhú Mat. 21:33-46, di ne bhú Mk. 12:1-12.)*

<sup>9</sup> P̄pita-a, Yesu aholo nakpokpo gbitaku inde-e pi okpála me: «Kpála bini alu nani ngu vino.<sup>j</sup> U adje lio ne okpála ngú namene kulu bhú 'dyi-o, amba o ḍu agbó bh̄s̄u o ne uo li nguwa-o. Ani atsia atapa dh̄k̄u nḡbula 'kpí bhelé.

<sup>10</sup> A akolo li nedh̄nga nako lílí o. Abhoṃu-o, ani atima kpála na kulu bini agba okpála ang-o me u ha nguwa bhe gba ni-e pi ni haha. Engú bini, okpála ang-o abhi kpála na kulu bhoṃu-o má kpú! U atsia agie ani ne mb̄l̄u 'kpa e padhá.

<sup>11</sup> Bh̄l̄u 'dyi-e atima matá kpála na kulu koko bini. U abhi di ani, u asosobho ani, u atsia agie ani ne mb̄l̄u 'kpa e padhá. <sup>12</sup> Ani atima matá kpála na bata.

Bhobhoṃu-o, u atsotsolo k̄te ani ne eka. U atsia agbe ani bhú 'dyi-o.

<sup>13</sup> Abhoṃu-o, bh̄l̄u 'dyi atsia apa me: «Ma améne si pi? Ma atíma nga íbili ndili gba ma na m̄k̄nda-o. Nedh̄nga koko-o, u t̄ da namanga ani.»<sup>14</sup> Engú bini, li okpála ang-o au ndili-e lie me-e, u atsia apa s̄nda o me: «Yi tsia nga la ndj̄u kpála inde atígala galikpe ne edyi-o. Ní bh̄le ani, amba edyi-e kolo íbili naaní.»

<sup>15</sup> Abhoṃu-o, u agbe ani bhú 'dyi-o, u abh̄le ani.» Yesu atsia ayi me: «Mb̄ia inde-e, bh̄l̄u 'dyi-e améne ngú uo pi?»<sup>16</sup> Ani agó, ani bhíli okpála na kulu ang-o. Ani tsia há edyi-e pi okpála na kulu koko.» Li okpála adje engú bhoṃu-o lie, u atsia apa me: «A ayo de me, bhobhoṃu-o mene lie de!»

<sup>17</sup> Yesu atsia uo, ani atsia apa me: «Engú inde u aye e bhú Bhuku gba Ebhe-e

---

<sup>j</sup>20:9 Bhú bhuku gba polofeta Isaya-a, vino ngasuno piga gba omaṣalaele. Tsia bhú Isa. 5:1-7.

me:

«Teme inde li okpála nayiki eti-e abhike e,  
akolo teme inde abi eti-e libhomu.†»

A akunda napa pi? <sup>18</sup> I da me kpála nde ati pí teme ango-o, ani gúgum. I da la di me teme ango-o nde ati pí kpála-a, i tú n. ani.»

### **Engú pindji nakala mandjandja**

*(Tsia bhú Mat. 22:15-22, di ne bhú Mlk. 12:13-17.)*

<sup>19</sup> Bha li nedhinga bhomu-o, omusuno na líli gba Moidje di ne ongbengbe odimandø gba Ebhe-e, agili nani naholo Yesu, anga u ambila me ani apa gbitaku bhomu-o li 'ngú gba o-o. Engú bini, u adu adje tsulu ka okpála. <sup>20</sup> Abhomu-o, u aholo akenge Yesu. U atsia atima obhulu kali inde adu amene ehe mugito me uo ngbingbili. Okpála ango-o adu agili naholo ani li 'li e ngubula me o pu ani pi Pilatø, ngamá na ndu doto ango-o. <sup>21</sup> U ayi ani me: «Musuno, ya ambila me mu ngagama 'ngú ndjindji, mu la di ngasuno 'ngú ngbingbili. Mu tsia engbé gba kpála de. Mu ngasuno kpadji gba Ebhe-e pi okpála ngbingbili. <sup>22</sup> Pa nga pi ya, a ayo me ya kala mandjandja gba Kaisala , 'ngbé ngamá na doto na Loma-a , ne me ya kala de?»

<sup>23</sup> Li Yesu ambila ekú gba uo-o lie, ani atsia apa pi uo me: <sup>24</sup> «Yi suno nga lí falanga mu bini. A pépé ne kulu da, la di ne 'li da?» U agie me: «A ko kulu Kaisala, 'ngbé ngamá na doto na Loma, di ne 'li ani.» <sup>25</sup> Abhomu-o, Yesu atsia apa pi uo me: «I da mo-o, yi ha ehe bhende gba Kaisala, 'ngbé ngamá na doto na Loma-a pi e, amba yi ha la di bhende gba Ebhe-e pi Ebhe.» <sup>26</sup> U u siti 'ngú bhú engú inde ani adu apa e kala okpála-a de. Engú bini, u angamba naali ka eli inde ani agie e ko. Kaka-a, u andjili bha má bulu!

### **Nazuku ka okpála inde amu**

*(Tsia bhú Mat. 22:23-33, di ne bhú Mlk. 12:18-27.)*

<sup>27</sup> Abhomu-o, oSadukai koko ago de Yesu. OSadukai ziba nani naao de me

---

†20:17 Tsia bhú Ets. 118:22.

okpála inde amu-o, azúku mazuku-o de. U ayi aní me: <sup>28</sup> «M̄suno, Moidje aye nani lílì pí ní me: «Lì kpála kpi 'o ká wala e me aní nde zu de-e, a ayo me ndai aní de ha òlò angò-o, amba aní zu ongisi pí ndai e inde akpi ko.» <sup>29</sup> La-a, ad̄ nani obhosi mananika bhú piga bini. Bhende na kalan̄-o aha òlò, aní akpi padhá me aní nde zu de. <sup>30</sup> Bhende na bhisi-e aha òkò angò-o. Aní atsia akpi. <sup>31</sup> Pipita-a, bhende na bata-o. A ad̄ bhadi moko pí nd̄ uo mananika hana, u amu me u nde zu de. <sup>32</sup> Alì soso-o, òlò angò-o atsia akpi di. <sup>33</sup> Ya ngayi m̄ me: Lì 'kpí lì okpála inde amu-o azúku lie, òlò angò-o ad̄ naa da? Padhá de, anga nd̄ uo mananika hana aha nani aní!»

<sup>34</sup> Abhom̄-o, Yesu atsia agie pí uo me: «Okpála na naki inde-e ngaha lío. <sup>35</sup> Engú bini, okpála bhende amu-o, lì Ebhe au me u tí da nazuku ngú nasia m̄kobho bhú nedhinga inde ngago-o, u há lío de. <sup>36</sup> U tí da matá namu-u de, anga u akolo ibili maka oandjelu . A ko ongisi gba Ebhe, anga u azuku. <sup>37</sup> Moidje asuno pí ní mbámbá me okpála inde amu-o azúku mazuku. Aní aye bhú bhuku gba e lì bìlì inde aní akpo 'ngú lie p̄ndji tsa 'po inde ad̄ atsi-e me, Ebhe apa me: «Ma ne Ebhe inde lì Abalahama ngadhögò e, Ebhe inde lì Isaka ngadhögò e, Ebhe inde lì Yakobho ngadhögò e ko.» <sup>38</sup> Ebhe ne Ebhe gba okpála bhende amu-o ade. Engú bini, a ko Ebhe gba okpála bhende bhú m̄kobho, maka lì Abalahama, Isaka ne Yakobho nde pí aní lie bhú m̄kobho ko.»

<sup>39</sup> Abhom̄-o, om̄suno na lílì koko atsia agie pí aní me: «M̄suno, mo opa ndj̄ndji.» <sup>40</sup> Kaka-a, u yi matá aní lì 'ngú bini de.

### **Masiya ne Ngámá gba Davidi**

*(Tsia bhú Mat. 22:41-46, di ne bhú Mlk. 12:35-37.)*

<sup>41</sup> Abhom̄-o, Yesu apa matá pí uo me: «Lele pí lì okpála tí da napa lie me Masiya ne ndilì na piga gba Davidi-e? <sup>42</sup> Padhá de, anga ngaani Davidi makpe-e, aní apa bhú bhuku na oetsi gba omaYuda me:

---

<sup>k20:37</sup> Abalahama, Isaka ne Yakobho ngadhögò Ebhe anga pí Ebhe-e, beleḡ u amu lie lì k̄ate o, uo bhú m̄kobho lì bua o. Tsia bhú Eki. 3:6.

«Ebhe Ngámá apa pi Ngámá gba ma-a me:

Du kuto li pá 'kpa ma na kokpa,

<sup>43</sup> akólo li nedhinga inde ma a'ó obhulɔ yala gba mu-o lie  
dabili na sa-tidhu mu ko.»<sup>†</sup>

<sup>44</sup> I du me Davidi nde nga'i Masiya me Ngámá gba ni-e, lele pi li Masiya ti da  
nada lie ndili na piga gba Davidi-e?»

### **Yi améne maka omusuno na líli de**

*(Tsia bhú Mat. 23:1-36, di ne bhú Mk. 12:38-40.)*

<sup>45</sup> Ani apa pi omakpata kala ndu okpála hana inde adu adje ani-e me: <sup>46</sup> «'E-e! Yi  
lila liyi ka omusuno na líli gba Moidje-e uu! U kanda bha nadhuku ne ondjangja  
yambu. U kanda bha me okpála du ne yiyi o maka ongámási li bili li okpála  
aperekobhe bhula o lie ko. U kanda bha nadulu pi odabili na akalanu bhú oeti  
nadje líli , di ne odabili na akalanu bhú da anokomia. <sup>47</sup> U ngandjia angu okesi  
na olisilisi ne nabha ohe gba uo. U ngayo Ebhe ngengele ngu nasuno mugito me a  
ko obabadha okpála. Kaka-a, u asia likabhu naali!»

## **21**

### **Makiso gba oko bini na eole**

*(Tsia bhú Mk. 12:41-44.)*

<sup>1</sup> Ekpi bini, Yesu adu bhú 'ngbé 'ti Ebhe gba omaYuda. Ani atsia 'kpi, ani au  
me obhulu tia ngabhike tia gba o-o bhú sanduku na makiso na 'Ngbe 'ti Ebhe-e  
ngu nahaha pi Ebhe. <sup>2</sup> Ani atsia au di oko bini na eole bhulu ndibhili me ani nde  
ngabhike senge bhisi. <sup>3</sup> Abhomu-o, ani atsia apa me: «Ma apa pi yi na paká me,  
eole na ndibhili li 'ko e akpi inde-e, aha makiso ane ndu okpála koko hana. <sup>4</sup> Padhá  
de, anga ndu okoko hana, u aha tia bhende u nde ne gumu e ade ko. Engu bini,  
ngaani-e, abana ani nde lie bhú ndibhili-e, ani aha ndu bhende ani adu akobho lie  
hana.»

---

<sup>†</sup>20:42-43 Tsia bhú Ets. 110:1.

## Yesu apa me: «U agúgumụ 'ngbé 'ti Ebhe gba omaYuda-o»

(*Tsia bhú Mat. 24:1-2, di ne bhú Mlk. 13:1-3.*)

<sup>5</sup> Pipita-a, okpála koko aholo akpokpo 'ngú pindji 'ngbé 'ti Ebhe gba omaYuda-o. U adụ apa me: «A bha ndjụ babadha naali ne obabadha teme ang-o, di ne ohe na mase naali inde u aha e pi Ebhe-o.» Engú bini, Yesu atsia apa me: <sup>6</sup> «Ndu 'he inde yi ngau e inde-e, ekpí koko akólo makolo, teme bini tígala pí kilí e de. U agúgumụ eti-e hana kuto.»

### Likabhu inde akólo kala sokpí-o

(*Tsia bhú Mat. 24:3-14, di ne bhú Mlk. 13:3-13.*)

<sup>7</sup> Abhom-o, u atsia ayi ani me: «Mụsuno, engú inde mụ ngakpokpo 'ngú pindji e bhom-o, akólo nadho? Ehe inde asúno nedhinga nago ka engú ang-o, a adú ni?» <sup>8</sup> Yesu agie me: «Yi lila liyi uu! Kpála bini apíte yi de. Padhá de, anga okpála bhelé agó ne 'li ma, u tsia pá me: «Ma ne Masiya !» U tsia pá di me: «Nedhinga nago ka Masiya akolo!» Engú bini, yi akpáta uo de. <sup>9</sup> I dụ me yi nde adje okpála ngakpo 'ngú na oegú di ne ongú na okpekpeke 'ndji-e, yi adjé tsulụ de. Padhá de, anga a ayo ngaiza me oengú ang-o kolo kalan. La-a, sokpí-e dụ nga kolo má gala mo-o de.» <sup>10</sup> Pipita-a, ani matá pi uo me: «Okpála na kúti bini ahá 'gú pi okpála na kúti koko. Li ngámá na kúti bini há 'gú pi ngámá na kúti koko. <sup>11</sup> Doto adyíki ne adjigidjo na ngbéngbé. Adyíndi di ne osisiti kuo natagba matagba alí bhú obili ngangá. Yi aú ongamba 'ngú di ne ongú na tsulụ tsulụ abhúlá.

<sup>12</sup> Engú bini, kala me ndụ 'ngú bhom-o hana kolo-o, u ahólo yi. U améne yi sisiti. U anú ne yi me u kodho 'ngú gba yi-e bhú 'ti nadje líli gba Moidje . U tsia bhíke yi bhú tikp. U asungula yi pi ongbengbe ongámási di ne obhende ngatsia 'kpí li kúti-e kabula 'li ma. <sup>13</sup> Bhobhom-o ahá kpadji pi yi ngubula me, yi kpokpo 'ngú gba ma-a pi uo. <sup>14</sup> Yi 'o li bua yi me, yi gíli engú inde yi apá e li nedhinga nakodho 'ngú gba yi-e kalan de. <sup>15</sup> Padhá de, anga ma ahá eli di ne imbilang pi yi ngama makpe, ngubula nagbite 'bhø ndụ obhulụ yala gba yi-e hana. <sup>16</sup> Odyi yi ne ohi yi, ondaise yi ne okpála na piga gba yi di ne obi yi apú

belegu yi ngao. U abhíli okpála koko bhú ka yi. <sup>17</sup> Ndú okpála hana ayála yi kabula 'li ma. <sup>18</sup> Engú bini, 'kpa sundjo yi ngíta belegu de bini. <sup>19</sup> I dū me yi nde alū kpekpeke akólo li soso-o, yi sía mukobho na dūduma.»

### **Engú inde akólo li Yelusalema**

*(Tsia bhú Mat. 24:15-21, di ne bhú Mlk. 13:14-19.)*

<sup>20</sup> «Nedhinga yi aú lie me osudha asa Yelusalema ngbalina-a, yi de mbila me, nakpi kaka-a akolo masikpe. <sup>21</sup> Abhomu-o, okpála bhende a abháka o bhú ndu doto na Yudaya-a, a ayo me u kpe ne apí 'ta. Obhende adú bhú Yelusalema-a, a ayo me u ze bhúbhú maze. Obhende adú asangba gudhu-o, a ayo matá de me u li abhú gudhu-o de. <sup>22</sup> Padhá de, anga adú ekpí nakodho 'ngú gba Ebhe ngubula me ndú 'ngú hana inde u aye e bhú Bhuku gba Ebhe-e , amene lie. <sup>23</sup> Li 'kpí angoo, adú likabhu na ngbéngbé pi olisi na ebhi di ne obhende li ongisi adú andji 'ka o-o. Padhá de, anga okpála na doto adjé likabhu naali, li mangimbo gba Ebhe-e súno lie pi uo. <sup>24</sup> U abhíli okoko ne ombotia. U tsia mbá okoko bhú bali ne ndú bili hana. Omupagano adédele Yelusalema ne 'dhu o akólo bha bini li nedhinga gba uo andjía lie ko.»

### **Nakolo ka sokpí**

*(Tsia bhú Mat. 24:29-31, di ne bhú Mlk. 13:24-27.)*

<sup>25</sup> «U aú oengú na ngangamba bhúla ela, bhúla epe di ne bhúla oikupala. Píla doto-o, bua okpála hana adú ati má ngbi ngbi ngbi ne tsulū ka tolo, di ne ka li 'ngbé 'ngu adú adimba lie ko! <sup>26</sup> Okpála amú ne tsulū ka nabhundja engú inde akólo píla doto libhomu-o, anga ndú 'he na abhúlá hana adyíki má djigi djigi! <sup>27</sup> Pípita-a, u tsia ú ma ngama, Ndili gba kpála, me ma nde ngago bhú ndindi ne angu di ne asasaua gba ma-a hana.† <sup>28</sup> Nedhinga li ongú angoo ahólo amene lie lie, yi de lū kpekpeke, amba yi 'e 'ndji yi ne abhúlá, anga ekpí li Ebhe akóbho yi lie akolo masikpe.»

---

†21:27 Tsia bhú Dan. 7:13.

## Gbitaku pindji ndula na figi

(*Tsia bhú Mat. 24:32-35, di ne bhú Mlk. 13:28-31.*)

<sup>29</sup> Pipita-a, Yesu atsia apa gbitaku inde-e pi uo me: «Yi tsia nga ndula na figi di ne ondula koko hana. <sup>30</sup> Yi u me 'kpá 'kpá aholo nakə-o, yi mbila me gboko 'kpí akolo masikpe. <sup>31</sup> A bhadi moko, nedhinga yi aú ongú bhomə-o lie ngakolo-o, yi de mbila me Naə gba Ebhe-e akolo masikpe. <sup>32</sup> Ma apa pi yi na paká me, ndə 'ngú bhomə-o hana akólo me okpála na naki inde-e nde mu nga ndə o hana de. <sup>33</sup> Ekpí ne doto akódho 'kpí makodho. Engú bini, 'li ma kódho 'kpí belegə de bini.»

## Yi lila liyi malila

<sup>34</sup> «'E-e! Yi lila liyi uu! Yi adú abhundja bha engú na anokomia, ne engú nalangba ne pandi di ne ongangá 'ngú na doto inde-e de. I də mo-o, li ekpí li ngama, Ndili gba kpála, ma agó lie, i kólo li yi bhú gbilikiti, <sup>35</sup> maka ekú ahoholo onə lie ko. Padhá de, anga ahólo okpála píla doto libhomu. <sup>36</sup> Yi alá-a de. Yi də nayo Ebhe ndə nedhinga hana, ngəbula me yi sia angu ngú nakpe ndə 'ngú inde akólo hana, amba yi koto ngú nalə kala ma, Ndili gba kpála-o.»

<sup>37</sup> Ne ngbikpi-e, Yesu adə asuno bhú 'ngbé 'ti Ebhe gba omaYuda-o. Tagolo, ani atsia adə anə asi apí 'ta na ondula na Olive. <sup>38</sup> Ndə okpála hana adə ago bhú sikikpi bhú 'ngbé 'ti Ebhe ngú nadjé ani.

## 22

### Ongámási gba omaYuda agili nabhele Yesu

(*Tsia bhú Mat. 26:1-5, ne bhú Mlk. 14:1-2, di ne bhú Dja. 11:45-53.*)

<sup>1</sup> Ekpí na anokomia na Pasika , ekpí ayo di lie me u zə mapa inde li levile nde bhú e ade-e, akolo masikpe. <sup>2</sup> Ongbengbe odimandə gba Ebhe di ne oməsuno na líli gba Moidje adə agili kpadji ngú nabhele Yesu. Engú la bini, u adə adje tsələ ka okpála.

<sup>3</sup> Pipita-a, Satana ali li bua Yuda inde u a'i e me Isikaliote, səka obhələ titima

ndjikpa ne ká bhisi gba Yesu-o. <sup>4</sup> Abhomu-o, ani anu nadjé lie ne ongbengbe odimandé gba Ebhe di ne ongámási gba okpála nalila 'ngbé 'ti Ebhe gba omaYuda. Ani anu nakpokpo ne uo maka ani apú Yesu lie pí uo ko. <sup>5</sup> U akpi djali naali, u atsia adje lio sùnda o me o há pí ani falanga. <sup>6</sup> Yuda aziba. Ani atsia aholo agili nedhinga na ndjindji ngú napu Yesu pí uo me, okpála nde de uo ade.

### **Yesu atima okpála me, u nu po bhúla ezú na anokomia**

*(Tsia bhú Mat. 26:14-16, ne bhú Mlk. 14:12-21, di ne bhú Dja. 13:21-30.)*

<sup>7</sup> Ekpí na anokomia nazú mapa inde lí levile nde bhú e ade-e akolo. A adu di ekpí inde ayo lie me u bheló folo kandeló ngubula anokomia na Pasika-o. <sup>8</sup> Yesu atima Piele ne Dja . Ani pí uo me: «Yi nu leke ndu 'ngú hana pí ní ngú anokomia-o.» <sup>9</sup> U atsia ayi ani me: «Mo okúnda me ya nu leke su?» <sup>10</sup> Ani agie pí uo me: «Yi djedje, yi alí lie bhú Yelusalema-a, yi atú liyi ne bhoko bini me ani nde abi lusa 'ngu pí 'ndji e. Yi kpata ani bhú eti inde ani alí bhú e-o. <sup>11</sup> Yi yi bhulu eti angó-o me: «Músuno ngayi mu me, tina 'ti inde ma azú anokomia ne omukpata gba ma-a bhú e ngae dho?» <sup>12</sup> Ani asúno 'ngbé tina 'ti bhe na abhúla-a pí yi bini. Ndu 'he hana bhúbhú. Yi leke ehe na anokomia bhúbhú.» <sup>13</sup> U agbida, u abhaka ndu 'ngú hana maka lí Yesu apa lie ko. Abhomu-o, u atsia aleke ezú na anokomia-o.

### **Yesu aha mapa ne vino pí obhulu titima**

*(Tsia bhú Mat. 26:26-30, ne bhú Mlk. 14:22-26, di ne bhú 1 Kol. 11:23-25.)*

<sup>14</sup> Lí nedhinga angó-o akolo lie, Yesu ne obhulu titima gba e atsia adulu kuto ngú nazú 'he-o. <sup>15</sup> Ani apa pí uo me: «Ma adu nako ne gumu naali me ní zu anokomia inde-e ne yi bhú dabilí bini kala me ma dje líkabhu ko! <sup>16</sup> Padhá de, anga ma apa pí yi me, ma zú matá-a de, akólo lí nedhinga inde lí tata-a asúno lie lie bhú Nau gba Ebhe ko.» <sup>17</sup> Abhomu-o, ani aha kópo na vino-o, ani agie heni pí Ebhe. Ani atsia apa me: «Yi haha, amba yi ndji ndu yi hana. <sup>18</sup> Ma apa pí yi me, ma ndjí matá-a de akólo lí nedhinga inde lí Nau gba Ebhe-e agó lie ko.»

<sup>19</sup> Pípita-a, ani aha mapa-o, ani agie heni pí Ebhe. Ani agumu bhusu bhusu, ani



aha pi uo. Aní atsia apa me: «A inde-e kute ma [inde aha lie pi yi-o. Yi de amemene moko, ngubula nabhundja ma.»<sup>20</sup> Pita u andjia nazu 'he bhomu-o lie, aní aha di kopo na vino-o pi uo, aní atsia apa me: «Vino inde-e, a ko gandja na mbia li Ebhe akodho e ne yi ne ngute ma inde atuko pi yi-o.]

<sup>21</sup> Engu bini yi tsitsia, kpala inde apu ma-a, aní ngazu 'he ne ma bhu dabili bini si! <sup>22</sup> Padha de, anga a ayo me ngama, Ndili gba kpala-a, ma kpi maka li Ebhe apa lie ko. Engu la bini, a ko likabhu naali pi kpala inde apu ma ko!» <sup>23</sup> Abhomu-o, u atsia aholo ayi lio sunda o me, a ko kpala bhedho bhu ka o inde i ti da namene 'ngu bhomu-o.

### **Ane ne engbe da?**

<sup>24</sup> Pipita-a, omukpata aholo amene kpekebhe sunda o ngu nambila me ane ne engbe bhu ka o da. <sup>25</sup> Yesu atsia apa pi uo me: «Ongbengbe ongamasí gba omupagano-o ngaha líli pi okpala gba o-o. Obhende ngatsia 'kpi li doto-o kanda me u 'i o me <Obabadha okpala.> <sup>26</sup> Pi yi-e, yi amene mo-o de. Engu bini, a ayo me kpala inde ane ne engbe bhu ka yi-e de maka mboye ndili, amba kpala inde ngatsia 'kpi li okpala koko-o, de naae maka kpala na kulu gba uo-o. <sup>27</sup> Padha de, anga ane ne engbe da, ne me a ko kpala inde ngazu 'he? Ne me a ko kpala inde ngamene kulu kulu-o. A ko kpala inde ngazu 'he-e di? La-a, ma bhu ka yi maka kpala na kulu gba okpala koko.

<sup>28</sup> Ngayi obhulu titima gba ma-a, ni adu ne yi ndu 'kpi hana bhu nedhinga inde ma adu adje likabhu gba ma-a lie ko. <sup>29</sup> Kaka-a, ma aha Na pi yi maka li 'Dyi ma aha di ma lie ko. <sup>30</sup> Abhomu-o, yi azu 'he, yi tsia ndji di vino ne ma bhu dabili bini, i de me ma nde ali bhu Na gba ma-o. Yi adulu di pi odabili na ngama ngu nakodho 'ngu gba opiga ndjikpa ne ka bhisi gba omatsalaele ko.»

### **Yesu apa pi Piele me: «Mo oyala ma»**

*(Tsia bhu Mat. 26:31-35, ne bhu Mk. 14:27-31, di ne bhu Dja. 13:36-38.)*

<sup>31</sup> Pipita-a, Ngama Yesu atsia apa me: «Simo, Simo, djedje nga! Ebhe aha kpadji pi Satana me aní pe yi maka u apepe mapunga lie ko. <sup>32</sup> Engu bini, ngama-a, ma

ayo Ebhe ngú m̄, amba mo o'ó ká nabhuka gba m̄-o de. Mo odjí matá bua m̄ lie, m̄ de ha di angu pi ondaise m̄ uu.»<sup>33</sup> Piele apa pi ani me: «Ngámá, ma bedhe me, abana i d̄ nan̄ bhú tikp̄ di ne nakpi-e, ní n̄ ne m̄ bhú dabili bini.»<sup>34</sup> Yesu agie pi ani me: «Piele, ma apa pi m̄ me, sukpe na naki inde-e, kala me enḡ ku 'gbá-a, mo opá bh̄tsibh̄tsi bata me ni mbila ma de.»

### **Yesu apa pi om̄kpata gba e me, u leke lio ngubula egú**

<sup>35</sup> Pipita-a, ani atsia ayi uo me: «Nedhinga nako ma atima yi lie mand̄ tia-a, mand̄ gonia ne maløkø-o, ehe bini aneke nako ka yi uu?» U agie me: «Ehe bini neke ka ya de.»<sup>36</sup> Do ani pi uo me: «Mbia inde-e, kpála bhende li tia ne gonia nde ka e-e, a ayo me ani haha. Kpála bhende li mbotia nde ka e ade-e, a ayo me ani tsindji koti gba e-o, amba ani kala mbotia ne di.»<sup>37</sup> Padhá de, anga ma apa pi yi me, engú inde u aye e bhú Bhuku gba Ebhe-e me, «U ato ani bhú ká okpála na sisiti-e», a ayo me amene lie li k̄te ma. A moko, engú inde atsia ma-a, a adji amene lie.†»<sup>38</sup> Om̄kpata atsia apa me: «Ngámá, a ka ya si ne ombotia bhisi.» Ani atsia agie pi uo me: «A ale.»

### **Yesu an̄ nayo Ebhe pí eta na ondula na Olive**

*(Tsia bhú Mat. 26:36-46, di ne bhú Mk. 14:32-42.)*

<sup>39</sup> Pipita-a, Yesu akoto. Ani an̄ apí eta na ondula na Olive<sup>1</sup> maka ani ad̄ amemene lie ko. Om̄kpata gba ani atsia akpata di ani.<sup>40</sup> U akolo lie oo, ani atsia apa pi uo me: «Yi yo Ebhe, amba yi alí bhú nale de.»<sup>41</sup> Ani ayie de uo, ani adyudyo mbo lie tsutsu masudha. Ani akikita lip̄k̄ e kuto, ani atsia ayo Ebhe me:<sup>42</sup> «'Dyi ma, i d̄ me m̄ nde ak̄nda-a, m̄ de 'e likabhu inde-e de ma tsutsu. La-a, mo oméne maka ma ak̄nda lie de, mene mangbo maka mo ok̄nda lie ko.» [ <sup>43</sup> Abhom̄-o, andjelu bini ayie abhúlá, ani akoto li ani, ani atsia aha angu pi ani.<sup>44</sup> Ani abedhe lie ne likabhu-o, ani atsia aholo matá nayo Ebhe kpekpeke naali. Ngufu na k̄te ani akolo maka nḡte, a atsia ad̄ ayi kuto má ta ta ta!]

---

†22:37 Tsia bhú Isa. 52:12.

<sup>1</sup>22:39 Eta na ondula na Olive-e asangba ḡdh̄ na Yelusalema.

<sup>45</sup> Pita li ani a'o nayo Ebhe lie, ani ayie bhúlá, ani agie lie ade oməkpa. Ani abhaka me u nde atuko ne ela ka likabhu. <sup>46</sup> Ani atsia apa pi uo me: «Yi atuko ne ela ka ni? Yi yie bhúlá, amba yi yo Ebhe, ngubula me yi alí bhú nale de.»

### U aholo Yesu

*(Tsia bhú Mat. 26:47-56, ne bhú Mlk. 14:43-50, di ne bhú Dja. 18:3-11.)*

<sup>47</sup> Li nedhinga li Yesu adu apa 'ngú bhomu-o lie, Yuda saka obhulu titima ndjikpa ne ká bhisi-e ago ne bhiti okpála. Ani adyudyo lie de Yesu masikpe ngubula me ni nvu pabhø ani. <sup>48</sup> Abhomu-o, Yesu atsia apa pi ani me: «Mu nganvu pabhø ma, Ndili gba kpála, ngubula naru ma-a?»

<sup>49</sup> Li oməkpa gba Yesu-o au engú inde adji akódho 'kpí-e lie, u atsia ayi Yesu me: «Ngámá, a la ya gu ne uo ne mbotia?» <sup>50</sup> Saka uo asu kpála na kulu gba bhele kpála gba odimandø gba Ebhe-o . Ani atsia akodho kpadje ani li pápá na kokpa-a má tse! <sup>51</sup> Engú bini, Yesu atsia apa me: «Yi 'o'o, a apise moko.» Ani aha kpadje kpála ango-o, ani a'o 'kpa e tété, ani atsia akobho ani.

<sup>52</sup> Pipita-a, Yesu atsia apa pi ongbengbe odimandø ne ongámási gba omulila na 'ngbé 'ti Ebhe gba omaYuda, di ne obhelesi okpála inde ago ngú naholo ani-e me: «Ka ni yi ago ngú ma lie ne ombotia, di ne ondula magito me yi ago ngú naholo bhulu 'zi-e? <sup>53</sup> Ni adu nako ne yi ndu 'kpí hana bhú dabili bini bhú 'ngbé 'ti Ebhe gba omaYuda. La-a, yi holo ma de. Engú bini, nedhinga gba yi-e akolo, nedhinga gba ngámá na biti-o.»

### Piele apa me ni mbila Yesu de

*(Tsia bhú Mat. 26:57-58, 69-75, ne bhú Mlk. 14:53-54, 66-72, di ne bhú Dja. 18:12-18, 25-27.)*

<sup>54</sup> Abhomu-o, u aholo Yesu, u anu ato ani bhú 'ti gba bhele kpála gba odimandø gba Ebhe-o. Piele adu akpata uo mbo tsutsu. <sup>55</sup> A abhaka me u nde akpo djua tu mbadhasu, okpála adulu dede. Piele atsia ago adu bhú ká uo. <sup>56</sup> Kpála na kulu bini na øleø au ani li zi djua me ani nde adu kuto. Ani atsia Piele ne kpéke djila, ani me: «Kpála inde-e du di nako ne ani bhú dabili bini!» <sup>57</sup> Engú bini, Piele ayala, do

ani de-e: «Ma ambila ani de, ɛlɛ-e.»<sup>58</sup> Pita nedhinga bedi-e, bhoko bini au ani, ani atsia apa me: «Ngamɛ di-e, mɛ ne sɛka okpála gba Yesu-o!» Engú bini, Piele atsia agie me: «Bhoko-e, ma ne sɛka uo ade.»

<sup>59</sup> Pipita abhue mbo ngengele. Bhoko koko atsia azi kekele tété me: «A ko kɛkɛlɛ 'ngú, kpála inde-e dɛ nako ne Yesu bhú dabili bini, anga a ko di kpála na Galilaya.»<sup>60</sup> Engú bini, Piele agie pi bhoko ango-o me: «Bhoko-e, ma mbila 'ngú inde mɛ ngapa e de.» Bha li nedhinga inde ani adɛ apapa lie, engɛ atsia aku 'gbá.<sup>61</sup> Ngámá Yesu adji bhúla e, ani atsia bhúla Piele. Abhomɛ-o, Piele atsia abhundja engú inde li ngámá Yesu apa igini e pi ani-o me: «Sukpe na naki inde-e, kala me engɛ ku 'gbá-a, mo opá bhɛtsibhɛtsi bata me ni mbila ma de.»<sup>62</sup> Piele akoto kilidjo, ani abhɛlɛ kuo e ne egbá má kusu!

### **U asobho Yesu, u atsia abhi di ani**

*(Tsia bhú Mat. 26:67-68, di ne bhú Mlk. 14:65.)*

<sup>63-64</sup> Okpála inde adɛ alila Yesu-o aholo amɛ ani. U agbite djila ani. U aholo abhi ani. U atsia adɛ ayi ani me: «Aa! Ngamɛ, polofeta-a , pa nga pi ya me asɛ mɛ da!»<sup>65</sup> U asosobho ani. U atsia apa di ongú koko pi ani bhelé bhú osobho inde u adɛ asosobho ani ne e ko.

### **Odimandɛ akodho 'ngú gba Yesu**

*(Tsia bhú Mat. 26:59-66, ne bhú Mlk. 14:55-64, di ne bhú Dja. 18:19-24.)*

<sup>66</sup> Li ekpí aseke lie, obhelesi okpála gba omaYuda apɛkɛbhɛ bhúla o bhú dabili bini ne ongbengbe odimandɛ gba Ebhe, di ne omɛsuno na líli gba Moidje-o. U atsia agbe ani kala Libi okpála natsia 'kpí li 'ngú gba omaYuda-o .<sup>67</sup> U ayi ani me: «Í dɛ me mɛ nde ne Masiya-a , mɛ de pa pi ya.» Abhomɛ-o, ani agie pi uo me: «Í dɛ me ma nde apa pi yi-e, yi bhúka de.»<sup>68</sup> Í dɛ la di me ma nde ayi yi li 'ngú-o, yi gíe 'ngú mɛma tété de.<sup>69</sup> Nayie pi mbia inde-e, ngama, Ndili gba kpála-a, ma adú li pápá na kokpa gba Ebhe na angu-o.<sup>†</sup><sup>70</sup> Abhomɛ-o, ndɛ uo hana atsia ayi me: «Bhobhomɛ-o apa me mɛ ne Ndili gba Ebhe?» Ani agie pi uo

---

<sup>†</sup>22:69 Tsia bhú Ets. 110:1.

me: «A maka yi apa lie ko.»<sup>71</sup> Abhomu-o, u atsia apa me: «Ní matá ne gumu okpála koko inde i ti da napa engú ang-o pi ní ade, anga ní adje bha nganí makpe bhú 'li aní adje!»

## 23

### U anu ne Yesu kala Pilate

*(Tsia bhú Mat. 27:1-2, 11-14, ne bhú Mk. 15:1-5, di ne bhú Dja. 18:28-38.)*

<sup>1</sup> Pipita-a, ndu okpála hana inde adu bhú dá bula-a ayie bhúlá, u atsia anu ne Yesu kala Pilate, ngámá na Loma .<sup>2</sup> Oo, u aholo apa li Yesu me: «Ya abhaka kpála inde-e me aní nde ngaha kpéke 'ndji pi okpála gba ya-o. Aní nde ngayoko uo me u akala mandjandja gba Kaisala , 'ngbé ngámá na Loma-a de. Aní atsia adu apa di me ni ne Masiya , akunda napa me 'ngbé ngámá.»

<sup>3</sup> Pilate ayi aní me: «Ngamu-o, mu ne 'ngbé ngámá gba omaYuda?» Yesu agie pi aní me: «Mo opa ngamu.»<sup>4</sup> Abhomu-o, Pilate atsia apa pi ongbengbe odimandé di ne bhiti okpála bhomu-o me: «Ma u engú bini inde a ayo me u holo kpála inde-e ngú e de.»<sup>5</sup> Engú bini, u azi bha kekele tété me: «Bhú nasuno gba aní-e, aní ngaha kpéke 'ndji pi okpála me u améne líli gba ngámá-a de. Aní amene bhú doto gba omaYuda libhому. Aní akpo bhú ndu doto na Galilaya. Mbía inde-e, aní akolo ibili ne di ei.»

### U anu ne Yesu kala ngámá Elode

<sup>6</sup> Li Pilate adje lie mo-o, aní atsia ayi me: «Kpála inde-e, a ko kpála na Galilaya?»<sup>7</sup> U agie pi aní me: «A moko, a ko kpála na Galilaya.» Abhomu-o, li Pilate adje lie me Yesu ayie bhú ndu doto li ngámá Elode adu alila e-e, aní atsia atima aní pi aní. Padhá de, anga bhú ekpí ang-o, Elode adu di bhú Yelusalema oo.<sup>8</sup> Elode akpi djali naali li aní au Yesu lie. Padhá de, anga nayie nani didili naali, aní adu akunda me ni u Yesu ka engú gba aní inde aní adu adje e-o. Aní atsia adu akunda nau aní me aní nde ngamene ngamba 'ngú.<sup>9</sup> Aní ayiyi Yesu li ongú bhelé. Engú bini, Yesu gie 'ngú pi aní tété belegu de bini.<sup>10</sup> Ongbengbe

odimandɛ di ne omɛsuno na líli gba Moidje adɛ oo. U adɛ apa 'ngú li kɛte ani sisiti naali. <sup>11</sup> Elode ne osɛdha gba e amɛ ani, u atsia asosobho di ani. Pipita-a, u adyi bádha bongo li ani, u atsia agie ani pi Pilatɛ. <sup>12</sup> Kalanɛ-o, Elode ne Pilatɛ dɛ nadje lio de. Nayie li 'kpí ang-o, u atsia akolo bhú makpolia.

### **U akodho 'ngú gba Yesu me ani kpi bha makpi**

*(Tsia bhú Mat. 27:15-26, ne bhú Milk. 15:6-15, di ne bhú Dja. 18:39-19, 16.)*

<sup>13</sup> Abhomɛ-o, Pilatɛ apo bhúla ongbengbe odimandɛ, ongámási gba omaYuda di ne okpála. <sup>14</sup> Ani atsia apa pi uo me: «Yi ago ne kpála inde-e mɛma me ani ngaha kpéke 'ndji pi okpála. La-a, ma ayi ani li 'ngú ang-o kala yi si, ma u ani ne siti 'ngú belegɛ de bini bhú ká ndɛ 'ngú hana inde yi apa e li ani-o. <sup>15</sup> Elode u di siti 'ngú ka ani de anga ani agie ani pi ní ei. A moko me kpála inde-e mene siti 'ngú belegɛ de bini inde u ti da nabhɛlɛ ani ka e ko. <sup>16</sup> Kaka-a, ma abhí ani ne fimbo, ma atsia tsé 'kpa li ani.» [ <sup>17</sup> Bhú ndɛ anokomia na Pasika hana, a ayo me Pilatɛ tse 'kpa li kpála inde u aholo e bhú tikpɛ-o pi uo bini.]

<sup>18</sup> Engú bini, ndɛ uo hana aholo asusula bhú dabili bini me: «Bhɛlɛ kpála bhomɛ-o mabhɛlɛ, amba mɛ tse 'kpa li Balaba pi ya!» <sup>19</sup> (U aholo nani Balaba bhú tikpɛ anga ani agbe nani kpéke 'ndji abhú Yelusalema, ani atsia abhɛlɛ di kpála.) <sup>20</sup> Pilatɛ adɛ akɛnda natse 'kpa li Yesu. Kaka-a, ani atsia ayi matá uo li 'ngú ang-o ko. <sup>21</sup> Engú bini, u aholo bha nasusula me: «Gi ani li kulusi! Gi ani li kulusi!» <sup>22</sup> Bhɛtsibhɛtsi na bata-a, ani apa pi uo me: «Ani amene la mangua siti 'ngú dho? Ma u engú inde ani amene e, u ti da nabhɛlɛ ani ka e de. Ma abhí bha ani ne fimbo, ma tsia tsé 'kpa li ani.»

<sup>23</sup> Engú bini, u azi bha kekele tété kpekpeke me, a ayo me u gi Yesu li kulusi. U adɛ bha a'é'e 'li o ne bhúlá, akolo li nedhinga li 'li uo aha angu Pilatɛ lie ko.

<sup>24</sup> Abhomɛ-o, Pilatɛ atsia aziba namene maka u adɛ akɛkɛnda lie ko. <sup>25</sup> Ani atsia atse 'kpa li kpála inde u adɛ ayo e-o, kpála inde u aholo e bhú tikpɛ-o. Padhá de, anga ani agbe kpéke 'ndji, ani atsia abhɛlɛ di kpála. Engú bini, ani atsia aha Yesu pi uo me u mene ne ani maka u adɛ akɛkɛnda lie ko.

### **U anɛ ne Yesu ngú nabhɛlɛ ani**

*(Tsia bhú Mat. 27:32-44, ne bhú Mlk. 15:21-32, di ne bhú Dja. 19:17-27.)*

<sup>26</sup> Li osudha adu anu ne Yesu lie, u akø lio ne Simo, kpála na ndu doto na Silene, me aní nde ayie abhiye. U aholo aní, u atsia a'o kulusi gba Yesu-o lí 'ngbu aní me, aní bíbí amba aní kpata Yesu ne di.

<sup>27</sup> Okpála bhelé adu akpata Yesu. Bhú ká uo-o, adu di ne olisi inde adu aku 'gbá ne nalopolo lio ngú aní-o. <sup>28</sup> Yesu adjí bhúla e ne apí uo, aní atsia apa pí uo me: «Ngayi, olisi na Yelusalema-a, yi akú 'gbá ngú ma de! Engú bini, yi ku mangbo egbá ngú yi ne ongisi gba yi ko. <sup>29</sup> Padhá de, anga oekpí koko akólo makolo, oekpí inde u apá lie me: «A ko djali pí olisi inde i zu de, inde i bí 'bhi de, di ne obhende lí ongisi ndji 'ka o de-o!» <sup>30</sup> Lí nedhinga bhomu-o, okpála ahólo napa pí ongbengbe 'ta me: «Yi buku ya!» U tsia pá pí odjedje 'ta me: «Yi wo ya!»<sup>†</sup>

<sup>31</sup> Padhá de, anga i du me okpála nde amene ndula bhe na yiyi-e mo-o, u méne la íbili naae ndula bhe na keke-e pí?»<sup>m</sup>

<sup>32</sup> Lí nedhinga bhomu-o, u anu di ne obhosi bhisi koko inde amene sisiti 'ngú naali me u bhili uo bú dabilí bini ne Yesu.

### **U agí Yesu lí kulusi**

*(Tsia bhú Mat. 27:45-56, ne bhú Mlk. 15:33-41, di ne bhú Dja. 19:28-30.)*

<sup>33</sup> U akolo lí bílí inde u alí e me «Pelegendjí.» U atsia agí Yesu lí kulusi di ne okpála na sisiti bhisi-o, koko lí kulusi gba e lí pá 'kpa aní na kokpa, koko lí kulusi gba e lí pá 'kpa aní na gali. <sup>34</sup> [Abhomu-o, Yesu atsia apa me: «'Dyi ma, mbu lí siti 'ngú gba uo, anga u mbíla engú inde u ngamene e de.»]

Osudha agu gbanda ngú nagapa obongo gba aní-e lí o. <sup>35</sup> Okpála adu oo, u adu atsia engú inde adu akodho 'kpí-o. Ongámási gba omaYuda adu amu aní. U atsia adu apa me: «Aní akobho okpála koko. A ayo me aní kobho di lie ne títi e, i du me aní nde ne Masiya inde lí Ebhe abhu e ko!» <sup>36</sup> Osudha amu di aní. U adyudyo lío masíkpe, u aha kpongadha pandí pí aní, u atsia apa me: <sup>37</sup> «Í du me mu nde

---

<sup>†</sup>23:30 Tsia bhú Oz. 10:8.

<sup>m</sup>23:31 Ndula bhe na yiyi-e, a ko Yesu. Ndula bhe na keke-e, a ko okpála.

bha ndjɛ ne 'ngbé ngámá gba omaYuda-a, mɛ de kobho limɛ ne titi mɛ!»

<sup>38</sup> Pí 'ndji ani-e, u aye me: «A INDE-E 'NGBÉ NGÁMÁ GBA OMA YUDA-O.»

<sup>39</sup> Suka okpála na sisiti inde u agi o li kulusi adɛ asobho ani me: «Mɛ ne Masiya adi? Kobho limɛ ne titi mɛ, amba mɛ kobho di ya!» <sup>40</sup> Engú bini, bhe koko ambe bhú 'ndji ani, do ani de-e: «Mɛ kpe Ebhe di, ngamɛ inde ngasia bhadi likabhu maka ani-e? <sup>41</sup> Pí ní-e, a li likabhu gba ní-e ne tata, anga ní ngasia bhomɛ-o mbini kulu gba ní ko. La-a, ngaani-e, ani mene naae siti 'ngú belegɛ de bini.» <sup>42</sup> Pí píta-a, ani atsia apa pí Yesu me: «Bhundja ma uu, li nedhinga inde mo ogó lie ngú naɛ ngámá gba mɛ ko.» <sup>43</sup> Yesu agie pí ani me: «Ma apa pí mɛ na paká me, naki-e, ní adú ne mɛ bhú dabili bini bhú kɛti na mɛndeyi ko.»

### Yesu akpi

<sup>44</sup> A akolo masikpe de tulukpe, ela a'o nasɛ. Biti aha píla doto libhomu akolo li saa na bata píta tulukpe. <sup>45</sup> 'Ngbé 'kpá bongo inde adɛ agbo bhɛsɛ 'ngbé 'ti Ebhe gba omaYuda asidha bhɛsɛ e tutɛ má tsɛ! <sup>46</sup> Abhomɛ-o, Yesu atsia asula kpekpeke me: «'Dyi ma, ma nga'o bua ma sa 'kpa mɛ.» Píta ani apa engú bhomɛ-o lie, ani atsia andala 'kpa li bua e. <sup>47</sup> Li ngámá gba osɛdha na Loma au engú inde akodho 'kpí-e lie, ani atsia adɛ adhɛgɛ Ebhe me: «A ko paká me kpála inde-e bha ndjɛ nako ne kpála na ngbingbili !» <sup>48</sup> Ndɛ okpála hana inde ago apo bhúla o ngú natsia engú ango-o, au engú inde akodho 'kpí-o. U atsia adɛ agie lio agba o me u nde abubu 'kpa o pí 'ka o ka likabhu. <sup>49</sup> Ndɛ obi Yesu hana di ne olisi inde adhɛkɛ ne ani bhú dabili bini nayie bhú Galilaya-a, alɛlɛ mbo tsutsu. U adɛ natsia engú inde adɛ akodho 'kpí ko.

### U azi Yesu

*(Tsia bhú Mat. 27:57-61, ne bhú Mlk. 15:42-47, di ne bhú Dja. 19:38-42.)*

<sup>50-51</sup> Kpála bini adɛ nani oo. A adɛ 'li ani me Djodjefɛ , kpála na Alimaté, sɛka gɛdhɛ gba omaYuda. A ko nani kpála na babadha inde adɛ di ngbingbili. Ani adɛ nani nadjekɛ nago ka Naɛ gba Ebhe píla doto. A ko nani sɛka Libi okpála natsia 'kpí li ongú gba omaYuda-o. Engú bini, ani dɛ aziba engú inde li Libi



okpála natsia 'kpí li onǵú gba omaYuda adu abhundja e di ne namene e li Yesu-o de. <sup>52</sup> Ani anu abhaka Pilate, ani atsia ayo kuo Yesu ka ani. Pilate aziba. <sup>53</sup> Pipita-a, ani atsia a'e kuo ani li kulusi-o. Ani agagala ne bongo. Ani atsia ato bhú lata inde u adji e bhú teme, lata inde u zi nga kpála bhú e kalanu de. <sup>54</sup> A adu nani 'kpí kulu bhuluvue, masikpe de ekpí naguo .

<sup>55</sup> Olisi inde ayie nani ne Yesu bhú Galilaya-a, anu bhú dabili bini ne Djodjefu. U atsia lata-o, u au maka u a'o kuo Yesu lie bhúbhú-o. <sup>56</sup> Pipita-a, u agie lio agba o. U atsia aleke emu, di ne mungotsi ngubula me sidi-e, u nu pulu kate kuo-o ne di. Li 'kpí naguo-o, u atsia aguo maka li líli apa lie ko.

## 24

### Yesu azuku

*(Tsia bhú Mat. 28:1-10, ne bhú Mk. 16:1-8, di ne bhú Dja. 20:1-10.)*

<sup>1</sup> Bhú 'kpí yinga kèkpí má bhé-o, olisi aha mungotsi inde u agili e-o, u atsia agbida abhú lata. <sup>2</sup> U abhaka me teme nde awawala li 'bhe lata-a awawala. <sup>3</sup> U ali lie, u bhaka kuo Ngámá Yesu de. <sup>4</sup> Nedhinga u adu akiaka lie ka 'ngú ang-o, kolo me-e okpála bhisi aze li uo. Okpála ang-o adyidyí bubu bongo má tuu tuu! <sup>5</sup> U adu la lie ne tsulu naali-e, u atutu bhúla o ne kuto. Okpála ang-o atsia apa pi uo me: «Yi ngagili kpála inde nu-o bhú ká okpála inde amu-o ka ni? <sup>6</sup> Ani sii ade. Engú bini, ani azuku. Yi bhundja engú nako ani apa e pi yi li nedhinga inde ani adu nga bha lie bhú Galilaya me: <sup>7</sup> <A ayo me u pu ma, Ndili gba kpála, pi okpála na sisiti. U gi ma li kulusi, amba bhú 'kpí na bata-a, ma tsia zuku.» <sup>8</sup> Abhomu-o, u atsia abhundja 'li ani-o.

<sup>9</sup> U ayie bhú lata-o. U atsia anu nakpokpo ndu 'ngú bhomu-o hana pi obhulu titima ndjikpa ne ká bini, di ne ndu obhende adu ne uo bhú dabili bini-e hana.

<sup>10</sup> Olisi ang-o, adu nani Malia , kpála na gudu na Magadala, Djaani ne Malia , 'hi Djaki. Ngauo ne olisi koko inde adu bhú dabili bini ne uo akpokpo pi obhulu titima gba Yesu-o. <sup>11</sup> Engú bini, obhulu titima abhundja naao me, engú inde li olisi akpokpo e-e, a ko engú na ngingi. Kaka-a, u tsia bhuka de. <sup>12</sup> Engú

bini, Piele ayie bhúlá, aní anụ ne holo abhú lata. Aní akolo lie oo, aní akita ne kuto, aní atsia 'kpí, aní au bha bongo inde u agagala kuo ne e ko. Pipita-a, aní agie lie agba e me aní nde ngangamba naali ka engú inde akodho 'kpí ko.

### **Yesu akoto li omukpata bhisi li kpadji na Emausi**

*(Tsia bhú Mlk. 16:12-13.)*

<sup>13</sup> Bha li 'kpí ango-o, omukpata bhisi adụ anụ bhú kúti bini inde u a'i e me Emausi. Kúti ango-o adụ de Yelusalema tsutsu, masikpe de kilometele ndjikpa ne ká bini. <sup>14</sup> U adụ akpokpo 'ngú sụnda o pindji ndụ 'ngú hana inde akodho 'kpí-o.

<sup>15</sup> Nedhinga uo adụ akpokpo 'ngú di ne namene kpekebhe lie sụnda o-o, ngaani Yesu makpe, aní adyudyo lie de uo masikpe. Aní atsia aholo 'nú ne uo bhú dabilí bini. <sup>16</sup> U adụ au aní, engú bini, ehe bini adụ amene me u ambíla aní de. <sup>17</sup> Aní ayi uo me: «A ko mangua 'ngú dho yi adji ne kpokpo e sụnda yi me-e?» Abhomụ-o, u alụ, u atsia abedhe ne likabhu bedhe.

<sup>18</sup> Suka uo bini inde adụ 'li e me Keleopasi apa pi aní me: «Bhú ká ogomago na Yelusalema libhomu-o, engú inde akodho 'kpí sụnda okpí inde-e, mụ mbíla bha de ngamụ kpi mụ kpi?» <sup>19</sup> Aní ayi uo me: «Mangua 'ngú dho?» U atsia agie pi aní me: «Engú inde akolo li Yesu, kpála na Nadjaleta! A ko nako polofeta kụkụlụ. Ongú inde aní amene e ne bhende aní asuno e, aní amene ndụndụ hana ne angu. Aní atsia asuno ongú ango-o kala Ebhe di ne kala ndụ okpála hana. <sup>20</sup> La-a, ongbengbe odimandẹ gba Ebhe di ne ongámási gba ní-e, apụ aní me u bhөлө aní. U atsia agi aní li kulusi.

<sup>21</sup> La-a, ya adụ nako ne 'to ya naaya me, a ko kpála inde agbégbe Isalaele bhú bali-o. Engú bini, a ane naki ekpí bata maka li oengú ango-o akodho 'kpí lie ko.

<sup>22</sup> La matá di-e, ya angamba ka olisi koko bhú ka ya naali. U anụ iginí bhú sikikpi abhú lata. <sup>23</sup> Engú bini, u u kuo aní de. U agie lio, u apa pi ya me oandjelu aze lio. Oandjelu atsia apa pi o me aní ụ. <sup>24</sup> Pipita-a, okpála koko bhú ká ya anụ abhú lata, u atsia abhaka ndụ 'ngú hana maka li olisi akpokpo lie ko. Engú bini, ngaani makpe-e, u u aní de.»

<sup>25</sup> Abhomụ-o, Yesu atsia apa pi uo me: «Yi ne ongingi! Ka ní yi ngabhuka lie

má gala ade ndu 'ngú hana inde li opolofeta-a apa e! <sup>26</sup> A ayo nako de me Kilisito dje likabhu kala me ani li bhú na na asasaua gba e di?» <sup>27</sup> Pipita-a, ani aholo nakpokpo ndu 'ngú hana inde u apa e pindji ani bhú oBhuku gba Ebhe-e pi uo. Ani akpokpo nayie bhú obhuku gba Moidje akólo bhú obhuku gba ndu opolofeta-a hana.

<sup>28</sup> U akolo lie de kuti inde u adu anu bhú e masakpe-e, Yesu amene mugito me ni adji tsutsu. <sup>29</sup> Engú bini, u atsia apa pi ani me: «Ní si ne yi si, anga ekpí asegele, biti la di ngago.» Ani atsia ali ngú nasi bhú dabili bini ne uo oo ko. <sup>30</sup> Nedhinga ani adu azu 'he lie bhú dabili bini ne uo-o, ani aha mapa, ani agie heni pi Ebhe. Pipita-a, ani agumu mapa-o, ani atsia aha pi uo. <sup>31</sup> Abhomu-o, djila uo abhulu, u atsia ambila ani. Engú bini, ani angita bha kolo bhú djila uo má pele! <sup>32</sup> U atsia aholo nayi lio sunda o me: «Li nedhinga inde ani adu akpokpo 'ngú di ne nasuno ta eli gba Ebhe lie pi ní li kpadji-e, bua ní bedhe igini bhú ní ne djali bedhe di?»

<sup>33</sup> Bha li nedhinga bhomu-o, u ayie bhúlá kolo má gala, u atsia agie lio abhú Yelusalema. Oo, u abhaka me obhulu titima ndjikpa ne ká bini-e nde apo bhúla o ne obi o-o bhú dabili bini. <sup>34</sup> U atsia apa pi obhe bhisi bhomu-o me: «Ngamá azuku na kuku! Simo au ani!» <sup>35</sup> Pipita-a, omukpata bhe bhisi-e atsia akpokpo 'ngú inde akodho 'kpí li kpadji-e pi uo, di ne maka u ambila Yesu lie li nedhinga ani agumu mapa lie ko.

### **Yesu asuno lie pi omukpata gba e-o**

*(Tsia bhú Mat. 28:16-20, ne bhú Mk. 16:14-18, ne bhú Dja. 20:19-23, di ne bhú Kul. 1:6-8.)*

<sup>36</sup> Li nedhinga u adu nga bha lie nakpokpo 'ngú ango-o, Yesu atsia alu bhú ká uo. Do ani pi uo me: «Guo 'ngú du bhú dabili bini ne yi!» <sup>37</sup> U adje tsulu naali, u atsia aholo aguku, anga u adu abhundja me o ou igbadyibhe. <sup>38</sup> Engú bini, Yesu atsia apa pi uo me: «Yi ngadje tsulu ka ni? Yi ne bua na bhisi bhisi ka ni? <sup>39</sup> Yi tsia nga 'kpa ma di ne 'dhu ma, a ko bha ma makpe. Yi tana nga kute ma, amba yi u, anga mbilika ne biki li igbadyibhe ade maka yi ngau ma lie ne di ko.» <sup>40</sup> Ani apa engú bhomu-o lie, ani atsia asuno 'kpa e di ne 'dhu e pi uo. <sup>41</sup> Li djali di ne

nangamba aha angu uo lie naali-e, u tsia bhuka ngaiza de. Aní atsia ayi uo me: «Mbo 'he nazɔ mazɔ ka yi si uu?»<sup>42</sup> U atsia aha ndu sungu inde u azi e mazi-e pi ani.<sup>43</sup> Aní aha, aní atsia azɔ li djila uo oo.

<sup>44</sup> Pipita-a, aní pi uo me: «Ma apa nako pi yi ndjindji nedhinga ní adɔ nga bha lie bhú dabili bini-e me, a ayo me ndɔ 'ngú hana inde u aye e pindji ma bhú líli gba Moidje , bhú obhuku gba opolofeta di ne bhú bhuku na oetsi gba ní-e, amene lie.»<sup>45</sup> Pipita-a, aní atsia abhulu imbilangɔ gba uo ngɔbula me u mbila ta engú inde u aye e bhú oBhuku gba Ebhe ko.<sup>46</sup> Aní atsia apa pi uo me: «Maka u aye lie bhú oBhuku gba Ebhe-e me, a ayo me Kilisito dje likabhu, amba aní tsia zuku bhú 'kpí na bata.<sup>47</sup> A ayo me okpála kpokpo 'ngú gba ani-e pi ndɔ okpála hana píla doto libhomu. U akpókpo nayie bhú Yelusalema me okpála dji bua o, amba Ebhe 'e siti 'ngú gba uo ko.<sup>48</sup> Yi au engú inde akodho 'kpí-e ne djila yi makpe.<sup>49</sup> Ngama-a, ma atíma pi yi bhende li 'Dyi ma apa me ní atíma e-o. Kaka-a, yi dɔ bha bhú gɔdhɔ si akólo li 'kpí inde li Ebhe atíma angu pi yi lie ko.»

### **Ebhe aha Yesu abhúlá**

*(Tsia bhú Mlk. 16:19-20, di ne bhú Kul. 1:9-11.)*

<sup>50</sup> Pipita-a, Yesu anɔ ne omɔkpata gba e masikpe de kɔti na Betania. U akolo lie oo, aní a'e 'kpa e, aní atsia atuko bisagu pí uo.<sup>51</sup> Li nedhinga aní adɔ atuko bisagu pí uo lie, aní ayie bhú ká uo. Ebhe atsia aha aní abhúlá.<sup>52</sup> Ngauo-o, u adhɔgɔ aní. Pipita-a, u atsia agie lío abhú Yelusalema me u nde abedhe ne djali bedhe.

<sup>53</sup> Ndɔ 'kpí hana, u adɔ nadɔ bhú 'ngbé 'ti Ebhe gba omaYuda ngú nadhɔgɔ Ebhe.